

NGENZÈLÙ WA

MAALU WA MUPRÒFETÀ

MULELÈLÀ WA NZAMBÌ



Kaa, mwoyi wenu awu mu dinda emu, balunda baanyi. Ndinda dilenga be, ne cikondo cîmpè cya kwikala kaaba aka. Ndi ne disanka dya kwikala ne mwoyi mu dinda emu, ne dya kusanganyibwa cyakabidi apa ne disangisha edi. Kudi maalu bûngì cyanaana àdì mwa kwenzeka mu katanci kakese kaa dîbà kaa mushindu ewu. Ne katwena bamanye ne ndîbà kaayi ditwabiikidiibwa to, bwa kulumbulula, kwaka kuulu ku Tubàdì tunene. Nenku tudi baswe kwikala badilongolole pa dîbà kana dyònsò, bwa twamona mwa kwikala ne ditalala.

² Nenku ndi ne kwanyisha kwàbûngì, bu mûngâmbì. Mu bushuwa bwa bwalu, mvwa apa mu dyalumingu diloolo, mwikàle ngaakula ne bantu. . . Mvwa muyiishe mu dyalumingu diloolo, ne ndi muswe kwela Mwaneetu Roberson twasakidila, nwènù bònsò bavwa babiikile, bwa ne Dyiisha dya mu dyalumingu diloolo adi divwa dinusankishe dya ne: “Tudi ne bintu byònsò.” Ne pa nanku mêmè. . . Pa dîbà kampanda ncivwa ngeela meeji ne nênyiishè to, ndi mulwe paanyi anu cyanaana e kutangila Mwaneetu Neville. Pa muminu wende—wende padila byenze bu lubulubulu nanku awu lwà kwinshi aku. Mêmè kudyambidila ne: “Mukwacikwetu, ncyà bushuwa ne bu yèyè mwa kumbiikila diloolo edi, nêmmukwàcishèku, anyi nêngènzè cyònsò cîndì paanyi mwa kwenza aci.” Bwalu, ntu mumanye cidibi, paudi mucyoke ne dîyi dikupate, wa bwalu mmuyiishe bikole be mu dinda adi. Pa nanku, ki mêmè—mêmè kuyiisha pa kaaba kende mu dyalumingu diloolo. Nenku tudi—tudi. . . Ndi nnwela twasakidila, wa manza tente.

³ Mpindyewu kudi malomba àbûngì, mudibo bamba, a disambila. Pa nanku tùàvùlùkaayikù, kumpalampala, malomba ònsò aa. Twinyikaayaaku mitu yetu mpindyewu.

⁴ Taatù wetu wa mu Dyulu, baakafunda ne bivwa bikengela twètù kwikala tubwela mu masangisha Ebe biikàle ne kusakidila mu myoyi yetu, tumanyisha malomba etu mu masangisha a Bansantu. Bya bwalu tudi naawu àbûngì, mu dinda emu, bûngì cyanaana, mu mushindu wa katuyi bamanye mwa kuKutèèlèlawù to, kadi Wèwè udi muàmanyè. Àdikù àbûngì avwa kaayi mateediibwe to. Wèwè udi muàmanyè, kabidi. Pa nanku, tudi tulomba ne myoyi yetu yònsò, mutuvwa

balombe mu dyalumingu diloolo dishaale edi bwa dya Mwaneetu wa bakaji Shepherd, dya Mwaneetu wa balume Shepherd, bwa mwânà. Mwômò amu pavwa . . . Patuvwa baalukile, Nyuma Mwîmpè kwambaye ne: “Kêna ne tuneke to. Neũmvwè bîmpè.” Adi ndisankishiibwa kaayipu ditudi tupeta patudi tuumvwa bifumina kùdì Wèwè.

⁵ Mpindyewu nyewu tulomba mu dinda emu bwa Wèwè kwandamuna ku malomba aa bwa mabeedi, bwa dîkù didi mu madilu, bwa bananga beetu, ne bwa byônsò bidi byambiibwe, Taatù. Tudi tulomba bwa Wèwè kuvuluka dilomba ne dilomba dyônsò. Ne ndi ndambula disambila dyanyi, ne disambila dya bantu aba, kumpala Kwebe; masangisha pamwe, ne matumiibwe Kùdì, mu Dînà dya Yesu Kilisto. Watumvwilaku’s, Taatù, mutudi tulomba. Amen.

⁶ Ndi muswe kwela muntu ne muntu wa kunudi nwênù bônso twasakidila bwa masambila enu bwa bwalu bwanyi. Pâncidì . . . Nudi bamanye ne mvwa mupete kaadikubakuba kakese pa mwaba wa diteetela cingoma pàapa. Nenu Sataana nguvwa ukeba kunshipa. Kadi—kadi, mu bushuwa bwa bwalu, kavwaku mwa kucyenza to. Huh-um. To. Nzambi kavwa mwanji kujikija naanyi to. Pa nanku yèyè kêna anu mwa kucyenza to padi byônsò kabiyi bijike. Pîikalà Nzambi mujikije, dîbà adi nèngîikalè mudilongolole. Kadi ndi . . . Mulunda wanyi mwîmpè, Mwaneetu Wood, kwaka naka, cidi anu mbwa luse lwa Nzambi, bwa cyanaana nunku yèyè uvwa mufwanyine kusangana anu kuumukila *apa* ne kwinshi eku, kadi kàyi usangana cya kuumukila *apa* kuya kuulu to. Civwa ndikubakuba dya tonnes yipacila ku yitaanu anyi yisambombo pabwîpî ne mpala wanyi nunku *ewu*, mushindu *ewu*. Kaciyi mwa kuntapaku nansha kakese to. Nwamonu anyi? Ncinkoonye anu kakese kwîsù. Pa nanku, twine atu, ee, twônsò tukaadi tujike mpindyewu, anu kaaditoba kakese kamwepele nkadi kashaale *pàapa*.

⁷ Pa nanku, ndi muswe kwela Mwaneetu wa balume ne Mwaneetu wa bakaji Dauch badi kaaba aka aba twasakidila. Mwaneetu Brown, ne bakwabo, bâmvwà muumvwile ku muyiiki wa ku telefone ne bavwa badisangishe, kasumbu kaa bantu, ne bansambidile. Ne ciine aci cidi anu cintu kampanda, cidi cikwenzela cintu kampanda. Nudi bamanye’s, paudi usambidila bakwabo, ne bikwabo byônsò, ne pashiishe ulwa ujangula ne muntu kampanda udi munkaci mwa kukusambidila paudi dijinga ne disambila apu, aci’s cidi ne mushinga wâbûngî be. Ne ndi mumanye ne bââbûngî baa kunudi kabavwa babiikile ku telefone, anyi cintu kaayi to, kadi nuvwa benze anu cintu cimwecimwe aci. Ne bidi ne mushinga wâbûngî be bwetu twêtù. Nenu ki kabingila kadi kenza ne . . . kacivwa cintape mputa to. Nzambi mmwenze ne ngiikale ne bukole bwa mubidi. Pa nanku ndi ne kwanyisha kwâbûngî.

⁸ Mpindyewu, ndi ne ndambu wa mamanyisha kumpala menemene kwa twètù kulambula bânà bakese aba. Mpindyewu, diloolo edi, kudi disangisha ku tabernacle. Nenku nwênù bônso batu balwalwalwa ku tabernacle eku, nulwayi anu ku disangisha mwaba ewu. Ne pa nanku tudi. . . Nênyiishè mwa Mwaneetu Ruddell, diloolo edi, lwà apa kumpenga kwa cibeeba eku, umwe wa ku bânà beetu batu batutancila kaaba aka. Ne pashiishe, anu nciidi ngaalukila, mêmè mwikàle ne diloolo dikwabo, ndi muswe kuya mwa Mwaneetu Junie Jackson. Pashiishe mwaneetu wa mu Sellersburg wawa, tudi nende dibanza dya diloolo dimwe kuntu kwaka, ne pa nanku tudi baswe kuya kamumona. Ne mwaneetu udi kwaka ku Utica, netukapicishilemu maloolo aa bilondeshile mushindu utwikala naawu awu.

⁹ Lumingu elu nênye ku Green Bay, mu Wisconsin, bu munudi bamanye's, ku cibilu cya ntenji cya Beena Kantu-ku-byanza baa Evanjeeliyo mu Kaabujima.

¹⁰ Dyalumingu dilwalwà edi, nêngiikale ku cilongelu cya tulaasa tubandile cyacya, cya kuntu kwaka cyacya, kûmvwà musangu mushaale aku. Nyewu ngápù mwoyi dîná dya dibalaasa diine dya cilongelu cya tulaasa tubandile atu. [Mwaneetu wa balume mukwabo udi wamba ne: "Mather."—Muf.] Ncinyi? ["Mather."] Mather. Stephen Mather. Eyowa. Mbîmpè. Dibalaasa dya cilongelu cya tulaasa tubandile.

¹¹ Nenku pashiishe, mu dimwe, nêngiikale mu cibilu kampanda mwaba wûngààkenzà dikokangana ne kasumbu kaa bambi mu Chicago mwamwa, musangu wa ndekeelu awu. Netwikale mu mwaba awu bwa disangisha dya dilayangana ne Mwaneetu Joseph Boze, uyààya ku Tanganyika. Tanganyika, ngeela meeji ne ki mudiye ukubiikila. Ne Kenya, ne Durban, ne kwônso aku, kudibo badilongolola bwa masangisha aanyi a mu muvù wa mabeji apoopoka ùlwalwà ewu; ne mu Afrike, ne mu Afrike wa ku Sud mwônso amu. Nenku tudi tunulomba bwa nwatuvulukaku anu mu disambila mu miine masangisha awu. Pashiishe netwalukile.

¹² Nenku ncyèna mumanye ne nêngiikale ne dîbà dya kucipeta, dikwabo dituku ku tabernacle, anyi ncyakwikala naadi, kumpala kwa twètù kuya pa dîbà adi batangile ku Caroline wa ku Nord. Ne pashiishe, kuumukila aku, kuya ku Caroline wa ku Sud. Ne pashiishe kuya too ne ku Cow Palace mu Los Angeles, ku South Gate. Ne kwòkò aku ki kûndi ntekemena ne nêmpetè mushindu wa kuya bwa kamona Mukalenge Weatherby, mwine utu mwenze cingoma cyena mutèlèngà uvwa mwenze dikubakuba aci awu.

¹³ Kavwa mutambe kusaka paanyima katupa kaa mutu aku to, ki kulekela mutèlèngà awu museemene paanyima pamutu paa kwikalawu museemene kumpala. Civwa ncingoma cya kale cîmvwà mumutumine. Yêyè kucidyundishisha munda mwa

lubungu, dībà adi, kadi kucivwija cingoma cya mushindu mushiilangane. Mémè kwelamu mutèlèngà, kujuukila kuulu bwa kutuuta, kadi wôwò awu, ee, kutaayishawu cingoma too ne mu nyungulukilu wa mètres makumi anaayi ne asambombo mu nyungulukilu wanyi, nunku *ewu*, kungengulukilabi mu cyanza. Lubungu kupatuka e kuya mu ntanta wa mètres makumi anaayi ne asambombo awu, mulonda wa nsalu kuyawu paanyima too ne dyamwamwa dya lupangu lwa tushà, mu ntanta wa mètres makumi abidi ne mwandamutekete, anyi makumi asatu ne mwandamutekete paanyima paanyi, kadi tusunsukila twa twamu kubuuka e kuya twenda tufyonona bizubu bya mici ne bikwabo byònsò. Pa nanku ciine aci mpabwìpì ne dísù dyanyi mushindu *ewu*, mu ntanta wa centimètres ibidì ne citupa cyanaana, mudibi bisotokele mushindu awu. Kadi bu cyôci cintunyine . . .

¹⁴ Kadi cingoma aci cidi mwa kutwala bujitu bwa kilô binunu bisatu ne bya mu njila, cyôci nkaayaaci, kaciyi citaayika to. Pa nanku nudi mwa kudifwanyikijila bujitu bùvwàpu, bwa kwenza cyôci aci. Nunku vulukaayi ne, piikalaci citaayishe cyôci aci, s'civwa kabidi mwa kwikala cintaayishe mutu ne makaaya, nudi numona's. Kadi Mukalenge nguvwa mwimane mwaba awu, uvwa mwenze ne kacintapi nansha kaputa to, cinkoonye anu kakese mu mpala. Nunku tusunsukila tukese twa cyamu ntumbwele kwinshi kwa cijengu cya dísù, twenze kajengu kanyungulukile cijengu cya dísù, mu mushindu wa kakayi kalenge cijengu cya dísù to, mùvwà tusunsukila twa byamu tubwele amu. Kamwe kaa ku tusunsukila twa tunene kàvwà kakatuute mu kabalubalu kaa mutu atu nkacinguluke dísù, kakayi kabwele mu dísù to, nansha nanku. Kaa, ekelekelee!

¹⁵ Anu abidi adi panshi aa, nudi bavuluke, mvwa munulondele ne Yèyè uvwa mutwilangane naanyi mu cibambalu, mwambe ne: “Kuciinyi nansha, bwalu Bwikadi bwa Yesu Kilisto bùtù kabuyi bùpangila abu budi neebe kashidi.” Nwamonu anyi? Nwamonu anyi? Pa nanku aci cidi cicijaadika ne, Yèyè udiku.

¹⁶ Ngangabuka kampana uvwa mujooje dísù dyanyi mu Louisville, ùvwa wamba ne bavwa bafunde bandamune Ngangabuka Sam Adair muneemu emu, mulunda wanyi awu, bamba ne: “Cintu cimwepele cindiku mémè ewu mwa kwamba ncyà ne, Mukalenge nguvwa mwimane mwaba awu mu dinda amu ne musadidi Wende bwa kumukuba, cyanaana yèyè kavwaku mwa kwikala mushaale ne mutu ku nshingu to.” Pa nanku, ncyà bushuwa ne Yèyè mmudileeje mwimpè be kùndì mémè, ne ndi ngaanyisha cyôci aci. Cidi cinseemeja pabwìpì ndambu. Citu misangu yònsò cishintululaku maalù ndambu.

¹⁷ Ne pashiishe, matuku abidi paanyima paa cyôci aci, matuku asatu, paanyima paa mémè mwikàle nya ku disangisha dyanyi, dìmvwà mumane kuteeka mu ndongamu ku Canada, muntu ewu, kayi mumanye kantu nansha kamwe pa bwalu ebu

to, kumbiikilaye cyakabidi ku telefone, ne bivwa bikengela kutentemunaye disangisha adi. Nwamonu anyi? Nunku mwwa mwikile mu njila mutangile kwine kuntwaku, bu cintu eci kacyi cyenzeke mushindu awu. Nwamonu anyi? Nenku ki kulwaye kubiikila cyakabidi, nenku bivwa bikengela nkenze disangisha adi, disangisha dya ku Canada adi. Nenku nediikale mu ngondo wa mwandamutekete, mbingu ya ndekeelu ya ngondo wa mwandamutekete. Pashiishe nêntungunukè nye ku Dawson Creek, pashiishe ku Anchorage, Alaska, bu Mukalenge mwa kwanyisha.

¹⁸ Mpindyewu, nansha dimwe dya ku masangisha aa ncyêna ne dilombodibwa nansha dya kânà bwa kuyaku to, nansha dimwe. Kadi ncyêna mwa kwela meeji bwa kushaala musòmba mwaba ewu mu muvù mujima wa luuya amu, kacya nsòmba anu muneemu emu, bantu paabo biikàle bafwa myaba yònsò to. Bidi bikengela mmyamine Mamiinu, nansha penyi pònsò, nansha kwikàle cinyi. Ôwò kâyi matoloke to, nyuunyi ya muulu yôyi miàzòkòle, nî ncinyi cyònsò, ndi muswe mmyamine Mamiinu, bwalu Yêyè mmumpe ndambu wa kumyamina. Pa nanku mêmè—mêmè nêmmyaminè Mamiinu nansha bya munyi. Mpindyewu, tudi ne cikondo mwab'ewu cîndi mêmè. . .

¹⁹ Bantu bààbûngì, cidibo bôbò babiikila ne, “kubatiiza” kwa bânà bakese baa mu maboko mu Diitabuuja dya bwena Kilisto aci. Ee, cidi anu cîmpè, pawikala wenza aci. Abu's budi anu mbwebe. Mu bushuwa bwa bwalu, kabatu bulelela bababatiiza to. Batu anu babamyamina mâyi mu lubombò lwa mutu cyanaana. Kadi, bwanyi mêmè, ntu muswe kushaala anu ne cidi Bible mwambe bwa kwenza aci. Ki bwa cinyi, anu cidi Dîyi dyambe aci, ki cîndi mêmè muswe kwenza, anu cyònsò cidiDi dyambe aci. Kadi, mpindyewu, ncyêna—ncyêna musanganeku mwaba nansha umwe mu Bible. . .

²⁰ Mu Dipungila Dikulukulu, bavwa balwa ne bânà bwa ditengudiibwa dya mubidi, bânà bakese baa balume, ne maamù uvwa ufila mulambu wa dikezudiibwa, tuumàndànkùci tubidi anyi mwâna wa mukooko.

²¹ Kadi, mu Dipungila Dipyadipya, mwaba umwepele wûndiku mwa kupeta bu civulukilu cya mudimu munene ewu wa. . . Civwa ndibalambula. Bavwa balwa ne bânà baa mu maboko kudi Yesu, ne Yêyè uvwa ubambula mu maboko Ende ne ubabenesha. Ki civwa baledi benza mu dituku Dyende. Nenku Wende nsòmbelu ki uvwa cileejilu cya citudi twètù ne cya kwenza. Nwamonu anyi? Bintu ebi Yêyè wakabyenza bu cileejilu.

²² Mpindyewu, twètù tutu anu twangata bânà bakese, balwa naabo kutudi, nenku twètù tubambula tubàbàndisha anu kudi Nzambi cyanaana, ne tulomba mabenesha a Nzambi pambidi paabo, ne tusambila disambila dya dibalambula dya

dibuumusha kudi taatù ne maamù, dibafila kudi Nzambi, padibo bafila mwanaabo mulela awu apu. Nenku. . . anyi tubalambula mu Dîna dya Yesu Kilisto, too ne piikalabo bakole bafike cipimu cikumbane cya kubatijiibwabo mu Dîna dya Yesu Kilisto. Nenku mpindyewu, Yèyè wàkamba ne: “Cyònsò citudi twenza mu dîyi anyi mu cyenzi, enzaayi byònsò abi mu Dîna dya Yesu Kilisto.” Pa nanku—pa nanku cyòci aci ki citudi bajinge kwenza.

²³ Nenku mpindyewu, padi mwaneetu wa bakaji wimba biteketebitekete kasambu aka ku cisanji, mwaneetu wa bakaji, utudi nende mwaba ewu ewu ne, *Bwelàayi Naabò Mùneemu*. Nenku baamaamù ne baataatù bàdi ne bânà bakese baa mu maboko aba bàtù kabayi banji kulambudiiibwa kudi Mukalenge, bu nwênù mwa kulwaku naabo mpindyewu, pàdi disangisha, patudi munkaci mwa kubimbila biteketebitekete mpindyewu apa, kasambu. Eyowa.

Bwelaayi naabo muneemu, bwelaayi naabo
muneemu,
Lwâyi ne bânà bakese kudi Yesu.

²⁴ Mémè ntu munange bânà bakese aba. Kudi cintu kampanda kudibo aku cidi cya bupole be.

²⁵ Ngeela meeji ne ewu udi menemene anu mwena Italie. Kî mmwômò anyi? Eyo. Famiye wa beena Italie, bakese menemene bàdi bàkèngelà kulambula. Mwaneetu wa bakaji mutekete wa beena Italie wa ku, kaa, wa ku Chicago, udi mwaba ewu. Mwva mwambe ne: “Ewu mfamiye wa beena Italie, mu dinda emu, kadi ncyakuyiisha to.”

²⁶ Dyende nganyi? Jonathan David, dîna bulengadi's we! Mpindyewu, Jonathan. Ûvwa wamba ne tatwëndè uvwa ne—uvwa ne dîna dya cyena Italie, kadi ùvwa ne. . . Yèyè mmuswe bwa wende mwânà ikale ne dîna dya mu Bible.

²⁷ Nudi bamanye, kuvwa mwena Italie munene mu Bible, dîna dyende Koneeliyo, musangu kampanda, nudi bamanye's. Ûvwa ne cisumbu cya masalaayi, ne yèyè uvwa mwîmpè, ne uvwa upa bantu bya pa luse, pende mwikàle wa baa Bisamba bya bende, nansha nanku. Nudi bamanye bwalu bulonda abu. Ki dituku dikwabo Mwanjelo kulwaye ku nzubu kwende, kumwambila bwa kutumaye bantu bwa kubiikidisha muntu uvwa mumanye ndongamu wa Nzambi. Ki yèyè. . . Nudi bamanye bwalu bulonda abu. Piine apu, ùvwa mufikishe bantu abu ku kaneemu kaa menemene kaa Nzambi! “Pacivwa anu Peetelo wakula Mèyi aa, Nyuma Mwîmpè wakapona pambidi paabo.” Ncya bushuwa. Ndi ndomba bwa mwânà ewu ikale muntu wa mushindu umweumwe awu, luumu lumwelumwe alu.

²⁸ Jonathan, bilenga be! Ndi mwa kumwangata anyi? Lwâku apa, Jonathan. Ekelekele, nkaadibulu kaa nsukaadi kaayi aka bwa famiye ewu's we!

Twinyikaayi mitu yetu.

29 Taatù wetu wa mu Dyulu, bidimu bikaadi bipite, kacya ku bwalu bündi mfuma ku diteela ebu, bwa muntu munene dinà dyende Koneeliyo, ùvwa muntu mwîmpè, mwakane, upangana bya pa luse ne munange Nzambi. Ki Mwanjelo wa Nzambi kulwaye ku nzubu kwa muntu awu. Éyì Nzambi, nyewu tuKupà, mu dinda emu, Jonathan David mukese ewu. Ndi ndomba, Taatù wa mu Dyulu, ne bu mûngààmuumùshì mu maboko a mamwëndè ne a tatwëndè, bàdì bàmufla Kùdì aba. . . Ndi ndambula disambila edi dya dilambula dya mwoyi wa mwânà ewu Kùdì bwa nsòmbelu wa mudimu, dibenesha kudi dîkù edi, dibwe dinene dya kutupikila bwa Ekeleeziya. Enzaku cyôci aci, Taatù. Ndi nKupeesha Jonathan David mukese ewu, mu Dînà dya Yesu Kilisto. Amen.

30 Nzambi anupeku ngâsà ne dikwacisha Dyende bwa nwènu kumukolesha mu mibelu ya Nzambi.

Akubeneshe, Jonathan David.

31 Mpindyewu, ewu nunku, ekelekele, mmwânà wa balume mutekete menemene, anyi ngwa bakaji? Wa balume? Ekelekele, mukwabo muyiishi ucilwalwà nyêyè ewu, mündi ntekemena. Dînà nganyi? Micah. Micah. Pa yêyè awu ki pândì ngaakula mu dinda emu. Micah Edward. Edward, adi's ndînà dilenga be. Mpindyewu, mukajaanyi ngudi mufwanyine kwenza cyôci eci bilenga be bwa pa bidi bitangila dimwambula, bwalu mêmè ntu anu ne bwôwà misangu yônsò ne ndi mufwanyine kubacibwisha padibo batekete. Nwamonu anyi? Aka's nkaacintu kaa bupole be, twisù tukese atu tukenzakana. Mmutekete menemene. Ukaadi ne ngondo yinga? Ngondo umwepele.

Twinyikaayi mitu yetu.

32 Taatù wa mu Dyulu, babàkà babidi batekete aba nyewu baseemena apa bwa kuKulambula bipeta bya disangila dya nsòmbelu wabo wûdì mubape, bwa kumukoleshabo mu mibelu ya Nzambi. Beneshaku Micah mwânà ewu. Nzambi, ndi ndomba bwa Wêwè kumuvwija muntu bu Micah wa mu Bible. Enzaku bwalu abu, Taatù. Umupeku mabeneshu a Nzambi. Beneshaku tatwëndè ne mamwëndè, ne umuvwije disonsodiibwa panu pa buloba, dibwe dinene dya kutupikila bwa bwalu bwa Kilisto. Nenku mpindyewu, ùtùmvwilèku, Taatù, nyewu mfla kùdì Wêwè, ngumusha mu maboko a taatù ne a maamù, mfikisha mu maboko a Nzambi, Micah Edward mwânà ewu, mu Dînà dya Yesu Kilisto. Amen.

33 Mukalenge amubenesheku, anubeneshe, taatù ne maamù, bwa kumukolesha mu mibelu ya Nzambi.

Ndi ngiitabuuja ne ki mudibi. [Katupa kaa mukaba wa mêyì munda mutupu—Muf.]

34 Kaa, mêmè ntu munange bikole bânà bakese abu, umwe ne umwe wa kudibo. Mbweni kwamba ne, umwe ne umwe, mmwânà wa mu diboko mutambe bulenga pa buloba. Kabyena

mene anu bikengela . . . Pângààkayà ne Joseph mwânà kumbelu, ùvwa, bwa kwamba menemene, ùvwa mwânà mukese wa mpala mubi be wa kacya mmonaku, kadi mamwëndè ne mêmè tuvwa tudyambidila ne yêyè uvwa cii-pòpî. Kadi's ki mushindu awu udibi, nudi bamanye's. Cyôcì aci ki . . . Ki mutudi twela meeji nanku awu.

³⁵ Ndi munkaci mwa kudikonka, mu dinda emu, bamwe baa ku bidimba byetu bya kaaba aka. Kuvwa ewu—ewu . . . Mpindyewu, *edi* disù mbadyèlè bwanga bwa belladonna, cidi cyenza ne diikalè dimona lubwicibwici bikole. Kadi Mwaneetu wa bakaji Nash. . . Uvwa mukonke bwa Mwaneetu wa balume Nash; ncyèna mumanye ní ùkaavwa muumvwe bîmpè. Ùdi . . . Bôbò biine badi kaaba aka anyi? Kaa, ee, eyo, nyewu ùdipù. Mukalenge atumbe, Mwaneetu Nash. Aci, mbîmpè.

³⁶ Mpindyewu, Mwaneetu wa bakaji Edwards, ùdi kaaba aka anyi? Mu . . . Anyi, Mwaneetu wa bakaji Shepherd, uvwa ne mwânà mukese, mwânà wa bakaji usaama awu, ùkaadi bîmpè mpindyewu anyi? Bîmpè. Ndi mupete luumu, cintu aci civwa ntusunsa bu tutaanu nanku awu kumpala kwa mêmè kwakidila bantu, baa pambelu paa cimenga, bwa muyiiki wa babidi. Mêmè kuya lubilu mu cibambalu e kusambila, kadi bôbò bavwa bambe ne mwânà awu uvwa munkaci mwa kupeta tuneke, maboko ne mikolo biikàle byuminyina. Ki mêmè kubwela lubilu bwa kusambila, mêmè kwamba ne: “Nëndwe paanyima paa disangisha.” Mêmè kwambila Loyce bwa kubandamunaye ku telefone ne kwambila inábànzà awu ne nêmfikè paanyima paa disangisha; bwa ne yêyè naanyi dijinga, wambiikila yêyè. Kadi pângàábwedì bwa kusambila, Nyuma kwambaye—kwambaye ne: “Kakwena tuneke to. Yêyè neúmvwè bîmpè.” Ki mêmè kupweka apa, ee, ki twètù kwenza disambila bônso apa ku ekeleeziya eku. Aci ki kumanaci bwalu.

³⁷ [Mwaneetu wa bakaji kampanda udi wamba ne: “Mwaneetu Branham?”—Muf.] Yè, mandamu. [“Tuvwa baye kwa ngangabuka mu dimwe amu, paanyima paa wêwè mumane kumusambidila musangu wa kumpala, disaamà dya mu bisulusulu ne mu mbadi adi ndijimine dyônso nkòong mu cyâdì cyende, dyumuke pa muminu.”] Mukalenge atumbe's we! Disambila's ditu dishintulula maalu.

Twâmbèbi tũng, kèna kaaba aka anyi, mu dinda emu, ùdipù anyi, muku wetu mwine awu? Eyowa.

³⁸ Dyalumingu dyâshàadi edi, musangu wa ndekeelu wûngààyiishì kaaba aka, dyalumingu dikwabo dyadya, kuvwa nsongaalume mukwabo wa citende musòmbe kaaba aka; mvwa anu kacya ngâmutàngila. Mêmè kudyambidila ne: “Ndi ne cya kwikala mumanye nsongaalume wawa.” Kadi mêmè kufika ku dijandula ne, ùvwa mmwânà wa balume wa mulongi wetu wa kale, Jim Poole. Mona's, tuvwa bakolele kaaba kamwe,

kacya anu patucivwa bânà bakese, ne mutwavu kukola. Ki yêyè uvwa mumpeteshe njiwu ya cingoma awu, cikondo aci, ne paanyima yêyè mwine kulwaye kuyipeta pende, ne mulunda wanyi. Ndi mutwishiibwe ne ndi mwa kufikisha nsongaalume wawa kudi Kilisto. Ngâkateeta kucyenza bwa tatwëndè ne mwanyi mwônsò. Ncidi anu ngiitabuuja ne nêncyênzè, anu kucyenza, nêmmubwejèmu. Ndi ntekemena ne ndi mwa kulombola nsongaalume wa citende wawa. Ûvwa ne . . . Ngâkènzakanyi e kumutangila. Yêyè uvwa mumweneke anu bu ne uvwa ne, mûndi ncibiikila mpindyewu (kanwikadi nwâya kamba dîyi edi kudi muntu mukwabo to), kadi, dikankakana dya nyuma wende, dyumvwa dîmpè's. Ndi ngeela meeji ne kî mbifwanyine kundomba mudimu mupitepita bûngi bwa kulombola nsongaalume wawa kudi Kilisto to. Pa nanku twâmusambidilaayiku. Ncya bushuwa.

³⁹ Kadi, mwaneetu, mona, muntu kampanda mukwabo uvwa usaama, anyi cintu kampanda, ûmvwà nteeta kwelela meeji.

⁴⁰ Kadi, tudi tubasambidila bônso. Ne padibi misangu mikwabo. . . Paudi utuma dilomba, wavuluka ne, pândi anu ndipeta. . . Mukajaanyi udi mu citanda emu mwaba kampanda, ngeela meeji, pa nanku yêyè mmumanye. Pândi anu mpeta dilomba, nyaaya buludi ku nzubu wanyi wa mudimu, mbwela mu disambila, ne nshaalamu too ne pândi ngumvwa cintu kampanda. Ncyèna anu ndilekelaku to.

⁴¹ Dituku dikwabo, Sam, Ngangabuka Sam, pavwaye mumpatule kalumyana aku mu disu, ùvwa uteeta kucyenza, kadi kumusaamabi ku mwoyi bibi be, kukengelabi bwa yêyè kuntenteka nsùmè pa mpala. Kwambaye ne: "Ncyèna mwa kumona mashi a mulunda wanyi to." Yêyè ne. . . Kadi mêmè kwikala mutampakanemu, nudi bamanye's. Yêyè kwamba—yêyè kwamba ne: "Ncyèna anu mwa kwenza nanku kadi kukwatapu mudimu to." Nwamonu anyi? Nenu ki yêyè kukapatula. Ki paakacyabu yêyè kubwela mu lupitaadi. Ki mêmè kumusambidila, e kumupatakaye ne mubidi tumatuma.

⁴² Ki pashiishe dituku diibîdi, mukajende, kabavwa nansha bamanye ne civwa cimusaama ncinyi to, beela meeji ne ùkaavwa ùpeta tuneke. Nwamonu anyi? Kwambabo, ki kwambabo ne. . . Ki mêmè kumusambidila, kadi patudi twakulangana apa udi kumbelu ne mubidi tumatuma. Ki twètù kubwela mu cibambalu amu, Ngangabuka. . . Twètù kubwela mu birô, nenu yêyè. . . Twètù kwinjila ciibi, kwambaye ne: "Mpindyewu, Mwaneetu Bill, ndi muswe nkulombeku cintu kampanda." Yêyè ne: "Udiku mwa kuswa bwa kutusambidila mêmè ne Betty anyi?"

Mêmè ne: "Tuyaakwaku. Tusambilaaku."

⁴³ Pa nanku, yêyè nguvwa Mukalenge muleeje cikeena-kumona, cya mwaba wa kwashilaye lupitaadi awu. Nwênù, nudi bavuluke bwalu abu. Wèwè anu mudidinge mwele mpatà,

nda kudiye, umukonke dibà dyònsò naka. Eyowa, kwambaye anu naka ne: “Muntu kana yònsò alwe.” Yèyè ne: “Nkaadi mubulondele bantu binunu dikumi.”

⁴⁴ [Mwaneetu wa balume mukwabo udi wamba ne: “Mwaneetu Branham?”—Muf.] Yě, mwaneetu. [“Bwa aba bàdì kaaba aka mu dinda emu ne bwa kusakidila kabidi diitabuuja mu myoyi ya bakwabo: Mu dinda dya dyalumingu dya Paasaka, wèwè uvwa muteele musuuka kampanda wa mushinga mukole kaaba aka, muntu mwisâtù, mwikàle muntu mulume. Wèwè kwamba ne yèyè awu uvwa mufumine ku Seymour. Ki wèwè kwamba, mu dilaabiiibwa dya Nyuma Mwîmpè ne: ‘Batu bakubiikila ne, “Bill.”’ Mêmè ntu mumanye muntu awu. Ntu mumumanya anu bîmpè byetu bya menemene ebi. Kadi paanyima paa twètù bamane kuumuka kaaba aka, dînà dyende utu Isaac. Mu bulelela batu bamubiikila ne ‘Bill.’”] Eyowa’s, mukalenge. Nwamonu anyi?

⁴⁵ Dînà dyende dilelela ny’Isaac. [Mwaneetu udi wamba ne: “Ncya bushuwa.”—Muf.] Kadi batu bamubiikila ne Bill. [“Ncya bushuwa.”]

⁴⁶ Nyuma Mwîmpè katu utupakanaku to. Yèyè katuku mwa kupangila to. Mpindyewu, eci, muntu kampanda uvwa wakula, kwambaye... Nkaadi—nkaadi ne bidimu makumi ataanu ne bisatu, ne makumi asat-...bidimu bitwe ku makumi asatu, mbîndì nsanganyibwa mu cyambilu emu, ne nkaadi muMumonemone mu bintu binunu makumi.

⁴⁷ Makeelela awu, mvwa nsanganyibwa kwaka, kwaka menemene, ku sud wa Kentucky, anu ku mukalu menemene wa Tennessee, nenku mvwa musòmbe mu bwâtù ne Mwaneetu Daulton, udi Mukalenge mupe bânà bende bònsò awu. Nudi bavuluke dinda kampanda kaaba aka, paakabangaye. Ki yèyè kwamba ne: “Mwaneetu Branham,” yèyè ne, “ndi ngeela meeji ne mbifwanyine kwikala bikukolele bwa kwenza macinka’s.”

⁴⁸ Mêmè ne: “Kaa, Mwaneetu Daulton, binunu makumi kuvudija ku binunu makumi a bintu bya mushindu awu.”

Yèyè ne: “Bwa cinyi kuyi uteetaku bwa kufunda mukanda” (Mêmè kwamba ne. . .) “pa cyôcì aci?”

⁴⁹ Mêmè ne: “Kaa, Mwaneetu Daulton, bunene bwawu’s mbufwanyine—mbufwanyine kupita bwa bwâtù ebu, mukanda wa cibungu, anu mipimbu ne mipimbu ya mikanda ya bînkaadì mêmè ewu mumone Mukalenge mwenze. Ne kacya musangu nansha umwe Yèyè katu mwanji kupangilaku to, udi umona’s, musangu nansha umwe; kadi, bipwangane musangu wònsò.”

⁵⁰ Ndi mmona, ndi ngiitabuuja mpindyewu ne, mêmè nciyi mutupakane to, mwânà wa bakaji wa Mwaneetu Shepherd, udi muvwale nkanzu mwenze bu wa diikala dya maanyimaanyi wawa. Ki cîndì ngeela meeji. Ngâkiimana pabwîpì nende, dinda kampanda. Uvwa wenda upweka, kadi mêmè kwela

meeji ne mvwa mufwanyine kwambula mu kashinyi mwânà wa bakaji uvwa kayi yêyè to, ki mêmè kutuula mashinyi e kuya. Pa nanku awu ùvwa mmêmè wâkiimana awu, mwaneetu wa bakaji. Mvwa—mvwa mwele meeji ne ùvwa mmwânà wa bakaji wa Mwaneetu Shepherd, nenku mvwa mwa kumwambula, bwalu mvwa ndyambidila ne kende kashinyi pàmwâpa kavwa kafwanyine kwikala kafwe anyi cintu kampanda. Tuvwa tuya, bwa kwangata Becky. Ki mêmè—mêmè kwela meeji ne ncifwanyine kwikala mwânà wa bakaji uvwa kayi yêyè to. Kadi mpindyewu nyewu mmona mwaneetu wa balume musòmbe naabo mwaba wawa, pa nanku ndi—ndi ngeela meeji ne ùvwa nyêyè mwânà wa bakaji awu. Pa nanku ùvwa mmêmè uvwa mwimanyike kadi pashiishe kutuula kashinyi e kuya.

⁵¹ Pa nanku, muntu yònsò mmunange Mukalenge Yesu anyi? Kaa, bilenga be! Aci cidi anu cilenga ne cîmpè be. Amen.

⁵² [Mwaneetu Neville udi wamba ne: “Mwaneetu Willard nyewu wáfumu ku dibwela.”—Muf.] Ee, Mwaneetu Willard, tudi anu ne disanka dya kwikala neebe munkaci mwetu. Kabidi udi umweka bîmpè be, wêwè mwine, bwa mwanyi paanyi mûndi mufwanyine kukumona’s. Tudi neebe bònsò benze anu bu mâmpà mapaya minyiinyi’s, lwâ kwîsù kwònsò eku. Mêmè ndi mmweka anu bu ne mbayintuute dyanza dijima. Nenku mvwa mumone Mwaneetu Willard diloolo adi, pavwaye mulaale tulu, bwa kwamba menemene, ùvwa ne mmwenekelu wa ukwacisha ne bwôwâ. Kadi’s udi umweka bilenga bya dikema mu dinda emu. Nenku tudi twela twasakidila ne tupa Nzambi butumbi bwa bwalu abu, mwaneetu. Amen. Eyowa. Udi mumanye’s, dyabulu kêna mwa kutushipa to padi Nzambi kayi mwambe ne: “Lwâyaaku.” Dîbâ adi mpatudi baswe kuya, kî mmwômò anyi, Mwaneetu Willard? S’ncyâ bushuwa. Bwa too ne pa dîbâ adi, yêyè udi uteeta upanga. Kwajiki. Mukalenge Yesu ki dyetu dikwacisha ne cyetu cinyeemenu.

⁵³ Mpindyewu ki mêmè ukàadi muditwe anu mu muyiiki ewu mwab’ewu, kadi paanyi’s ndi ne mêmè anu matwe ku asambombo cyanaana a kuyiisha mu dinda emu. Nwamonu anyi? Anu. . . Mpindyewu, katuvwaku badyanjile kumanyisha to, katuvwa batuminangane tubeji to, ne bikwabo, bwalu nkaavwa mudyanjile kumanyisha ne ncyakwikala mwaba ewu to. Kadi, ndi mulwe anu bwa kukwacishaku Mwaneetu Neville, ne bwa kupetaku mushindu wa kunumona cyakabidi nwênù bònsò, ne kupetaku ndambu wa dîbâ bwa bwobumwe.

⁵⁴ Nenku diloolo dya dyalumingu dishaale, Mwaneetu Roy Roberson, ncyêna mumanye ní ùdi kaaba aka, anyi ní kênàpu. Ncyêna mwa kufika menemene ku dimona ne ùdîpù to. Yêyè ùvwa mumbiikile ku telefone, ùngambila bwa Diyîisha.

⁵⁵ Ki muntu kampanda kubiikilaye, kwamba ne: “Mvwa ndikonka pauvwa wamba ne ‘Nzambi mmutupe bintu

byônsò' apu.” Nwamonu anyi? Yèyè's mmutupebi. Mmutupe bwoyi. Teetabi kuwusumba tǔng. Mmutupe dinanga. Teetabi kudisumba tǔng. Mmutupe disanka. Teetabi kudisumba tǔng. Mmutupe ditalala. Teetabi kudisumba tǔng. Kakwena mushindu wa kubisumba to. Kwèna mwa kubisumba to.

Pashiishe mèmè kwamba ne: “Mmutupe lufu.”

Muntu kampanda kumbiikilaye, wamba ne: “Muyiishi, mvwa ndikonka kùkaavwà wenda uya ne bwine bwalu abu's.” Yèyè ne: “Mvwa ndyambidila ne: 'Kakaa, mona Mwaneetu Branham mwavuye kudikondakaja musangu ewu.” Kì mpadi Bible wamba nanku to. Nwamonu anyi? Bible's ngudi mwambe ne Yèyè mmutupe lufu.

⁵⁶ Mpindyewu, citudi mwa kwenza ne lufu ncinyi? Nudi bamanye's, pàkaavwà Pòlò uya mutangile ku lufu, wàkamba ne: “Wèwè lufu, kalonda keebe kadi penyi?” Lufu kì ndùdì lutukontonona twètù to. Twètù mbàdì balukontonona. Cya bushuwa's. Bintu byônsò mbitupeeshiibwe.

⁵⁷ Kì pashiishe mèmè kufila cifwanyikijilu cya muvwa Izaleela, mu lwendu lwa batangile ku buloba bulaya, kacya bôbò kabavwaku banji kumona buloba abu to. Kabavwa ne civwabo bamanye pa bwalu abu to. Bavwa bapete paabo anu nanku mulayi wa kudi Nzambi ne, kuvwa buloba, ne buvwa bùle tente ne mabeele ne bwîci, ne bwîmpè, kwikàle—bwikàle mwaba munene. Nenu buvwa . . . Kabavwaku banji kubumona kacya to. Muntu nansha umwe kavwaku mwanji kukufika to, kabayi bamanye kantu nansha kamwe pa bwalu abu to. Kadi bavwa ne mulayi wa buloba abu. Kadi ku diitabuuj baakenza lwendu mu cipeela.

⁵⁸ Kadi mbenze anu bafika ku mukalu menemene, bavwa ne mulwanganyi wa mvita kuntwaku dînà dyende *Yoshuwa*, diikàle dyumvwija ne: “Yehowah Musungidi.” Kì yèyè kusabuka Yadene, kubwela mu buloba bulaya, ne kulwaye ne cilejei cya ne buloba abu buvwaku. Ndi munange aci. Nenu buvwa buloba bwîmpè. Bantu babidi bavwa bambule cisumbu cimwe cya tumuma twa mvinyo. Buvwa buloba bwîmpè, pa nanku yèyè kulwa ne cilejei cya ne buloba buvwabo ne cya kukwata abu buvwaku.

⁵⁹ Mpindyewu, bwa Ekeleziya, tudi mu lwendu batangile ku Buloba bwa dibenga kufwa, Buloba mudi kamuyi lufu to, Buloba mudi bafwe babiishiibwe ku lufu. Ne tudi bapete Musungidi munene mu cituudilu cyetu. *Yesu* mbwena kwamba ne “Yehowah Musungidi,” Munanga. Ne Yèyè wakasabuka Yadene wa lufu, mukabwele mu Buloba bukwabo bwabwa, mwalukile, mulwe ne cilejei cya ne tudi ne mwoyi paanyima paa lufu. Amen. Pa nanku lufu ludi penyi mwaba awu?

⁶⁰ Ne pashiishe Yèyè mmutupe bintu byônsò. “Mpindyewu tudi ne cyeyà cya bumpyanyi bwetu. Mu mushindu wa ne . . .” Mpindyewu teejejaayi ne ntema. Kadi kì mpa cyena-bwalu aci

pândi nyiisha to, kadi cidi cyumvwika anu cîmpè bwanyi mêmè mpindyewu mene. Nwamonu anyi? Cyôci aci, tudi ne cyeyà cya cyôci aci. Bwalu, dituku dikwabo twâkendela mu mpekaatu; kadi paanyima paa twêtù bamane kubatiijiibwa mu Dîna Dyende, ne babiishiibwe Nende mu dibiika dya ku lufu, tudi bapatudiibwe mu mpekaatu, katuciyiku kabidi tuswa kwalukila cyanyima to. Nwamonu anyi? Tudi babiishiibwe ku mpekaatu, ne cileeeji citudi naaci aci. Tudi mu dibiishiibwa dya ku lufu lwônsò mu mushindu mushaadile. Nwamonu anyi? Piikalabi ne twêtù tudi bapete bukole bwa kubiishiibwa ku mpekaatu, ku diitabuuja mu Yèyè; ne ki mpekaatu nyèyè wawa, nganyi udi mufwanyine kuswa bwa kwalukila kabidi ku bipanza bya diimanshila bukooya bwa mpekaatu? Nwamonu anyi? Tukaadi buumuke ku lufu baye ku Mwoyi. Nwamonu anyi? Nenku ki cyeyà ncyôci aci. Amen. Ki cyeyà cya dibishiibwa dya ku lufu mu kaabujima ncyôci aci. Lufu lwônsò, lwa mubidi ne lwa nyuma, tukaadi bamane kucimuna lufu lwa nyuma, bwalu tukaadi buumuke ku lufu baye ku Mwoyi.

⁶¹ Nenku anu mwakapweka Eliya ku Yadene dituku dikwabo, ne kutuutaye pa mâyi, pavwabo ne Elisha, mâyi kukosolokawu, ne yèyè kusabuka. Wâkaalukila ne bitupa bibidi.

⁶² Nenku patudi twêtù tutuuta Yadene, ne Kilisto, tudi ne citupa cimwepele, kadi patudi twalukila, tudi tulwa ne bitupa bibidi. Tudi ne Mwoyi wa Cyendeleele, dibiika dya ku mpekaatu, mpindyewu, mu bwakane ne Nyuma Mwîmpè. Ki pashiishe mu dyalukila, ne Kilisto, tudi twalukila ne byônsò bibidi dibiishiibwa dya mubidi, bu mutukaadi bamane kupeta dibiishiibwa dya mu nyuma. Tudi ne bitupa bibidi bya dyôdi adi. Bidi misangu yônsò anu cimfwanyi cya Kilisto ne Ekeleziya: Elisha ne Eliya.

⁶³ Kaa, ncyêna muswe kubanga kudiyela mu aci to. Ekelekele, ekelekele, ekelekele, tudi bafwanyine kupanga kubundula Diiyiisha dya mêmè asambombo edi mwaba ewu. [Mwaneetu Neville udi wamba ne: “Munyiinyi mulamate pa mufuba, mucikàlepù.”—Muf.] Eyowa. Ekelekele! “Munyiinyi mulamate pa mufuba’s,” Mwaneetu Neville. Bacikàle anu tuwukunya. Kaa, kanwenaayiku ne disanka anyi? Nwamonu anyi? Katwena ne . . .

⁶⁴ Kakwena kabidi cidi citacisha to. Lufu ncintu cyanaana. Tukaadi naalu lwela ku mpaaya. Lukaadi lwetu. Kalwenaku mwa kunkontonona mêmè to. Mêmè ngudi ulukontonona. Mushindu kaayi? Ku Yèyè Wâkamvwija mucimunyi awu, bwalu nkaadi mumane kucimuna lufu. Ngâkalùcimuna munyi? Mu kuMwitabuuja Yèyè. Nwamonu anyi? Lufu ludi munda mwa mpekaatu, bupidyà. Mêmè ncyêna mwena bupidyà to. Ndi mwena kwitabuuja. Nkaadi mubiishiibwe ku cintu aci, mubiishiibwe ku lufu. Ncyeyà cya dibiishiibwa dyanyi dyônsò mu kaabujima dya mubidi, dya nyuma, byônsò. Eyowa’s, mukalenge. Nudi bacyûmvwè anyi? Pa nanku ncyà bushuwa

ne tudi ne lufu ku bukontononyi bwetu, ku Yesu Kilisto Udi mucimune lufu, iferno, lukita, disaamà, tunyinyinganya, bikwabo byònsò, mubicimune byònsò.

⁶⁵ Nenku tudi mpindyewu babiishiibwe Nende, basòmbè mu myaba ya mu Dyulu, mu ngaakwilu wa nyuma, mu Kilisto Yesu, ne bintu byònsò mwinshi mwa makàsà etu. Nansha dibiishiibwa dya ku lufu diine dya mubidi didi mwinshi mwa makàsà etu, bwalu tudi munda mwa Kilisto. Nudi—nudi bacyūmwè anyi? Panwikala bacyūmwè, elaa yi byanza muulu. Amen. Abi mbîmpè. Bu munudi bacyūmwè, abi mbilenga. Nwamonu anyi? Kanulekedi. . . Mpindyewu tungunukaayi anu ne kwikala bacilame mu meeji enu. Nwamonu anyi? “Tukaadi buumuke ku lufu baye ku Mwoyi,” lwa mubidi, lwa nyuma, mushindu wònsò.

⁶⁶ Nenku byònsò, ne bintu byònsò, bikaadi byetu twètù patudi twakulangana apa. Mona’s, baa pa buloba pambelu apa badi bamba ne twètù tudi bapâle, kadi paabi’s buloba bujima mbwetu twètù. Nenubupyane munyi?

⁶⁷ Pavwa, bu mûngâmbi, Abraham, nwamonu’s, ùvwa usanganyiibwa mu buloba bulaya; Nzambi ukaavwa mumupebu. Lota wakakwaciibwa kudi bangodavi kampanda bapidye diitabuuja, kuyabo nende. Ûvwa mmwânà wa mwanaabo. Eyo. Byònsò bivwà mu buloba abu bivwa bya Abraham. Pa nanku, yèyè kavwa mulwanganyi wa mvita to. Kacya kavwaku mwanji kulwa mvita to. Kavwaku nansha ne balwanganyi baa mvita to. Yèyè uvwa ne ndambu wa basadidi. Kadi mmwenze anu umona ne cintu kampanda, dyabulu, ncilwe kumwiba cintu kampanda civwà kudiye bu mulayi, ki kupeeshaye basadidi bende bya mvita ne yèyè mwine pende kwangataye cya mvita. Kavwa mumanye ne mmushindu kaayi uwaye mwa kuya kacimuna musumbà mujima wa bamfumu ewu to. Anu ne dyanza naka dya basadidi, kadi ki Nzambi kumwambila mushindu wa dicyenza’s. Kudyabanyaye yèyè mwine, kadi kushipaye bamfumu abu, ne kwalukilaye mwikàle mucimunyi. Bwa cinyi? Ûvwa muteekele diitabuuja dyende pa mulayi wa Nzambi wa ne byònsò bivwà mu buloba abu bivwa mbyende yèyè, ne Lota uvwa citupa cya byòbì abi, ncya bushuwa, ùvwa citupa cya ku buloba abu. Kaa, ekelekele!

⁶⁸ Ki kwòkù kuntwaku kutwilanganaye ne Melekisedeke, paanyima paa mvita mimane kujika. Nudiku bafwanyine kumona Abraham wenda ubànda ne njila anyi? Kavwa yèyè mumanye ne ùvwa mulwanganyi wa mvita to, kadi wakamanya mwaba awu ne ki civwaye. Eyowa’s, mukalenge. Kadi ki yèyè kutwilangana ne Ewu Wâkafila mulayi, Melekisedeke.

⁶⁹ Mpindyewu tubalaayi mu Mukanda wa Amosa. Mu dinda emu nêngâakulè; nansha nanku, kî mmèbà asambombo to. Ndi ntekemena ne kabyakwikala nanku to. Nwamonu anyi? Pa—pa cyena—bwalu kampanda, cya ne: *Ngenzèlù Wa Maalu*

Wa Mupròfeta Mulelèlâ. Ne diloolo edi, bu Mukalenge mwa kwanyisha, nêngaàkulè pa: *Kupàtula Lupeepèlè,* bu—bu Mukalenge mwa kwanyisha.

⁷⁰ Mpindyewu, batu bammanyè mêmè ewu ne ntu mudyudi, kadi nciu—nciu—nciu ne bya didyulangana abi to, amba anu cintu kampanda ciikàle cya mashimi. Kadi mêmè, twètù, bivwa bikengela twètù kwikala tudyula cidi cibi.

⁷¹ Mpindyewu, bu nwênù mwa kukangula bisanji byenu bidi bikwata mèyi mpindyewu, mu cibambalu amu, mona's, mbîmpè. Ndi muswe kubala mpindyewu mu Amosa, nshapita mwi³. Anyi, mu. . . Eyowa. Mu nshapita mwi³ wa Amosa, . . anu citupa cyende cyanaana, Amosa 3:

Teelejaayi dîyi edi didi MUKALENGE mwakule bwa kunudyula, Nwênù bânâ baa Izaleela, bwa kudyula famiye mujima wûndi mupatule mu buloba bwa Ejipitu, wamba ne:

Anu nwênù nkaayeenu ki bândi mumanye mu famiye yônsò ya pa buloba: ki bwa cinyi nênnûnyookè bwa. . . bubi bwenu.

Bantu babidi badi mwa kwendela pamwe, padibo kabayi bumvwangane anyi?

Ntambwe neakungule mu diitu, padiye kayi ne nyama udiye mukwate anyi? kânâ kaa ntambwe nekèlè lubila ku bwina bwaku aku, padiku kakayi kakwate cintu anyi?

Nyuunyî udi mwa kupiika mu buteyi pa buloba, mwaba udiku kakuyi musubula mumwelela anyi? musubula udi mwa kupawula buteyi panshi, padibu kabuyi bukwate cintu nansha cimwe anyi?

Mpungi nèediibwè mu cimenga, bantu kabayi bakwacika bwôwâ anyi? nekwikale bwalu bubi mu cimenga, piikalâ MUKALENGE kayi mubwènzè anyi?

Ncya bushuwa ne Mukalenge. . . kaakwenza cintu nansha cimwe to, piikalaye kayi mubuulwile basadidi bende baprofeta minsokòntù yende.

Ntambwe nyewu wakungulu, wabenga kukwacika bwôwâ nganyi? Mukalenge NZAMBI nyewu wâkùlù, udi kayi mwa kwamba ciprofeta nganyi?

⁷² Twisù twende tuvwa ne cya kwikala tushaale tukese, pavwaye mwimane mu dinda adi pa kakuna kavwa katangilangane menemene ne cimenga cya Samaaleya aku. Ndi mwa kumona byanza byende bipapakane abi muvwabi bipicila ku mwedi wende ûkaavwâ ne mvyâ awu. Muunya mukole awu uvwa mutwe pa buloba. Kavwa mutambe kwikala wa ûbâlakana bwa kumutangilabo to. Dishilangana kaayipu ne batangadiki baa cyena leelu aba leelu ewu! Bilâmbâ byende

bivwa bisunsuke; ne mwedi umweka mushitakane. Nenku dya upwekesha mèsù pa cimenga aci cya Samaaleya, twisù twende twenda tushaala tukesee pavwaye utangila apu. Kavwa yêyè mwine wa batamba kutangila to, kadi ùvwa ne EMU MMUDI MUKALENGE WAMBA bwa ditunga adi.

⁷³ Civwa, pàmwăpa, cishiilangane bikole bwa kampanye kavwa kalwa aka, kavwa Mukalenge mumutumine mu Samaaleya aku, ne cidi batangadiki beetu baa cyena leelu aba bafwanyine kwikala. Kavwa mupaya ne bintu kampana bwa ditabuluja dya mushindu awu adi to, dya mutudi bafwanyine kudyelela meeji ne mmuvwaye ne cya kwikala leelu ewu adi. Kadi vulukaayi ne, kavwa mutangadiki wa cyena leelu to. Yêyè uvwa muprofeta. Kavwa ucyuka bwa bya dikwata naabi mudimu bya cyena leelu to. Ûvwa ne EMU MMUDI MUKALENGE WAMBA.

⁷⁴ Kavwa ucyuka bwa mmwenekelu uvwaye nende to, ne bwa mushindu uvwaye muvwale, anyi bwa nsuki yende ne yivwa myela cisaku bilenga, anyi ne kuvwa muntu umutangila anyi kakuvwa muntu umutangila. Yêyè uvwa ne Dìyì dya Mukalenge. Ki civwa kende kiipacila kajima kavwaye naaku ncyôci aci: kutwala Dìyì dya Mukalenge adi. Muntu mwine ewu uvwa nganyi? Eyowa. Ûvwa ng'Amosa, muprofeta, muntu mukayabale, kadi ùvwa mumanye mwaba uvwaye mwimanyine. Ûvwa mumanye civwaye wenza. Ûvwa muprofeta mulelela wa Dìyì. Ne kabingila kaakavwidilaye mu ciine cimenga eci, mbwalu Dìyì divwa dilwe kudiye.

⁷⁵ Nenku padi Dìyì dya Mukalenge dilwa kudi musadidi mulelela, udi ne cya kuya, nansha maalu amweka mushindu kaayi, anyi nansha ntatu miikaleku ya bishi. Ûdi ne cya kuya, nansha bya munyi. Nansha byôbì ne mmudilongolole, nansha ne mmudyŭmwè mwa kuya, nansha yêyè muswe kuya, anyi nansha nî ncinyi cikwabo; ùdi ne cya kuya, nansha bya munyi. Nzambi ngudi wakula, ne budiye naabu mbwa kutwala Mukenji ewu. Bwalu, bidi. . . Kêna uya bwa dikutakana nansha. Kêna uya bwa mfranga nansha. Kêna uya bwa dimanyika nansha. Ûdi uya anu mu Dînà dya Mukalenge, bwa cintu cimwepele. Yêyè mmupete mu—mudimu wa diya kenza, ne mmutumiiibwe kudi Mukalenge. Ne yêyè udi Dìyì dya Nzambi, bwalu mmwambule Dìyì dya Mukalenge. Ki muprofeta mulelela wa Nzambi nyêyè awu.

Cyena-bwalu cyanyi cidi ne: *Ngenzèlù Wa Maalu Wa Mupròfeta Mulelèlè Wa Nzambi.*

⁷⁶ Muntu wa Nzambi munene ne udi kayi bwôwà ewu, wàkamba ciprofeta mu matuku a Yelobama mwibidi. Ndi ne citupa cya maalu malonda ende mafunda kaaba aka kumpala kwanyi eku. Wakàmba ciprofeta munda mwa bidimu bitwe ku dikumi ne bisatu bya kampanye kende. Ne Yelobama, uvwa n'Yelobama mwibidi, ùvwa anu umwe wa ku bantu ba

batambe kwikala ba meeji matwe ne bakumbane bavwaku Izaleela mupete munda mwa cikondo kampanda. Ûvwa mmuntu wâkatwâla ditanta mu Izaleela. Izaleela uvwa munkaci mwa disonga nkela emu ne mwamwa. Kadi, yêyê, kuvwa cintu kampanda cipampalamuke mu yêyê. Ûvwa mukuukwidi wa mpingu.

⁷⁷ Nenku mêmè mwikàle mbala ciine eci, dituku dikwabo, mêmè kudyambidila mu mushindu kampanda ne eci kaayi ncikumbanangane anu menemene ne leelu ewu. Muntu nansha yêyê mwikàle ne meeji matwe a bishi, nansha bidiye mwa kwenza biikàle binganyi, ne nansha mu ditanta dya bishi, yêyê mudidinge anu museesuke muye kule ne Nzambi, ùdi ndibanza dyela ditunga, museesuke muye kule ne Nzambi ne kule ne Dîyî Dyende. Ndi ndikonka ní kî ncitukumbeene twêtù aba, leelu ewu, bwa muntu kampanda udi munange kumweneka ku télévîsion kadi kuleejangana mudiye ne meeji matwe, mudiye muntu wa meeji matwe. Kadi ntu ndikonka ní udi naawu makumbane yêyê mwine awu bwa kwangata EMU MMUDI MUKALENGE WAMBA's. Yêyê uvwa muntu wa meeji matwe, mbîmpè.

⁷⁸ Izaleela uvwa mu ngiikadilu wa mutwe cîmpingà. Bayiishi bende, baakwidi bende, kabidi ne bukalenge bwende, bikaavwa byônsò bilekele Dîyî dya Mukalenge. Mpindyewu, kabavwa bôbò biitabuuja aci to. Bavwa biitabuuja ne bavwa ne Dîyî dya Mukalenge. “Kadi kudi njila udi umweka bu mululame kudi muntu, kadi ndekeelu wende nnjila wa lufu.” Bavwa mu ntupakanyi bwa cinyi? Bwa cinyi budi muntu mufwanyine kwitabuuja ne—ne—ne bavwa mu ntupakanyi? Bwakwidi bujima bwa bantu, binunu bya bayiishi ne baakwidi, ne bamfumu ne banguvena, bônsò bàvwà balaka mukana bamba muvwabo bakuukwidi ba Nzambi abu, kadi, nansha nanku, bônsò abu biikàle mu ntupakanyi.

⁷⁹ Nanku, civwà cibàkèngelà kacivwa mmfumu bwa ditanta to. Civwà cibàkèngelà mmuprofeta, bwalu Dîyî dya Mukalenge, anyi dyumvwija dya Dîyî dya Mukalenge, didi dilwa kudi muprofeta mulelela. Misangu mikwabo nudi mwa kumona cidi wende ngenzèlu wa maalu pa dîbà adi. Ngenzèlu wa maalu muumakane, padi baakwidi bônsò, ne bayiishi bônsò, ne—ne—ne beena mbuku bônsò, ne—ne bukalenge bwôbò bwine anu bimulwisha yêyê. Kadi, nansha nanku, Dîyî dya Mukalenge ditu dilwa kudi muprofeta, ne anu kudiye yêyê nkaayende. Yêyê ngudi ne Dîyî dya cya bushuwa. Nansha muvwabi ne yêyê uvwa ne Bible umweumwe uvwabo paabo nende awu, kadi Dîyî divwa dilwa kudiye yêyê. Nzambi uvwa ushindika ne yêyê nguvwa ne Dîyî.

⁸⁰ Bavwa ne nzubu ya mitambe bunene ne ndongolwelu ya ntendeleelu, ne bikwabo, bitambe bikaavwabo naabi kacya kwônsò aku, byoshelu biibaka myaba yônsò, ne—ne bintu bya—

bya mishindu yônsò, kadi nansha nanku bavwa mu ntanta wa mùliyò mujima wa kilomeeta ne Dìyì dya Nzambi.

⁸¹ Ndi ngeela meeji, mêmè mwine ne, cimfwanyi eci ncifwanyine kukumbeena bimpè menemene leelu ewu, pândi mubale Mukanda wa Amosa ewu. Nudi ne cya kuwubala panwikala baalukile mu mènù. Bukalenge bwônsò, baakwidi, bwônsò bwabo bakaavwa balekele Dìyì dya Nzambi.

⁸² Ndi njinga kubala anu citupa cikwabo cya Mufundu mwaba ewu, cîndi naaci, bwa kuleeja ne mmwaba kaayi wakacyenzelabo. Mpindyewu tubalaayaaku nshapita mwi² ku mvensa mwi⁴, bwa katanci kakese cyanaana.

Emu mmudi MUKALENGE wamba: Bwa dishipa dya mikenji pasatu dya Yuda, ne bwa dyôdi adi panaayi, mêmè ncyakukudimunaku dinyooka dyende nansha; bwalu mbapeetule mikenji ya MUKALENGE, . . .

⁸³ Mbwena kwamba ne Dìyì, baDipeetule, kadi paabo's bavwa beela meeji ne bavwa naaDi.

. . .ne kî mbalame mêyì aanyi to, ne mashimi abo mmabafikishe ku dyenza ntupakanyi, . . .

⁸⁴ Mpindyewu, bavwa ne Dìyì, Bible, kadi mashimi avwabo basakidileKu akaavwa mabafikishe ku ntupakanyi.

. . .paanyjima paa . . .mudi baatatwâbò bendele:

⁸⁵ Nudi numona kabingila anyi? Mpindyewu, bavwa ne ntupakanyi bwalu bakaavwa beele yabo nkudimwinu anyi ngumvwijilu ku Dìyì. Nenku mêmè mvwa ndyambidila ne mbikumbeene leelu ewu, bu mudi bààbûngì biikàle bajinga kwikala kusakidila yabo mmwenenu ku Dìyì, nenku twètù tubwela mu cimvundu. Ditandisha kaayipu dya kudi Nzambi, divwa naadi muprofeta ewu's we.

⁸⁶ Mpindyewu, Amosa uvwa muprofeta wa Nzambi, muprofeta mulelela. Muntu kanayônsò utukù ubala maalu adi atangila Amosa mmumanye bukutu bwa muntu wa Nzambi wa kayi bwôwà awu. Ûtu ubadiibwa bu umwe wa ku baprofeta baa twânâtwânâ, bwalu kaakashaala ntanta mule menemene to, kadi wâkatèèka bulelela cisuuyi ku muji wa mucu. Ûvwa umwe wa ku baprofeta bavwa menemene kabayiku ne bwôwà to, kabidi yêyè wakalwa ne dilaabiibwa. Wâkalwa ne EMU MMUDI MUKALENGE WAMBA. Ûvwa mumanye bivwaye wamba, bwalu dilaabiibwa dya Nzambi divwa pambidi pende bwa kubatwadila dyumvwija dilelela dya Dìyì dya Nzambi.

⁸⁷ Amosa wakafumina ku musoko, ku cipeela, kulwa mu cimenga cya dibàlakana. Kacya kavwaku mwanji kwikalamu kwônsò aku to. Ûvwa nsongaalume wa ku musoko, mwamwa mundekeelu mwa cipeela. Pavwaye kwine aku munkaci mwa kusambila, Nzambi uvwa mutwilangane nende, ne mumwambile bwa lwonji lwa diine ditunga dya dibàlakana edi muvwaye pende

umwe wabo. Nenku Samaaleya nguvwa cimenga-cikulu, cimwe cya ku bimenga-bikulu bya mwine musangu awu, ciine aci mu bukookeshi bwa Yelobama.

⁸⁸ Nenku paakiimanaye mwaba awu mu dinda adi, ku lusongo lwa kakuna aku, wenda muvwale bilàmbà byende bya bikulakaje, bya bupwekele, bya cyena musoko abi, pàmwápa mwikàle ne lupwishi ne bitoci ku makàsà, bya kùvwáye mulaale mu bivwalu abi bya mbondya, bufuku ne bufuku bwònsò. Kadi ncyèna mumanye to, kakuvwa byowedi bya màyi a ku milonda mu miine matuku awu to. Kuvwa kufwanyine kwikala kupite ndambu wa matuku kacya yèyè wowa miine màyi awu. Kadi aci kacitu cyenzela munda mwa muntu bibi to. Mushinga mupitepite búngi, leelu ewu, bawufila ku bya pambelu, kabayiku bawufila munda mu mushindu mukumbane to. Tudi tutamba kuditacisha bwa mushindu wa kwowa màyi dituku dyònsò, ne nsuki misukula ne buloosu, ne kushintulula kwa bilàmbà, ne bikwabo byònsò, kadi pashiishe tulekela munda mushaala mushindu wònsò washaalamu awu, tuvuala tuvwalulula bilàmbà bimwebimwe bya mpekaatu abi, binunkisha musuuka ne mupuuya mubole wa twitabaayi ne bilele biswika abi, katuyiku tuwukenketa ne tuwusukula mu Diyì dya màyi a ditapulula, kuumuka ku maalu a pa buloba.

⁸⁹ Pavwaye mwimane mu diine dinda adi, utangidila kuulu kwa kakuna aku, pa ciine cimenga cya dibàlakana aci, cyùle tente ne bintu bya cyena leelu bivwaye kacya kayi mwanji kulootaku ne kuvwa cintu bu nanku to. Izaleela uvwa mu butumbuke bwende. Ùkaavwa mwenze bipungidi ne matunga ònsò avwa mamunyungulukile awu. Dibàlakana dya menemene, bakaji ne mvwadilu wa dikema, ne ba—ne balume. Nenku bavwa banange bisankasanka bamba kufwa, manayi a dinyeema dya mbilu ya dipiiyangana, ne manayi a bukwàmanàyi ònsò, ne byònsò bivwa byènzekà abi. Kabivwa bikemesha to pavwa twìsù twende tushaale tukese; kabiyi bwa dibàlakana dya cimenga adi to, mùdi mwena lwendu kampanda lwa dibandila dya myaba mufwanyine kwenza, padiye ubwela mu New York, anyi mu Los Angeles, padiye umona bakaji badi bavwale bu badi kabayi bavwale abu, balume bàdi benza maalu a lukutukutu abu, ne mpekaatu.

⁹⁰ Bamwe baa ku balunda baanyi, kukaadi matuku, bavwa bafumina ku lwendu lwa diloba, anu mwinshi mwa cilongelu cya tulaasa tutumbuke kampanda twa Bible, cilongelu cya tulaasa tunene tutumbuke twa Bible cidi cyende luumu aci. Ki mwaba awu, balaadile panshi mu njila amu, mu bisoosa amu, muvwu nsongaakaji ya bitende, miwvwa bu yidi kayiyi miwvwa, ne nsongaalume, pàmwápa balongi baa mu ciine cilongelu cya tulaasa tutumbuke aci, banwa maala ne benza bintu bya lukutukutu, byenza ne bwòwà.

⁹¹ Mpindyewu, bintu bya lukutukutu bu nanku's bitu bisalula nyoota ya beena Amerike bààbúngì batu badyamba mudibo beena Kilisto abu. Padibo bapwekesha mèsù batangila Los Angeles, anyi mèmè nkaadi mubamwene mu ndeke patukaavwa tubwela mu Los Angeles; kacya kabavwaku banji kumùfika kwònsò aku to; anyi mu Hollywood, anyi—anyi mu Floride ne makênkè abo ònsò a néon awu kuulu kwa ma—mabwè a ngaji aku. Kaa, s' Bavwa mwa kulaabulula mpuutùlù pa maùlù abo apu, ne kulongolola bilaabu bya kwìsù. Bavwa badyelela meeji ne ki cintu civwa citambe kwikala cya cibàlakana cya kacypu baamona. Ne pa kumona bantu basukule nsuki yabo ne maloosu ne bavwale bilenga abu, benda benda mu misèèsù, bavwa bajinga kupatuka mwaba awu bwa kumona muvwabo paabo mwa kuvwala tulàmbà twabo twa tubalamate pambidi atu, anyi benda bajeekeja nyima mu misèèsù. Piine apu, biikàle badyambidila ne aci ncintu cilenga cya dikema's.

⁹² Kadi twìsù tulaaba maanyi kudi Nzambi twa muprofeta awu atu katwakashaala tukesee bwalu bwa dibàlakana adi to, mùvwà bamwe baa ku beena lwendu lwa dibandila dya myaba abu, kadi civwa mbwa dinyanguka dya maalu a nsòmbelu, kudi cisamba civwa cibiikidiibwe bwa kubeneshiibwaci kudi Nzambi. Ende mèsù kaàvwa atangila ku dibàlakana adi to. Kaàvwa ashaala makesee bwa bwalu bwa dibàlakana adi to. Civwa mbwa bu—bu—busenji ne dinyanguka dya cisamba civwa cibiikidiibwe bwa kwikalaci cisungudiibwe kudi Nzambi, kadi cifwanyine kwenza maalu mu mushindu bu nanku. Kabyena bikemesha to, paakambaye ne: “Ntambwe udi ukungula, wabenga kukwacika bwòwà nganyi? Nzambi mmwakule, udi mwa kubenga kwamba ciprofeta nganyi?”

⁹³ Wakamona dinyanguka, kanyawu. Ku cyòcì aci ki kuvwaye yèyè mutangile. Pa dìbà adi mpaakamonaye byònsò abi. Kabyakakokaku ntema yende to. Byakamusaamisha mu musuuka wende. Bwa cinyi? Úvwa muprofeta. Úvwa mumanye civwa Nzambi mulaye bwa kubenesha, ne civwa dibenesha diine, ne mushindu udi bantu benza ne diine dibenesha adi. Ne dyabulu ukaadi munyangakaje maalu mu dituku dyende yèyè, kuumuka ku civwà dibenesha dya cya bushuwa, kuya ku kanyawu kaa mu maalu a—a—a nsòmbelu; dibenesha dya kusalula naadi mèsù ne nyoota ya bantu badi kabayi bakudimune mucima, ku diswa ne ngenzelu wa maalu wa Nzambi, ne mushindu wa nsòmbelu wa Nzambi.

⁹⁴ Mushindu mwine udibi byòbì abi menemene leelu ewu's we! Mushindu ùkaadi bayiishi mwa kwimana mu cyambilu, batangila mpekaatu ne dinyanguka dya buloba ebu, bamona bantu benza bidibo benza abi ne baditwala mudibo benza amu, ne pasiishe kubabenesha anu mwine ne bwalu ncidimba cya ekeleeziya, anyi cya dingumba, abi's mbipite ne bidi wanyi musuuka mwa kuumvwa's.

⁹⁵ Padi Nzambi wakula, amba ciprofeta! Nyuma wa Nzambi Yêyè anu mulenge muprofeta mulelela wa Nzambi, yêyè's neêlè lubila ne Dîyî. Ncyêna muswe kudyula to, kadi washaala mupuwe ki nganyi? Nganyi washaala bwa kwikala mwimane mutangile cintu bu nanku, kadi kwamba mudiye musadidi wa Kilisto, kadi kubenga kucitandisha patooke? Cìdì dingumba kampanda difwanyine kwamba nansha ciikàle cinyi, anyi cìdì ekeleeziya kana yônsò mufwanyine kwamba; s'ki bwa cinyi mêmè ncyêna mwena byôbi abi to. Mbafwanyine kukwipata, anu ku ntwadijilu aku. Kadi Dîyî dya Nzambi ndidi dilwa pa mwaba wa kumpala. Wêwè mwikàle musanjeela, udi ne cintu kampanda cya kwamba. Wêwè wamba cintu cibegangana ne Dîyî edi, kwêna musanjeela wa kudi Nzambi to; udi musanjeela wa cipungidi cya dingumba kampanda anyi wa dilongesha kampanda dikwatakaja. Kadi musanjeela wa Nzambi udi yêyè ne Dîyî dya Nzambi.

⁹⁶ Kadi mulunda wetu ewu, mu dinda emu, patwamujoji, ùvwa ne Dîyî dya Nzambi, bwalu ùvwa muprofeta mulelela wa Mukalenge.

⁹⁷ Mpindyewu, bôbò bavwa badyambidila muvwabo ne—ne dyumvwija dyaci, badyelela meeji ne: “Ee, cya bushuwa's, monaayi bitudi twenza.”

⁹⁸ Mpindyewu, bwalu bùdîku budi ne, twâmusangànyî mwimanyine ku lusongo lwa kakuna kwaka mu dinda emu, utangidila pa bule, mèsù mapwekesha pa cimenga aci. Ùkùpa mutu, utangila; twísù twende twenda tushaala tukesee. Wàngata diboko dya muteelu udikupula naadi cisuululu mu mpala, ne lupwishi. Muunya mukole umwosha mu mutu wa dibàla awu. Mwedi wende awu kacya walembelela; mwikàle uwukupula ne byanza byende. Kavwa yêyè mumone dibàlakana adi to. Ùvwa mumone mpekaatu. Ki uvwa kayi umusankishaku awu. Ùvwa umupa ciiji.

⁹⁹ Bwa cinyi kayiku mufwanyine kwamba ne: “Mêmè, mwena Izaleela, mona mudi ditunga dyanyi ditante”? Mmuni muvwaye mufwanyine kwamba ciine aci pende mwikàle muprofeta mulelela wa Nzambi, mumanye bipeta, ne civwà cintu bu nanku mwa kulwa kushaala?

¹⁰⁰ Tumwimanyikaayibi pa kakuna kampanda leelu wa Ndaaya ewu kadi atangije mèsù mu cibandabanda. Atangije mèsù mu Jeffersonville, kudi bantu badi badyamba mudibo beena Kilisto aba. Akebebi bwa kumona myaba yônsò mu Amerike bantu badi bamba mudibo beena Kilisto abu. Twísù twende tulaaba maanyi kudi Nzambi atu's ntufwanyine cyakabidi kushaala tukesee. Byanza byende byakazawuka mu mwedi wende awu. Bwa cinyi? Yêyè kêna umona dibàlakana ne ditanta bidi baa pa buloba bamona bôbò abi to. Yêyè udi umona di—diseemena kule ne Nzambi. Yêyè udi umona kanyawu kaa mu maalu a

nsòmbelu wa bantu. Yèyè udi umona ditwa dya cìmpingà dya ditunga. Yèyè udi umona dibola mu ekeleeziya. Mmunyi mudiye mufwanyine kwenza cìngà cintu piikalaci kaciya dishaala dya ne twisù tukese, ne dijinga dya kubwelamu, bwa kumonaye mwa kubizaaza kadi kubishiya anu tupese tupese?

¹⁰¹ Ambaayibi tǔng bu ne mwepiskopo kampanda uvwa mutwilangane nende pa kakuna apu, kadi kwambaye ne: “Mpindyewu, wèwè ki mwine muprofeta wa Mukalenge awu anyi? Mpindyewu, twètù mbààkwambilà byùdì mwa kwamba ne byùdì kuyi mwa kwamba”? Nudi nwelaku peenu meeji ne ùvwa mwa kwikala muteeleje? Kadi bu bôbò mwa kwikala bambe ne: “Lwâku ushaale wa mu bulongolodi bwetu mpindyewu, nenku netukukwacishe mu kampanye keebe aku”? Nudi nwelaku meeji ne ùvwa mwa kwikala muteeleje? To, mêmè ncyênàku mufwanyine kudifwanyikijila aci to, bwa muntu bu yèyè awu. To.

¹⁰² Yèyè uvwa mutumiibwe kudi Nzambi. Kabivwa bikengela bwa kwikalaye ne dimwela dyabo dya mu diboko to. Yèyè uvwa ne Dìyì dya Nzambi, dilaabiibwa dya kudi Nzambi, cikondo cikosa cya Nzambi. Ùvwa ulwa mwikàle mu EMU MMUDI MUKALENGÈ WAMBA. Uh-huh. Ki muprofeta mulelela nyèyè awu. Mushindu awu ki udiye yèyè wenza lwendu. Katu yèyè wenza lwendu ne cìngà cintu to anu ne EMU MMUDI MUKALENGÈ WAMBA.

¹⁰³ Cimenga cya dibàlakana cya Samaaleya eci, ewu Izaleela muditu wa ménà, mulonge tulaasa tutumbuke ewu, bayiishi ne baakwidi baa ngiikadilu ya kapelu aba, bavwaku bafwanyine kwakidila muntu ewu, mukese ne kayi mumanyike ewu anyi? Pàmwāpa mwakulu wende uvwa mushaadile be. Mufumine mu famiye wa bapele mu cipeela. Muumuke kwabo kumbelu, mubiikidiibwe kudi Nzambi, muye mu cipeela bwa kulonga Nzambi ne Dìyì Dyende, ne mushaale muprofeta. Mukalenge ngwàkenza ne yèyè alediibwe mushindu awu.

¹⁰⁴ Baprofeta batu balediibwe, musanjeela wa cikondo, udi Nzambi, ku didyanjila kumanya, ùmanya cikondo aci ne ùtèèka cyamu Cyende cya mudimu mwômò amu bwa kutandisha mpekaatu patooke.

¹⁰⁵ Cimenga cya dibàlakana aci civwaku cifwanyine kumwakidila anyi? Nudiku peenu nwela meeji ne bakaji abu bavwa bafwanyine kwikala bateye ntema ku bivwaye wamba anyi? Nudiku peenu nwela meeji ne baakwidi abu bavwa bafwanyine kwikala bamuteeleje anyi? Mona’s, to, mukalenge. Yèyè kavwa ne mukanda wa dyakidiibwa naawu nansha umwe, wa kudi bulongolodi kampanda to. Kavwaku mufwanyine kwamba, ne, “Bafaalesa mbadi bantume” to. Kavwa nansha mufwanyine kwamba ne Basadoka mbavwa bamutume to. Kavwa wenda mwambule mikanda ya dijaadikiibwa naayi to.

Kavwa ne karta kaa buumambala kaa kudi cisumbu kampanda cya bantu to. Kavwa ne mumudyanjididi nansha umwe bwa kulongolola kampanye kende to. Kakuvwaku Bafaalesa bônso badisange benze cisangilu cya badyènzè cimuku ne—ne didya dya mu dinda dya kasumbu kaa bambi, ne bateeke bintu byônso kaaba kamwe, bwa kumulongolwela kampanye, ne biikàle bamanye ne ki yèyè ulwâlwa awu to. Kavwa mumanyike kudibo to. Kavwaku ne karta kaa buumambala to. Kavwaku ne mikanda ya dijaadikiibwa naayi to. Kavwa ne mukanda wa dyakidiibwa naawu wa kudi bantu to.

¹⁰⁶ Kadi yèyè uvwa ne EMU MMUDI MUKALENGE WAMBA. Ki ngenzèlu wa maalu wa muprofeta mulelela nyèyè awu. Úvwa ne EMU MMUDI MUKALENGE WAMBA. Piikalabi ne úvwa ne EMU MMUDI MUKALENGE WAMBA, aci's ncishiilangane bikole menemene ne màyelè etu twètù adi makwatakaja kudi bantu aa. Ki cyônso civwa cimukengela. Bu ne wàkalwa ewu mushindu, wàkalwa mu dînà dya ekeleeziya kampanda. Piikalabi ne wakalwa ufumina ku Ewu njila, wàkalwa mu Dînà dya Mukalenge. Pa nanku, muprofeta mulelela utu ulwa misangu yônso anu mwikàle ulonda njila wa Dînà dya Mukalenge. Misangu yônso, utu ulwa anu mu Dînà dya Mukalenge.

¹⁰⁷ Mpindyewu, yèyè kavwa mwa kuleejaku twarta twa buumambala nansha, kadi yèyè—yèyè uvwa ne Dîyì dya Nzambi. Ne ki civwa Nzambi mutumine bantu ncyôci aci. Mpindyewu, bantu mbàkaavwà bôbò badyènzèle malongolodi. Bavwa ne tusumbu tushiileshiilangane twa dikosololangana naatu, kadi atu ntuvwa bantu benze. Kadi Amosa kavwa yèyè ne abi to. Úvwa yèyè anu ne EMU MMUDI MUKALENGE WAMBA. Ki civwaye yèyè naaci aci.

¹⁰⁸ Ndi mwa kudifwanyikijila baakwidi abu, mu dinda kampanda, biikàle mu dinda kampanda dya nsabatu, benza kaadisambila kakese, ne bikwabo, tuumasangisha tukese twa dilambula bintu kudi Nzambi, nenku—nenku baalukila. Nenku biikàle bamba ndambu wa maalu pa bidi bitangila Mòsà munene awu, wa bwena wàkadikù ne mwoyi mu dituku kampanda awu, ne kampanda munene mukwabo wàkadikù mu dituku kansanga awu. “Kadi, kaa, matuku a bya nanku's akaadi mapite bwa mpindyewu. Nwènù nudi bamanyè mfumwetu wa ditunga mupyamupya, bukalenge bwetu bupyabupya ne byônso bitudi naabi ebi,” ne kwakula pa bintu ndambu bya mushindu awu kadi kwalukila mu mààbò.

¹⁰⁹ Kadi ki muntu ulwâlwa ewu udi yèyè kayi ucyuka biine abi to. Kulwaye ne EMU MMUDI MUKALENGE WAMBA. Nwamonu anyi? Ki ngenzèlu wa maalu wa muprofeta nyèyè awu. Kabiyi bya dyediibwa dya mu diboko abi to, yèyè uvwa mumanye anu civwa cimwindile, mumanye ne byônso bivwa mwa kumulwisha, mumanye ne bôbò bavwa mwa kumubenga,

bavwa mwa kumudyombola. Kadi yêyè uvwa ulwa mu Dîna dya Mukalenge.

¹¹⁰ Yesu uvwa mumanye ne Kalvariyo kavwa kaMwindile, kadi Wâkalwa mu Dîna dya Mukalenge. Nwamonu anyi? Ki ngenzelu wa maalu wa muprofeta mulelela nyêyè awu.

¹¹¹ Úvwa ne Dìyì dya Mukalenge bwa ditunga adi. Kadi Dìyì dilelela dya Mukalenge divwa dyenyi kudi bantu abu. Nansha nanku, bavwa bôbò badyambidila muvwabo naaDi. Ndi ntekemena ne eci cidipweka ne mu ndondo. Bavwa badyelela meeji muvwabo baa difwana dya Nzambi ne batendeleedi baa menemene, mu mushindu wa ne Dìyì dilelela dya Mukalenge dikaavwa dyenyi kudibo.

¹¹² Mushindu awu ngudibi leelu ewu. Dìyì dilelela dya Nzambi dimweneshiibwe didi cintu cyenyi kudi beena Mpenta bààbûngì. Dyumvwija dilelela dya Dìyì, makenga malelela, ne milawu, mabenesha malelela a Nzambi adi cintu cyenyi kudi baabûngì badi badibiikila ne mbeena cijila abu, bidimba bya ekeleeziya, beena Kilisto. Ncintu cyenyi kudibo. Kì mbacimanye to. UbateeleleCi. “Kacyakacya katûtukù banji kuumvwaku cintu cya mushindu awu to.” Kadi, nansha nanku, malongolodi abo adi anu enda adyunda ne atanta, enda adyunda anu kudyunda ne bidimba dibà dyônsò, ne malongolodi makwabo àbûngì asakidiibwa ku cidimu ne ku cidimu cyônsò eku.

¹¹³ Bavwa badyambidila ne cyônsò cìvwà mwa kulwa kudibo bivwa bikengela cipatukile mu tusumbu twabo twa dikosololangana naatu atu. Ncya bushuwa ne kabavwa mwa kumwakidila to. Nansha leelu ewu kabavwa mwa kucyenzaku to. Bakaavwa bapwe ne mwoyi ntanta mule, ne: “Ku mabwe aa Nzambi uvwa ne bukole bwa kajuudila Nzambi baprofeta balelela.” Nzambi udi ne bukole, ku bantu baa mu meetu. Yêyè udi ne bukole bwa kajuula, ku mabwe aa, bantu bìikalà mwa kutwa Dìyì Dyende nyama ku mikolo, ne kwamba ciprofeta mu Dîna Dyende, Bulelela abu. “Kuteeka cisuuyi ku muji wa mucì.” Kulekela bipàtù bikamacilè kwônsò kwâkamacilàbi aku. Dimwela dya mu diboko anyi dibenga kumwela dya mu diboko kayi mwa kubicyukaku to. Kadi ki ngenzelu wa maalu wa muprofeta mulelela nyêyè awu.

¹¹⁴ Bamwe bantu batu beela meeji ne maalu mmapeepele bwende yêyè. Bôbò kì mbamanye cidibo bamba aci to. Yêyè kabaakalwa nende mu cimenga mwambula mu ditempu, musòmbe pa tubalu twîmpè, tuswikila nkanu, tulema màlendà, ne baakwidi banene biimane mwaba awu, bavwale bifulu binene bya ntondo mileemile ku mitu, bamwinamina ne: “Wa kuneemekiibwa Docteur *Kampanda* nya’ wiya” to. Aci’s ncifwanyine kwikala ndongolwelu kampanda wa cyena bulongolodi.

115 Bu pààkalwà Mfumu wabo bônso awu, Yèyè kulwa, bu, muvwile mu cikumbi mu cikumbi, cikumbi cya ngombe. Yèyè kaakalwaku ne ngoma ne byondo ne butumbi to, kadi Wàkalwa mu didipwekesha dya Mwânà mulelela mu cikumbi. Amosa kaakalwa. . . Dîyi dya Mukalenge; bwalu yèyè *uvwa* Dîyi dya Mukalenge. Dîyi dya Nzambi kana dyônso, kî mmuntu awu to; n’Nzambi.

Yesu wàkamba ne: “Kî m’Mémè udi wenza byenzedi to.”

Bòbò ne: “Wèwè udi Muntu, uDivwija Nzambi.”

116 Yèyè ne: “Nenku piikalabi ne Ncyèna ngenza byenzedi bya Nzambi to, kanuNgiitabuui to. Kadi piikalà byenzedi byakula byòbì biine, itabuujayi byenzedi, panwikala kanuyi baswe kungiitabuujà Mémè.”

117 Amosa uvwa Dîyi dya Nzambi dyenda dipweka ne njila. Wakabwelamu, ne bupwekele bwônso, kabiya mu mishindu ya baa pa buloba to. Yèyè wakalwa mu bukole bwa Nyuma.

118 Mushindu awu ki udi Dîyi dya Nzambi dilwa. Kabiya mu twitabaayi wa cyena bulongolodi to, kabiya mu cintu kampanda ciwijiibwe cilumaacikàji mu cyambilu to; kadi Didi dilwa mu bukole bwa Nyuma, bwa kumwenesha Nzambi kudi ditunga ne kudi cisamba. Ndishiilangana’s. Dishiiilangana bunene kaayipu’s we!

119 Mpindyewu, eci civwa cifikisha ku dyumvwa ne, bòbò bakaavwa bapwe mwoyi kukaavwa ntanta mule ne, ku mabwe aa Nzambi udi ne bukole bwa kajuula baprofeta balelela. Bòbò kabavwa ne. . . Kabivwa bikengela bwa bulongolodi bwabo kajuulabu muprofeta mulelela to, bwalu pàmwàpa kabuvwa mwa kumujuula mene to. Bwalu, bu byòbì mwa kwenzeka nanku, s’civwa cifwanyine kwikala muprofeta wa cyena bulongolodi.

120 Kadi, Nzambi nguṭu ujuula’s! Nzambi utu wangata cidiYe muswe kwangata aci. Utu wangata cintu cyanaana, pa ciibidilu, bwa kwenza mudimu Wende; cidi cileeja ne Aci n’Nzambi. Muntu yèyè mûle tente ne maditambishi, wela meeji ne udi cintu kampanda, dîbà adi Nzambi kèna mwa kukwata nende mudimu to, bwalu kudi bya mu yèyè bipitepita búngi.

121 Ki lutatu ludi kudi ekeleeziya wa beena Kilisto leelu ewu ndwòlò alu. Badi beela meeji ne mbamanye cintu kampanda. Bible udi wamba ne: “Padi muntu udyelela meeji ne mmumanye cintu kampanda, kî mmumanye cintu nansha cimwe civwa cikengela yèyè kwikala mumanye aci to.” Lutatu lùdiku leelu ewu, tudi ne bya mu twètù byàbúngi be, lubombo lwàbúngi, tulaasa tulonga twàbúngi, ntendeleelu wabúngi, kadi katuyi ne citudi bamanye nansha cimwe pa bidi bitangila lupandu lwa ku Dîyi dya Nzambi to. Ki luseke ludi lwenza luse pa bwalu abu ndwòlò alu. Eyowa’s.

122 Bôbò bakaavwa bapwe mwoyi, ne, “Ku mabwe aa Nzambi uvwa ne bukole bwa kujuudila Abraham bânà, anyi bwa kujuula baprofeta balelela baa Dìyì.”

123 Kabyena bikengela bwa kupatukilabo mu cilongelu kampanda to. Nzambi ngudi ubapa dyabo dilonga. Kabyena bikengela bwa kwikalabo ne mapolome anaayi a tulaasa tutumbuke to. Kabyena bikengela bwa kwikalabo ne dipolome dyabo dya Licencié, ne—ne Dipolome dyabo dya Docteur, ne bikwabo to. Kabyena bikengela bwa kwikalabo ne byôbì abi to. Nzambi udi wangata cyônsò cidiYe muswe kwangata aci, uteekamu Dìyì Dyende. Ùdi ucyenza bishi? Ùdi uCimwenesha ne uCijaadika.

124 Kabavwa mwa kwamba ne Yesu vwa mupatukile mu seminere kaayi to. Kavwa nende to. “M’Mupatukile mu cilongelu kaayi’s Yêyè?” Kavwa naaci to. Kadi Yêyè uvwa ne cinyi? Ùvwa ne Nzambi, ne Ùvwa Dìyì. Kabavwaku mwa kufunkuna cilongelu kampanda to.

125 Nenu Nzambi kacya kavwaku mwanji kujuudila muntu mu cilongelu kampanda to. Balaayi nubalulule maalu malonda nujandulebi kùkaadiYeku mucyènzè. Katu ucyenza to. Yêyè utu wangata cintu kampanda cifumine mu mwaba kampanda wa cyanaana, mùdì kamuyiku cintu nansha cimwe amu, kakuyiku ditekemena bwa ciine aci to. Pashiishe Ùdi utwala aci ne uteekamu Dìyì Dyende, ne udimwenesha Yêyè mwine. Ki cyôci aci civwaYe wenza mwaba ewu mu Amosa. Eyo.

126 Mpindyewu, Dìyì dya Amosa dyakashindikiibwa kudi Nzambi, mu dituku adi, mu matuku abo bôbò. Mushindik- . . . Nzambi wakashindika Dìyì dya Amosa ne divwa, ne yêyè uvwa, uvwa ne Dìyì dya Mukalenge.

127 Ne bu yêyè mwa kulwa kutudi twêtù, mpindyewu ewu, nudi nwela meeji ne ditunga dyetu edi ne cisamba cyetu mbifwanyine kwakidila muntu bu nanku? [Disangisha didi dyamba ne: “To.”—Muf.] Nudi nwela meeji ne ba-Baptistes mbafwanyine kwakidila Amosa? [“To.”] Ba-Méthodistes? [“To.”] Ba-Presbytériens? [“To.”] Beena Mpenta? [“To.”] Beena Katolike? [“To.”] To, mukalenge. To. Ncyá bushuwa ne kî mmufwanyine kwakidiibwa to.

128 Twêtù, bwa katanci kakese cyanaana, twânjààyibi kumwambula tulwe nende muneemu emu, bwa katanci kakese cyanaana, bwa tujandule ne mbafwanyine kumwakidila anyi anyi kî mbafwanyine kumwakidila. Twânjààyibi kumona nî mmufwanyine. . . ní ekeleeziya yetu mmifwanyine kumwakidila leelu ewu anyi kî mmifwanyine kumwakidila.

129 Cintu cya kumpalampala cidiye mufwanyine kwenza, mmufwanyine kuubenga kupetangana ne bulongolodi bwônsò, bwalu mbubengangane ne Dìyì. Um-hum, uh-huh, eyowa’s, mukalenge. Yêyè’s mmufwanyine kupiisha ndongolwelu wetu

yônsò mu kaabujima kende. S'ncyá bushuwa. Dilongesha ne dilongesha dyônsò, twitabaayi ne twitabaayi yônsò, dingumba ne dingumba dyônsò, yêyè mmufwanyine kupiisha cintu cyônsò mu kaabujima.

Mêmè ndi anu ndifwanyikijila ne, ndi mwa kumona bamwe baa ku bakulu baa beena Mpenta aba bamba ne: “Mona’s, butumbi kudi Nzambi’s we! Bu yêyè. . . Mona’s, twêtù katwena baswe kwitaba muntu awu mu cimenga cyetu to.”

¹³⁰ Kadi nudi nwela meeji ne ba-Presbytériens ne ba-Baptistes mbafwanyine kwenza cinyi? “Mona’s, cinyonga aci, katwena bamuswe mu cyetu citupa cya buloba emu to. Kêna cingà cintu to anu muntu wa ci—cimfiikaamunda wetu ewu.” Mbafwanyine ne kwela byâlâ pa dibeji bwa kumwelabo mu buloko, bu bôbò ne mushindu, kumwipata mu misèèsù.

¹³¹ Kadi nudi nwênù nwela meeji ne nudi bafwanyine kumulamamu anyi? Kaa, to. Kanwenaku mwa kwela Dîyi dya Nzambi mu nsanji to. To, to. Nedipatukile anu patooke, nansha bishi. Milonda ya ku biibi bya buloko’s yakakanguka bufuku kampanda, paakateetabo bwa kuDyela mu nsanji. Bukênkè kampanda’s bwakabwelamu e kumupâtula.

¹³² To, yêyè’s—yêyè’s mmufwanyine bushuwa kubenga kupetangana ne ndongolwelu wetu. Eyo. Cidiye mufwanyine kubanga kwenza ncinyi? Kubyupula’s. Bwa cinyi? Yêyè’s mmusadidi wa Nzambi. Mmufwanyine kuya anu buludi ku Cishimikidi kadi kukutula kampanye kende, wâlukilakù buludi, kadi kutuulaku twitabaayi ne twitabaayi yônsò, kadi kwalukila ku Cishimikidi. Cishimikidi ncinyi? Pa Dîyi dya Nzambi. Cya bushuwa. “Maulu ne buloba nebijimine, kadi Méyi Aanyi to.” Pa nanku yêyè mmufwanyine kusunsula dingumba ne dingumba dyônsò, twitabaayi ne twitabaayi yônsò, dilongesha ne dilongesha dyônsò, kubyumushamu, kadi kubiimansha ku luseke, ne mmufwanyine kubituta dikubakuba kadi kubituma mu Cyendeleele.

¹³³ Nudi nwela meeji ne beena Mpenta mbafwanyine kumwakidila anyi? To, mukalenge. Ba-Baptistes? Ba-Presbytériens? To, mukalenge. Ba-Nazaréens? Ba-Pèlerins de la Sainteté? Bôbò’s mbafwanyine kumukina. Cya bushuwa’s. Nudi nwela meeji ne bôbò mbafwanyine kupatuka bwa kuya kasambakeena nende mu kashinyi kaa—kaa limousine bwa kulwa kubwela nende mu cimenga anyi? Bôbò’s mbafwanyine kusambila bwa muunya wamwosha kwine aku. Mbafwanyine kumujikila ne njila, bwa kumulamina pambelu paa cimenga. Mona’s, nkufwanyine kwenzeka masangisha a bambi bûngì cyanaana mu nyungulukilu amu, myaba yônsò mu cimenga amu, anudi kanuyiku banji kumona to kacya baanulela. “Laminaayi muntu wa cimfiikaamunda awu pambelu paa cimenga eci.”

¹³⁴ Kadi, nansha nanku, yêyè's uvwa ne EMU MMUDI MUKALENGE WAMBA. Nwamonu anyi? Ki ngenzeli wa maalu wa muprofeta mulelela nyêyè awu. Mbafwanyine ne kumukisa's. Cya bushuwa. Yêyè mmufwanyine kuya buludi ku Cishimikidi, bwa kende kampanye. Kî mmufwanyine kupangila cintu to. Kî mmufwanyine kwamba ne: "Mpindyewu, ndi nkeba bwa nwênù bônso ba-Méthodistes nulwe mpindyewu bwa kunkwacishaku. Ndi nnukeba nwênù ba-Baptistes. Ndi nnukeba nwênù bônso bantu baa mu nyungulukilu emu. Nwênù bônso beena Mpenta, nudi nwamba munudi cisumbu cya ndekeelu cîkalà Nzambi mwa kubiikila, ndi muswe bwa nulwe bônso kûndi, ne ndi muswe bwa nwênù kutwa kampanye kaanyi aka nyama ku mikolo."

¹³⁵ "Wêwè mwine udi ubatiiza bishi? Cileeeji cya mbangilu cya Nyuma Mwîmpè ncinyi?" Nkonko ayi, nyidibo bafwanyine kumwasa mumpala anu pakalakaa. Kadi paajingaye yêyè kwandamuna ne Bulelela bwa Bible, s'mbafwanyine kumwela làà. Kadi aci's ki ngenzeli wa maalu wa muprofeta mulelela. Ûtu upeta byônso abi bwa kukungamanganaye naabi. Nwamonu anyi? Cya bushuwa.

¹³⁶ Twêtù katwena bafwanyine kumwakidilaku to. To, mukalenge. Dyetu—dyetu... Katwenaku bafwanyine kunanga kende kantu nansha kâmwè to. Katwena bafwanyine kunanga bwa kwikala nansha ne kamwe kaa ku tumpanye twende atu mu cyetu—cyetu citupa cya buloba to. To, nansha kakese. Ee, katwenaku bafwanyine kumwakidila to. To, mukalenge. Kadi yêyè's mmufwanyine kulwa bwa kwaluja Ekeleeziya ku Dîyi, bwalu Dyôdi ki Cishimikidi. "Muntu yêyè mudidinge anu muteeke cikwabo cishimikidi, aci ndunteka. Pa *eci* cishimikidi nkaayaaci, ki padi Nzambi wibakila Ekeleeziya Wende, pa Dilongesha dya bapostolo."

¹³⁷ Bu mûmvwà ngamba dituku adi; muntu kampanda uvwa wakula bwa mpurgatoriyo, uteela bantu bààbûngì bu mudi François Munsantu ne Cecilia Munsantu, ne yêyè ewu mwikàle usambidila bantu kampanda, ubapatwisha mu mpurgatoriyo, ne ufila bukookeshi bwa mushindu awu. Abu bukookeshi's mbwa kabuyi bwa mu Mifundu. Mbantu badi kabayiku ne bukookeshi bwine to. Bapostolo mbavwa ne bukookeshi bwa mu Mifundu. Nenku bwôbù bubengangane ne bwabo bôbô abu, mmashimi, bwanyi mêmè.

¹³⁸ Neya bushuwa ne mêmè ntu ngiitabuuja mpurgatoriyo kampanda, kadi ndi ngiitabuuja ne mmpindyewu mene. Udi ukezula musuuka webe wêwè mwine. *Mpurgatoriyo* mbwena kwamba ne "kukezula." Paudi umona ne udi mwenze cintu kampanda cya cibi, patuka kwaka naka ucisukule ùcyùmùshè munda mwebe, ku ditonda, ne didila dya mwadi, ne dijila dya byakudya, ne disambila.

139 Muntu mukwabo wakanseka mene pààkalwà Mukalenge mwab'ewu anu abidi adi panshi aa ne kumpa cikeena-kumona. Mvwa misangu yònsò anu njinga kumona mushindu wa diswika dya nyoka awu. Mvwa misangu yònsò anu ndikonka mushindu wa kucyenza. Bivwa bikengela mêmè kwela cidya mushindu ewu. Paabi, cyôci aci's ki cîntù anu mujingèjinge, mu nsòmbelu wanyi mujima. Ki mêmè kubanga kujila byakudya ne kusambila. Bangamba ne: "Cyûdi wenzela biine abi ncinyi?"

140 Mêmè ne: "Mwamwa naka, Yèyè wakangambila ne ncivwa ne meeji matooke makumbane to." Paanyima paa Yèyè mumane kulwa, ki mêmè kujinga bwa kudikezula. Kî nkwindila too ne pawafwa, bwa nsaserdose kampanda kukukezulaye to. Kezulaayi misuuka yenu!

141 Kadi, nwamonu's, mbacipatule mu Dîyi dya bukookeshi, kadi kuciteeka mu byanza bya dîyi diswika kampanda dikwatakaja kudi bantu, bwa kubweja mfranga mu ekeleeziya, bwalu bôbò badi batangila ku bintu bya pa buloba, ekeleeziya wa maalu a pa buloba, makole manene a pa buloba, makole a cididi. Kadi Nzambi utu utangila ku Dîyi Dyende. Nenku dîyi dyònsò didi dibengangane ne Dîyi dya Nzambi ndya mashimi. Bwanyi mêmè, anyi n'Dîyi anyi n'cya cyanaana. Eyowa's, mukalenge. Eyowa's, mukalenge.

142 Yèyè mmufwanyine kuya buludi ku Cishimikidi. Mmufwanyine kutaayisha cintakanyi aci kucishiya anu tupese tupese. Mbifwanyine kwikalaye ne cya kwenza nanku. Kî mmufwanyine kwenza cingà cintu nansha cimwe to, bu ne Amosa uvwa mwaba ewu leelu ewu. Kî mmufwanyine kwenza cingà cintu nansha cimwe to, bwalu, vulukaayi ne, yèyè mmuprofeta mulelela wa Nzambi, udi Dîyi dilwa kudiye. Kî mmufwanyine kwenza cingà cintu nansha cimwe to anu kwalukila ku Dîyi. Nansha bu beena Mpenta bônsò baa mu ditunga dijima badisangishe bamunyungulukile, bamba ne: "Mukalenge, Amosa, tudi twitabuja ne wèwè udi muprofeta, kadi udi kule ne Dîyi. Tudi baswe kukulongolola." Yèyè's mmufwanyine kushaala anu ne Dîyi. Kakwena cikwabo cidiyè mufwanyine kwenza to, bwalu yèyè mmuprofeta. Kavwa yèyè dijinga ne dimwela dyabo dya mu diboko adi to. Yèyè udi ne Mukenji wa kufila. "Ne bônsò badi Taatù muMpe nebalwe Kûndi." Ne yèyè neayiishe Dîyi, ne neaDiyiishe menemene anu mudiDi difwanyine kwikala mu Bible, nenku ki bwa cinyi tudi bafwanyine kumwela làà. N'cya bushuwa.

143 Nansha Dyôdi difwanyine kwikala cinyi, Dîyi dya Nzambi ditu dilwa kudi baprofeta, dyumvwija dyabo bôbò dya Dîyi, dyumvwija dya cya bushuwa.

144 Izaleela uvwa misangu yònsò anu upambuka mu njila, kadi Nzambi uvwa ubatumina muprofeta ne bishima ne maalu a kukema, bwa kuumvwija Dîyi adi. Kadi yèyè uvwa umanya

munyi? Wàkamba ne: “Padi muprofeta ewu wakula, ne bwalu abu bwenzeka, dībà adi ncyà bushuwa.” Yèyè uvwa ushindika baprofeta Bende, bwa ne bavwa balelela.

145 Yesu wàkamba ne: “Ewu udi ungiitabuuja Mêmè, byenzedi bîndi ngenza neàbyènzè pende. Ku cyôci eci nkunwamanyina. Bimanyinu ebi nebifile badi biitabuuja.”

146 Kadi mmunyi mudiye mwa kulaka mukana wamba mudiye muprofeta wa Mukalenge kadi kuvila Dìyì diine dya Nzambi? Mmunyi mudi muntu mwa kubatiiza mu dînà dya “Taatu, Mwânà, ne Nyuma Mwîmpè,” mu myânzù ayi, kadi kuvila Dînà diine dya Yesu Kilisto, padiku kakuyi Mufundu nansha umwe mu Bible bwa kutwa dilongesha dyende dikwatakaja adi nyama ku mikolo? Ndi mufwanyine kwikala muumishe maalu ne ndyulangana, kadi dībà dikaadi dikumbane dya kushaala mushindu awu. M’Bulelela.

147 Mmunyi mudi bantu mwa kulaka mukana bamba mudibo beena Kilisto leelu ewu, kadi bapatuka apa banyeemena baya ku cintu cyôsò naka, ne bakaji biikàle ne nsuki mibebula, ne bavwale tuputulu, ne banwa mfwanka, ne banyeemena ku dimona dya sèndèmâ, ne ku bindidimbi bya mishindu kana yôsò bya kale, ne dyanza dya bintu bya lukutukutu? Nenungambile ne aci n’Nyuma Mwîmpè anyi? Kanungambidiku aci to. Nwênù, nudi nusaamisha Nzambi munda, bu ne kuvwa cintu cya mushindu awu cifwanyine kwenzeka. Eyowa’s. Ndi mutwishiibe ne nudi nuumvwa. Udibiikila peebe, cintu bu nanku, mmunyi mudiku kufwanyine kwikala cintu bu nanku awu? “Ku mamuma abo nkudibo bamanyikila.”

148 Yèyè’s mmufwanyine kutonoka e kupiisha mukaji yôsò udi ne nsuki mibebula. Mmunyi mudiye mufwanyine kwenza cîngà cintu? Yèyè’s mmuprofeta. Ne aci’s ki Dìyì. Yèyè’s mmufwanyine kwamba ne: “Nwênù, ba-Izabela aba!” Yèyè’s mmufwanyine kubashidishila maalu’s. Bwa cinyi? Yèyè mmuprofeta. Bivwa bikengela bwa kushaalaye ne Dìyì. Ncyà bushuwa’s. Nudi nwela meeji ne mbafwanyine kulekela anyi? To, mukalenge. Mbafwanyine kwamba ne: “Mmukoleshi wa maalu. Mmubi maalu anu muvwa Pòlò wa kale awu, mu Bible, mukinyi wa bânà bakaji awu.”

149 “Nwênù, musùmbà wa bashimakajanganyi, badi badyamba ne mbeena Kilisto. Nansha wèwè muteete kwikala ne nsòmbelu wa cijila mushindu kaayi, kaciyena ne dipetangana nansha dikese ne cyôci aci to. Paucidi anu uvila Dìyì dya Nzambi ne kuyi ushaala paanyima paaDi to, udi ngènzàmpèkààtù, mwena bupidya,” aci ncidiye mufwanyine kwamba. Yèyè kî mmufwanyineku. . .Kuteeka, mmufwanyine kuteeka cisuuyi anu ku muji wa mucu. Kî mmufwanyineku kwela cintu nansha cimwe paanyima to. Yèyè mmuprofeta, ne ngenzeli wa maalu wa muprofeta mulelela nyèyè awu. Yèyè mmufwanyine kushaala

ne Dîyi adi kayi ucyuka ne nganyi mwine awu to. Byôbî biikàle ne mmamwëndè anyi ntatwëndè mumuledi, kabyena ne cidibi bishintulula to. Kî cyakenza Yesu. Kayi nansha mufwanyine kumubiikila maamù to; kî ncivwaye mene to. Yèyè uvwa Nzambi. Nzambi katu ne mamwëndè nansha. Bu biikàle nanku, mwaba awu taatù Wende nganyi? Uh-huh. Uh-huh.

¹⁵⁰ Yèyè's mmufwanyine kutonoka kadi kubapiisha's. Mmufwanyine kupiisha dingumba ne dingumba dyônsò, bwalu kakwena nansha dimwe dya ku ôwò awu didi dyashila pa Dîyi to. Mèmè ncyèna mwa kupetaku nansha dimwe dya kudiwu to. Ne padibo anu badyenza bôbò biine dingumba apu, bakaadi balwishangana ne Dîyi anu mwaba awu. Pa nanku mmunyi mudi. . . muprofeta mwa kubenasha cidi Dîyi dipiisha? Paabi, kî mmuswe kucyenza to, bwa kutapa mwanaabo ku mwoyi, kadi pende bikengela anu àcyènzè bwalu mmuprofeta. Ne yèyè udi cimfwanyi cya Dîyi dilelela dya Nzambi, ne kayiku mwa kutentemuka kuumukaKu to, nansha bya munyi; kanungu pa kanungu, ne mulongo pa mulongo. Nudi nuumvwa cîndi njinga kwamba aci anyi? Ngenzèlu wa maalù wa muprofeta mulelela.

¹⁵¹ Mbantu bûngì munyi batu bamba ne: “Mukalenge, ndi njinga bwa Wâmvwijakù muprofeta”? Yèyè katu wenza aci to. To. Yèyè katu wenza aci to.

¹⁵² Yèyè mmufwanyine kupiisha cyenzi cyônsò cya masandi cya maekeleziya, manayi a mubela ne bintu byônsò bidibo benza ebi, manayi a twarta, didya dya bapwita nsupu adi. Mmufwanyine kupiisha cyônsò cya ku byôbî abi. Mmufwanyine kubitonokela kadi kubituma mu iferno mudibi bifumine amu.

¹⁵³ Nudi nwela meeji ne nudi bafwanyine kumwakidila anyi? To. Ekeleziya leelu ewu kî mmufwanyine kumwakidilaku to. Mpenta mmufwanyine kumwakidila anyi? Ee, yèyè's mmufwanyine kubwelamu, kwamba ne: “Nwênù musumbà wa ba-Izabela badi ne nsuki mibebula aba, kanutuku bamanye cidi EMU MMUDI MUKALENGÈ WAMBA umvwija anyi? Upàtuka peebe apa muvwale kankanzu kakulamàte pambidi, kwèna mumanye ne udi mupiile bwa dyenda dya masandi ku dituku dyônsò ne nkama ya balume anyi?” Ki cidiye mufwanyine kwamba ncyôci aci.

¹⁵⁴ Wèwè udi wamba ne: “Ee, muntu wa meeji a cyena kale wawa! Mukulakaji wa mutu dibàla, mulumyana wa mvyà awu, muumushaayi mu cyambilu amu. Tunumone nwênù, kasumbu kaa balubuludi, balami, numupatula mwaba ewu.”

¹⁵⁵ “Ee, nwênù musumbà wa beena lubombo beena dikenga aba.” Cya bushuwa. Amosa's mmufwanyine kucitandisha patooke. Pashiishe nudibiikila peenu ne: “Tudi. . . Twètù tudi beena kasumbu *kampanda*. Tudi beena kasumbu *kansanga*.” Nudi baa dyabulu, tatwênù, bwalu yèyè ngutu uvila Dîyi.

156 Wamba peebe ne: “Mémè nkaadi mwakule mu myakulu.” Ne pashiishe ubebula nsuki amba’s? “Butumbi kudi Nzambi’s we! Aleluuyah!” Kadi’s Bible mmwambe ne: “Cidi—cidi cintu anu cya patupu—patupu eci, bwa mukaji kusambilaye ne nsuki ku mutu mikosa mushindu awu.” Pashiishe udibiikila peebe mùdì mwena Kilisto. Bundu bwebe. Umùkà apa uye wenda ukalabila ku binù mwaba kampanda, udilongolole ne Nzambi.

157 Uvwàla peebe tulàmbà twìpì twa kale atu, kadi kupatuka apa mu bulà emu, wenda udinana, paudi mumanye anu bìmpè bitambe ne udi munkaci mwa kwenda masandi ne balume lukama dituku dyònsò dicyacyà dīlīlīlī edi. Mbambe, ki mudi Yesu mwambe: “Yònsò ukàtàngidi mukaji bwa kumwalakana mmwende nende masandi.” Mukaji awu nguvwa mudizanjike yèyè mwine, ki wèwè peebe kucyenza munda mwa mwoyi webe. . .

158 Kadi peebe, wèwè, s’udi mufwe ku maalu a pa buloba. Ukaadi mubiike ku lufu ku byòbì abi, bu mungāmbì, ku ntwadijilu aku. “Udi mufwanyine kukudimuna mutu bwa bundu. Twisù twebè’s tudi tushaala tukese pa cintu cibi cya mpekaatu cya mushindu awu aci, pamutu paa kutangila bakaji bwa kwikala kubaalakana. Nwènù balume badi benza cintu cya mushindu awu abu kadi kudibiikila munudi beena Kilisto.” S’ki cidiye mufwanyine kunwambila. Mémè ndi nteeta bwa kwangata Méyì ende yèyè mu dinda emu. Mmafwanyine kwikala Méyì ende. Bwalu, yèyè, vulukaayi ne, mmuprofeta mulelela. Bivwa bikengela kushaalye ne Dìyì adi. Uh-huh. Mémè ndi nteela anu Méyì ende cyanaana. Kwajiki. Bwalu, bu nwènù mwa kumwangata kulwa nende, yèyè udi Dìyì. Dìbà adi, s’ki Dìyì ndyòdì edi, Dyòdì diine. Bidi mwa kwenzeka ne kanwikadi ne muntu awu to, kadi nudi ne Dìyì dyende, bwalu yèyè uvwa mufwanyine kwikala ne Dìyì dya Mukalenge.

159 Dilongesha dyònsò dikwatakaja kudi bantu, yèyè uvwa mufwanyine kudipiisha, bu mudi dibatiiza dya mu “dìnà dya Taatù, Mwànà, Nyuma Mwìmpè” adi. Yèyè’s uvwa mufwanyine kwimansha cintakanyi aci e kucikupa mu Cyendelele. Úvwa mufwanyine kucipiisha, mu mushindu wa kakuyi kushaalku nansha kaamupuuya kaaci to. Eyowa’s, mukalenge.

160 Mbùngì kaayi, nwènù, mbùngì kaayi mu ekeleeziya mu dinda emu bavwa bafwanyine kumwakidila biimanyine pa ciine aci?

161 Pashiishe bóbò, musumbà wa beena Dìnà dya Yesu ewu, s’bavwa—bavwa bafwanyine kwamba ne: “Kaa, twètù’s tudi bafwanyine kumukwacila pa cyòci aci.” Kadi dìbà adi bulongolodi bwenu, nunku yèyè’s mmunutonokele ne nwènù ne bwòbù abu poopamwe. S’ncyà bushuwa. Bakaji beenu baa nsuki mibebula abu, ne nwènù biine badi babitwala aba. S’ncyà bushuwa. Balume beenu abu, mushindu udibo benza maalu ne baditwala awu. S’ncyà bushuwa.

162 Bantu bàábúngì batu anu bamba ne: “Bidi bîmpè kwikala muprofeta.” Mmwômò, s’mpawikala mudilongolole bwa kupaanyisha byônsò bya pa buloba kadi kushaala ne Nzambi ne Dìyì Dyende. Hmm.

163 To, katwena bafwanyine kumwakidilaku to nansha kakese, mangumba etu a leelu ewu aa. Ncya bushuwa ne katwena bafwanyine kwikalaku nende bwalu to.

164 Muteelejaayi nûmvwè muvwaye ucitonokela. Wākamba ne: “Nzambi mwine unudi nulaka mukana nwamba munudi baMwitabuuje awu, Yèyè ki wanubutula.” Nenwènzè cinyi ne ciine aci? Nzambi mwine udi Mpenta mwitabuuje awu, anu bwa byenzedi mene bya masandi ne bintu bidibo munkaci mwa kwenza ne bidibo baanyisha bwa kwenzekabi abi, anu mwine Nzambi awu ki watwala dinyooka pa malongolodi awu. Ncya bushuwa’s. Anu menemene cyākabāmbilā Amosa.

165 “Kaa,” muvwabo bamba’s, “twètù’s tudi ne Abraham. Tudi—tudi ne *cikampanda*. Tudi ne mikenji ya Mòsà. Tudi ne baakwidi. Tudi ne baprofeta.”

166 Kaa, mwaneetu, twísù atu kadi kushaalatu tukese paakabatangilaye, ki kubatonokelaye ne Dìyì adi. Eyowa’s, mukalenge. Bushuwa. Kabavwa bafwanyine kumwakidilaku to. To, mukalenge. Kwambaye ne: “Nebababutule pamwe ne malongesha enu makwatakaja kudi bantu awu.” S’ki civwaye mufwanyine kunwambila leelu ewu. Úvwa mufwanyine kwamba cintu cimwecimwe cyakambaye musangu awu aci. Wākamba ne: “Anu Nzambi mwine unudi nwibakila maekleeziya awu, pāmwāpa nutuula miliyò ya ndola, myaba minsantu ya dilwa kubandila miine yinudi nwibakila Yehowah ayi, unudi nulaka mukana nwamba ne ngunudi banange awu, anu Nzambi mwine awu ngwanubutula bwalu nudi nubenga Dìyì Dyende.”

167 Ki mudibi kabidi leelu ewu! Anu Nzambi mwine udi Amerike ulaka mukana wamba ne ngudiye ukwacila mudimu awu ki watwala dinyooka pa ditunga ne kudibutula. Ndi ntekemena ne aci cidi ciya mu ndondo mu mushindu wa kanuyiku mwa kudinyonda kupatukamu to. Anu Yèyè mwine unudi nulaka mukana nwamba ne ngunudi banange awu, pamwe ne mèyì maswika enu nwènù makwatakaja kudi bantu awu, ne nsòmbelu wa masandi ne kanyawu kanudi naaku mu nwènù aku, kule ne Dìyì dya Nzambi, ki wanubutula dīngà dituku. Aci ng’EMU MMUDI MUKALENGE WAMBA. Kakwena cintu cikwabo nansha cimwe cidi cibashaadile to.

168 Ikalaayi paanyima paa Dìyì! Bayiishaayi Evanjeeliyo; ikalaayi nukosolola mu ditunga; bāmbilaayi Bulelela. Bambi badi bakokangana ne beela mbila mikole, ne benza bintu bya lukutukutu. Balume badi babipiisha. Malongolodi adi anwipata. Bakaji badi bakupa mitu, kabayi baswe kulekela nsuki yabo yileepa to, nansha bya munyi. Bavwala bilāmbā

byabo menemene anu mwabo ne kale, ku cidimu ne ku cidimu. Mbyenze anu bu kwela kwa mâyi pa masala a mpaatu. “Pashiishe nwênù kulaka mukana nwamba munudi banange Nzambi amba’s?”

169 Wàkamba, Yesu wàkamba ne: “Nudi bangate bilele byenu kadi kuvwija Mèyì a Nzambi àkaadi kaàciyi ne bwenzeji nansha bwa kânà to.”

170 Ki ngenzelu wa maalu wa muprofeta mulelela nyèyè awu. Nwamonu anyi? Kî ngenzelu wa maalu mutekete to. Kî ncidi bantu bônso badyelela meeji ne ncidiye mufwanyine kwikala aci to.

171 Kutupika kuya muulu kwalukila ne kwela mbila mikole, muntu yônso ukutuuta cyanza pa dikaaya, dîbà adi aci’s ki cimanyinu cya ne wêwè mwine kwêna muprofeta mulelela to. Ki cimwe cya ku bimanyinu biine bya ne kwêna ne cyûdî wamba ne udi naaci aci to.

172 Ndîbà kaayi dyakamutuutabo yêyè cyanza paanyima, piikalabi kabiyi mu kiipacila kaa kumulaabidila? Cinyi? Yêyè’s uvwa mufwanyine kukudimuka kadi kubapiisha. Cya bushuwa. Kabavwaku mwa kutuuta Amosa cyanza paanyima nansha. Kabavwaku mwa kutuuta Eliya cyanza paanyima nansha. Kavwaku yêyè mwa kutwala cintu bu nanku to. To, mukalenge. Yêyè wakabambila Bulelela bwa Nzambi. Piikalabi ne Dyulu ndinene menemene, kwine kutuyaaya aku, dîbà adi patwikala katuyi mwa kukumbanangana ne tuntu twa tukese menemene etu, mmunyi mutwakumbanangana ne Nyuma mwine Mwamwa? Bikengela tukumbanangane ne Dîyì. Ki ngenzelu wa maalu wa muprofeta mulelela nyèyè awu. Nansha ciikàle cimusunsula, pa kuCyambaye, eyowa’s, budiye naabu mbwa kusunsula ditunga, ne Cyôci aci. Ncya bushuwa. Kadi’s ki ngenzelu wa maalu nyèyè awu.

173 Yêyè’s uvwa mufwanyine kucitonokela. Kaa, ekelekele! Nudi bamanye cyakabambilaye anyi? “Ndululu,” nwênù baswe kumona mwab’ewu, mwakambaye, “kayeena mu bukalenge bwenu abu to, yidi munda mwenu nwênù.” Ki cyakambaye. Eyowa’s. “Ndululu yidi mu ekeleeziya, cimwenekelu cyenu cya difwana dya Nzambi aci, ki cidi citwale lutatu.”

174 Cidi cyenza ne communisme ikale wenda utangalaka mu ditunga leelu ewu, kî mbwa communisme mene to. Mbwa ekeleeziya. Mbwa bantu. Leelu ewu badi badibiikila mudibo beena Kîlisto. Badi bimba benze bu Banjelo. Mèyì masakisha bilenga, biikàle baakula ne ngaakwilu wa kapelu wa dikema, byenze bu ne m’Barkanjelo; kadi babenga kwitabuuja Dîyì dya Nzambi, benze bu badémóns. S’ncya bushuwa. Wimba bu Mwarkanjelo, muvwale mwenze bu nî ncinyi apa, kadi kuvila Dîyì dya Nzambi.

175 Muntu, muyiishi mu cyambilu, wa wimanamu biikàle bamubiikila ne Docteur, Révérend, kadi mweläku anu lukonko ne: “Bible utu mwambe bwa dibatiiza mu ‘Dîna dya Mukalenge Yesu Kilisto,’ anyi, ‘Taatu, Mwâna, ne Nyuma Mwîmpe?’” Kadi neakusekele lukenyi mumpala wamba ne: “Taatu, Mwâna, ne Nyuma Mwîmpe.” Pashiishe kudibiikila mûdi mwâna wa Nzambi’s?

176 Bakaji bamanye ne Bible udi ubapiisha padibo benza bintu kampana, ne padibo babebula nsuki yabo, ne benza maalu bu baa pa buloba, ne bavwala bilâmbâ bidi bisalulangana masandi ne bintu bya mushindu awu, kadi biikàle anu babyenza ku musangu ne ku musangu, nansha nanku; kadi baakula mu myakulu, batupika baya muulu baalukila, beela mbila, ne benza tusumbu twa bainâbânzâ baa kale, ne tusumbu twa batedi baa bilâmbâ, kadi batuma ba-missionnaires mu budimi bwa bwambi. S’cikaadi cishaale mupuuya mubole ku mèsû kwa Nzambi. Nenku, EMU MMUDI MUKALENGE WAMBA, Yèyè neabutule cintu cyônsò mu kaabujima. Neacibutule.

177 Kî ncintu cipeepele to, kadi ki ngenzeli wa maalu wa muprofeta mulelela nyèyè awu. Kutonoka naaCi mwaba awu, ne kuCyamba nansha Cîkàle citapangana ku mwoyi anyi kaciyi citapangana.

178 Yone uvwa muprofeta mulelela. Wäkamba ne: “Cisuuyi nciteeka ku muji wa mucu.” Ki wabo ngenzeli wa maalu nyèyè awu. Bushuwa’s.

179 Lutatu ludi munda mwa ekeleeziya. Bimba byenze bu Banjelo, baja maja apa byenze bu badémons, s’mmaja’s, benza bintu bya lukutukutu, manayi a twarta, manayi a mbilu ya dipiiyangana. Beena Mpenta, baya mu myaba ya didisangulujila, myaba ya dileejila bindidimbi bôbò buulemu tente. Mwaba wônsò, dinaya dya mushindu wônsò wa kale anyi cintu kana cyônsò cikwabo eci, bàyaayakù buludi, ne manayi a mbilu ya dipiiyangana ne bikwabo byônsò, kadi kudibiikila mudibo beena Kilisto, bayaku bakeela mbila, baakula mu myakulu, benza paabo dyoweshangana dya mâyi ku makàsâ biikàle bangata ne meesa a Mukalenge.

180 Mona’s, cidi—cidi anu: “Mudi mbwa uya ku bilushi byende,” mwäkambâ muprofeta, “ki mudibo benza.” Piikalabi ne cintu aci civwa ncyâ pa buloba, s’bivwa bikengela kuumushiibwaci munkaci mwenu, bwa cinyi nudi nwalukilaku cyakabidi? Cya bushuwa. Bapatuka mu misèèsù, benda bajeekeja nyima, bacibiikila ne, mbîdündadünda, bakosa nsuki, bavwala tuputulu. Kaa, ekelekele! Badibiikila mudibo beena Kilisto. Nudiku bafwanyine...To, mbipiciibwe ne mêmè nciyi mucyâmbè to.

181 S'ki bwa cinyi ndi mbapiisha. Piikalabi ne nênshaalè ne Dîyi *edi*, piikalabi ne Dîyi *edi* didi dilwa kùndi, s'nênshaalè ne Dîyi *edi*. Eci ki cidi cilwa kùndi, Dîyi. Kucipiisha!

182 Ùlaka pende mukana wamba mudiye mulombodiibwe kudi Nyuma Mwîmpè, kadi kwenza bintu ebi. Nudiku mwa kudifwanyikijila mukaji, mulombodiibwe kudi Nyuma Mwîmpè, ulekela bwa bamubebule nsuki, padi Nyuma Mwîmpè mwine awu ucipiisha? Dîbà adi m'Mupersona wa mushindu kaayi awu udi Nyuma Mwîmpè? Nudiku mwa kudifwanyikijila anyi?

183 Nudiku mwa kudifwanyikijila muyiishi wimana mu cyambilu, ne muntu kana yônsò ewu umwela kadyombo bwa kumuleejaye mwaba nansha umwe ukaadiku muntu kampanda mubatiijiiibwe mu myânzù ya "Taatu, Mwânà, ne Nyuma Mwîmpè," kadi ukusekela lukenyi mumpala ne ukubiikila mùdì wêwè mukoleshi wa maalu, bwa paudi ubatiiza mu Dîna dya Yesu Kilisto, kadi wamba mudiye mulombodiibwe kudi Nyuma, ne wamba mudiye ne Nyuma Mwîmpè? Nyuma Mwîmpè mmufwanyineku kuvila Dîyi Dyende Yèyè mwine anyi? To, mukalenge. Uh-huh. Nudi numona anyi? Ndi ntekemena ne nudi nuumvwa bwalu abu.

184 Ncyèna mumanye ne ntoo ne ku dîbà kaayi to. Dikubakuba dyalonda didi mwa kuya naanyi. Kadi, pambadi kulwa apu, nêngiikalè anu kacya ngîmana mwaba awu ne Dîyi. Pângàätwilanganà neenu kwaka ku Cilumbulwidi, nêngiikalè anu kacya ngîmana ku luseke lwa Dîyi adi. Ki Dîndi mêmè ngiitabuuja ne ki Bulelela.

185 To, kwèna wenza bintu nanku, ne piine apu mwikale ne Nyuma Mwîmpè to. Mvwa muye kudi mukaji wa mwambi kampanda dîngà dituku, musòmbe mwaba awu muvwale nkanzu, s'ùvwa ne mmwenekelu wa ukwacisha ne bwôwà's.

Wêwè udi wamba ne: "Kwèna ne bukenji abu to."

186 Ndi ne bukenji. Aci's ki Dîyi. U'Diyiishe dyônsò. Nwènu nudi nucinguluka bintu abi, bayiishi bààbûngi bavwijiiibwe bilûmaabikàjì, bwalu kabeena ne dikim-...Pâmwâpa kutu mene mubiikidiibwe bwa kuyiisha to, twamb'eku twamb'eku. Eyowa's. Kadi musadidi mulelela wa Nzambi neashaale anu ne Dîyi adi. Cya bushuwa.

187 Mukaji mujima wa mwambi musòmbe mwaba awu, kacya wapatakana yèyè yônsò mu nkanzu, ne tukanu twa ku maci tulembelele, ne bilaabu kwîsù, ne nsuki mîpì mibebula. Paabi, Nzambi's udi upiisha cintu cyônsò aci ne mbukooya. Ki pashiishe wêwè kujuuka kwamba mùdì ne Nyuma Mwîmpè's?

188 Mvwa nyiisha mu Phoenix emu, abidi adi panshi aa, pa cintu cya mushindu awu, ki mukaji wa mwambi awu musòmbe lwà ku cyambilu aku, ne nsuki mibebula ya mushindu wa bânà baa balume eyi miikàle mivunga yônsò, muvwale nkanzu wa yèyè kayiku nansha mwa kusokoka dibalakana dya bivunga byende

abi to. Kayiku mwa kupweka kupita pa binù to. Mushiikidile bu centimètres dikumi anyi dikumi ne isatu kumutu kwa binù, musòmbèle lwà kwine aku; ùtùpika ùzùnzuka, ulombola misambu. Mémè kadi kucitonokela ne mwanyi mwònsò. Mu bushuwa bwa bwalu, yèyè awu kaadyakumbiikilaku kabidi to. Ne mémè mwine ncyèna ncitekemena to. Kadi pende's mmumanye cidi cìmpè ne cidi cibi. Pàngìikalà nkaadi mwimane ku Cilumbulwidi, kacyakwikala kabidi pa byanyi byanza to. Pashiishe kadi kuya kamba ne. . .

¹⁸⁹ Muntu kampanda, udyamba mudiye mulongeshi, cibi mémè ncyèna ngamba ne kì mmulongeshi to, kwambaye kamwe kaadiyi dituku adi, kumpala kwa bamwe baa ku balunda baanyi mu cimenga kampanda múnkaadiku muye. Nudi anu bamanye yèyè mwaneetu awu. Ki mwaneetu awu kubwelaye. Kwambaye, ee, kwambaye ne: “Twàkaakidila Mwaneetu Branham mwaba ewu musangu kampanda.” Mu cimenga kampanda, mu Wesete mwamwa. Ki muntu awu kwambaye ne: “Kaa, Mwaneetu Branham's mmuntu mwìmpè.” Nwamonu anyi? Wàkadilama bwa kubenga kulasula ní ncinyi ní ncinyi pa ngiikadilu wanyi. Kwambaye ne: “Mwaneetu Branham awu, kadi kanuteelejiku mikaba yende ya mèyi ayi to, bwalu neyinupe cibwejàkàji.”

¹⁹⁰ Ki kwenzekabi ne kwikàle umwe wa ku balunda baanyi mwimane mwaba awu, kwambaye ne: “Anji indila kakese, mukalenge! Mémè ewu mvwa mu cibwejàkàji too ne pàngàavu *kuteeleja* mikaba ya mèyi miine ayi.” Eyowa's. S'ki dishiilangana ndyòdi adi. “Ncivwaku mwa kuumvwa muvwa Nzambi wa cijila mufwanyine kutwala bintu bya mushindu awu to, munudi nwènù bònsò aba nubitwala emu.” Eyowa's.

¹⁹¹ Muntu anu yèyè umwèumwè awu, muntu mukwabo uvwa nende, mwimane mu mwaba kampanda anu abidi adi panshi aa, kwambaye ne: “Mwaneetu Branham muprofeta. Udi mwa kujingulula maalu. Ne maalu bu mudi. . .Kadi,” yèyè ne, “mpindyewu, kanuteelejiku Dilongesha dyende to, bwalu kèna wamba bintu mu byòbi to.” Katombòtombò's, dìyi dya bushaadile be bu dyòdi adi!

¹⁹² Kanutuku bamanye ne cyòci ciikàle. . .Mémè ncyèna muprofeta to. Kadi pìikalà Dìyi dya Nzambi dilelela, Didi dilwa nkudi muprofeta. “Dìyi dya Mukalenge divwa dilwa kudi baprofeta.” Bòbò ki bavwa bumvwija Dìyi. Dìbà adi, nudi numona's, kanwena. . .

¹⁹³ Kacyena nansha cyumvwika cya meeji to, kusokomena anu paanyima paa kaadingumba kampanda kakesee, dimwe dya ku matuku awu kìikalà mwa kukosoloka ne kwenguluka, ne kubutuka mu iferno.

¹⁹⁴ Kadi Dìyi dya Nzambi nedishaale kashidi. Pa Lubwebwe alu ki pàndi mémè ngaashila dyanyi ditekemena kashidi, pa Dìyi dya Mukalenge. Bikwabo bintu byònsò bipweke ne màyi.

Mémè mujimije mulunda yònsò, bikwabo bintu byònsò, bwanyi bulunda budi mu Kilisto.

Ditekemena dyanyi kî ndyashila pa cîngà cintu
 cya mushinga mushaadile
 ku Wa Mêyi ne bwakane bya Yesu to;
 Pîikalà byònsò bidi mu nyungulukilu wanyi
 mwa kuupuka,
 Dìbà adi Yèyè ki ditekemena dyanyi ne nshinga
 udi mukwate bwâtù bwanyi.

¹⁹⁵ Pààkataayikà cingoma aci dituku adi ki mémè kumona... Mémè kudyambidila ne ngáfù. Mémè kuumvwa ngumvwilu wa ditalala. Mémè kukuenzakana. Mémè kudyambidila ne: “Ee, ki cyòci eci.” Ndikwacisha kaayi divwa dingumba difwanyine kuntwadila dìbà adi? Ndikwacisha kaayi divwa bulongolodi bufwanyine kuntwadila dìbà adi? Nunku’s mbinkengele bwa mémè kwikala mwimane kwaka ku manyooka a cijji cya Nzambi, bwa kulumbulwishiibwa kudi Dìyi *edi*.

¹⁹⁶ Nansha bu byòbì mwa kwikala ne bidi bikengela mémè kwosha, ne kubendamija, ne kunyenguvula, ne kukosolola, bantu bààbùngì, kadi ndi ntekemena ne nèngènzè, mpatule mùsà wa bushuwa mwômò amu, wa Dìyi dya Nzambi amu, ne kwibakilamu musuuka kampanda bwa Cyendelele. Ncya bushuwa. Nzambi awuteekeku mu byanza Byende ne àwìbàkè ushaale mwànà wa butumike.

¹⁹⁷ Mmunyi mudi—mmunyi mudi muntu, mulombola kudi Nyuma Mwîmpè, mufwanyine kwenza cintu bu nanku awu? Anyi, mukaji mwikàle ne Nyuma Mwîmpè, mufwanyine kwenza bintu bu nanku awu? To. Yèyè ngwa cijila. Ne pîikalà Mwoyi Wende munda mwebe, udi peebe cintu cimwecimwe aci. Wèwè newikale menemene anu bu Yèyè.

¹⁹⁸ Izaleela, bu twètù kunu, bavwa beela meeji ne bwalu bavwa batanta mu bipungidi byabo ne bakwabo, ki dibitabila dya Nzambi dya ciine aci. Mpindyewu, nudi bamanye’s, twètù tudi tudyelela meeji amweamwe awu lelu ewu.

¹⁹⁹ Mvwa muyiikile ne bantu kampanda mwaba ewu anu abidi adi panshi aa, ku nzubu kampanda wa cilaala-beenyi, kukaadi ndambu wa matuku, bantu banene baa mu bipaapu bya ntendelelu. Ki bôbò kungambila ne: “Nzambi’s mmujaadike ne Yèyè udi neetu. Mona’s, tudi bavulangane cidimu cishaale eci, Mwaneetu Branham,” ngápù mwoyi bùngì bwa nkama miine ne yivwa yinga, mushindu awu.

²⁰⁰ Mémè kwamba ne: “Aci kacyenaku dinwanyishila to nansha kakese.” Uh-huh. Ncya bushuwa. Bundumba bwenda buvulangana, mbubande cipidi cidimu cishaale eci, ne bya pa lukama bitwe ku makumi asatu; aci civwa cileeja ne Nzambi uvwa mwanyishe bundumba anyi? [Disangisha didi dyamba ne: “To.”—Muf.] Uh-huh. Uh-huh. Uh-huh. Bushuwa. Huh! Adi

didibingisha kî ndîmpè to. To. Kanwena mwa kucyenza to. To, mukalenge. Nzambi utu wimana pamwe ne Dîyi Dyende. Muntu mukwabo kana yônsò neimane pamwe ne Dîyi Dyende, piikalaye wa meeji matooke. Eyo.

²⁰¹ Bavwa beela neeji ne, bwalu bavwa ne cipungidi kampanda! Mpindyewu, mwaba ewu, netubwelemu, mu katanci kakese cyanaana, pa bidi bitangila maalu a bukalenge. Ditunga dyetu dikaadi dibenge Dîyi dya Nzambi, anu mwakenza Izaleela. Baakadyombola Dîyi dya Nzambi, ne bantu baabo, ne baakwidi baabo, ne baprofeta, ne bakwabo, bakaadi babambila anu biprofeta bidi bibalengeleela. Nenku badi . . . Citudi mwa kwenza ncinyi pa kuumusha dyamba dya ciprofeta cidi cibabiipila, bwalu cidi cibengangana ne Dîyi! Ditunga's dikaadi dipiishiibwe. "Ditunga dyetu dinene, dinangiibwe, dyashila pa bishimikidi bya . . . dilabula dyetu dya bankambwa beetu." Dîbà adi alukilaayaaku ku civwabo bôbò naaci aci's. Uhuh. Mmwômò. Bushuwa's.

²⁰² Izaleela's uvwa ditunga dinene. Tangilaayi bankambwa baabo, kadi Nzambi kaakabeela paanyima to. Muprofeta mukulakaji wa mutu dibàla awu uvwa ubakupila Dîyi, ne bivwa byenzeka menemene anu muvwaye wamba amu. Balaayi maalu malonda enu mwaba ewu kadi nujandule ní kî ncyá bushuwa. Bivwa byenzeka menemene anu muvwaye ubyamba amu. Nenku ùvwa ubapiisha, nansha nanku, bôbò biimane mwaba awu, ne baakwidi baa cijila bavwale bilàmbà bya cijila, bamyamina màyi pa *cikampanda*; ne kabayiku baswe kunyungisha cyanza, mushindu *kampanda* anyi mushindu *kansanga*, bwalu civwa ncintu kampanda cya mushindu *kankenga*, cilele kampanda anyi cintu kampanda.

²⁰³ Yesu kwamba ne: "Nudi baa tatwènù, dyabulu, ne byenzedi byende mbinudi baswe kwenza ebi." Bôbò kuMwangata e kuMupiisha, ne kuMukudikabo ku mucu, ne kuMushipabo. Cya bushuwa menemene. Nzambi kuMubiishaye cyakabidi ku lufu. Eyowa's, mukalenge.

²⁰⁴ To, kabavwaku bafwanyine kucyenza to. Katuvwaku bafwanyine kwitabuuja Amosa leelu ewu to, nansha kakese. Ne leelu ewu tudi benze cipungidi. Tudi ne citudi tubiikila leelu ewu ne . . . Tudi tudyelela meeji ne ki "eyowa" wa Nzambi, ne bwalu nyawu malongolodi etu adi enda adyundadyunda ne—ne byônsò biikàle byenzeka mushindu udibi byenzeka awu. Tudi tudyelela meeji ne ki "eyowa" wa Nzambi pa ciine aci. Nudi bamanye's, bôbò mbasakidile, ngeela meeji, bakwabo beena Mishòònyi batwe ku miliyô yibidi anyi yisatu. Ne beena Katolike mbaye too ne ku miliyô mikwabo yàbûngi. Nwamonu anyi? Badi badyelela meeji ne ki dibaanyishila dya kudi Nzambi ndyôdi adi, bwalu mbeena Katolike. Beena Mishòònyi badi badyelela meeji ne ki dibaanyishila dya kudi Nzambi ndyôdi adi, bwalu mbeena Mishòònyi. Huh! Aci's ndukutukutu. S'ntuzoolo twa

kumana naatu mukiiya. Mbutù bwa ku bombe bwa mushinda. Nciiji cikole cya Nzambi cidi cyenda cyungwila mushiki, bwa kutaayikaci. Aci's ncyá bushuwa menemene.

Mpeeshaayi maci. Nênnwãmbilè Dìyì dya Mukalenge. Amen.

205 Anji tûtàngilaayi twêtù aba. Tangilaayi buloba leelu ewu. Tangilaayi ditunga dyetu. Tukaadi bashaale beena O.N.U. Cidi mwine muntwamu ncinyi? Musùmbà wa bapeetudi baa maalú a Nzambi. Ne twêtù peetu, ne dikamakama dya katuyiku nansha tulekela bwa disambila kwenjiibwadi kumpala kwa kubanga bisangilu byetu adi.

206 Ncyênàku mufume ku dibala mwaba ewu ne: “Mmunyi mudi bantu babidi mwa kwendela pamwe kabayi bapunge dîyì? Nzambi katu wenza cintu nansha cimwe to padiYe kayi mucibuulwile basadidi Bende, baprofeta. Mmunyi mudi bantu babidi mwa kwendela pamwe kabayi bapunge dîyì?”

207 Kadi paabi, nyawu tudi ne ba-Muzulumanyi, beena Bouddha, bàdi bàbèngà kwitaba diikalaku dya Nzambi, badi kabayi baneemeka Nzambi, badisu, bikwabo byònsò, muntwamu. Nudi nwela meeji—nudi nwela meeji ne Nzambi mmufwanyine kusòmbela mu cintu bu nanku anyi?

208 “Ee,” mùdi wamba, “aci, ee, s'tudi naabo mu cipungidi. Tudi ne dikubiibwa dyònsò dya beena Wesete.”

209 Bòbò's bavwa ne matunga ònsò mabanyungulukile, bu dikubiibwa. Kadi muprofeta awu wàkamba ne: “Nzambi neanubutule. Anu Nzambi mwine unudi nukwacila mudimu awu ngwanubutula, bwa dikutakana dyenu adi.” Yèyè's uvwa mufwanyine kwamba cintu cimwecimwe aci mu dinda emu. S'ùvwa mwa kutanda bikole be, kubangila anu ku Maison Blanche too ne ku ferme wa mulanda. S'ncyá bushuwa nanku. Ùvwa mufwanyine kubatonokela, ne Dìyì dya Nzambi. S'ncyá bushuwa nanku. Ki ngenzeli wa maalú wa muprofeta mulelela nyèyè awu.

210 “Anji tûtàngilaayi twêtù, maekeleeziya. Kaa, twêtù's ki ekeleeziya munene munsantu wa Katolike kaa cyena Loomo!” Mwine udibo bambe, mu Bible ne, ki MUKAJI WA MASANDI awu's.

211 “Twêtù ki bankambwa baa baataatù, ekeleeziya ya cyena Mishòònyì, yònsò misanga ntete, miikàle yibiikidiibwa ne... miikàle yibiikidiibwa ne Nsangilu wa Maekleeziya wa Buloba bujima.” Ndumba ya MUKAJI WA MASANDI awu, mudi Bible mwambe. Ki cidiYe mwambe menemene ncyòci aci. Uh-huh. Kadi nansha nanku twêtù tudi tudyambidila ne: “Nenku mpinyewu ekeleeziya yònsò yikaadi yendela pamwe.”

212 Mukalenge Collins, mulunda wanyi, mwaneetu wa mu Californie, anyi mu Arizona mwamwa. Webe ka-...webe...

Pete, [Mwaneetu Neville udi wamba ne: “Elmer.”—Muf.] Elmer. Mêmè kwamba ne: “Ee, ngeela meeji ne uyààya ku kaekeleeziya kakese kaa kîmpè kaa ba-Méthodistes.”

²¹³ Yèyè ne: “Mêmè ntu mumupatuke paakayabo kashaala beena Nsangilu wa Maekeleeziya kuntu kwaka apu.”

²¹⁴ Mêmè kwamba ne: “Nzambi akubeneshe. Ukaadi wenda useemenena ku Bukalenge, mwaneetu.” Uh-huh. Eyowa’s, mukalenge.

²¹⁵ Dìyì diswika, ku bukookeshi bwa nsangilu awu pamwe ne bantu abu, ne dilongesha dyabo dikwatakaja kudi bantu adi, biikàle bashiya Dìyì dya Nzambi. Cidi citukengela mmuprofeta leelu ewu, wa utonoka muntwamu ne Dìyì adi. Ncya bushuwa menemene. Eyowa’s.

²¹⁶ Bòbò, badi bakoleshangana ku mwoyi munkaci mwabo. “Kaa, twashaadi beenamu’s. Twètù, beena Mpenta, bushuwa’s, twashaadi beena Nsangilu wa Maekeleeziya wa Buloba bujima, bwalu mwòmò amu tudi ne bwobumwe. Netubakoke bònsò abu.” Byenze mudi mukaji uyààya ku cinwinu cya maala, bwa kuya kakwacika maala ne bayende, bwa wamufikisha kudi Nzambi. Bidi anu mudi mulume uyààya ne mukajende, mu matuku atudi aa, ku cinwinu cya maala, bwa kuya kakwacika maala, bwa wamufikisha kudi Nzambi. Lukutukutu naanyi we! Shaalayi kule ne cyalu cya dyabulu.

²¹⁷ Padi nî ncinyi nî ncinyi civila Dìyì adi, ndi mbengangana mêmè naaci. Aci nciidi cyenza ne ngiikale mubengangane ne bulongolodi bwònsò, bwalu budi bubengangana ne Dìyì. Bivwa bikengela kufikishaci mwena kwitabuuja yònsò ku didyumvwa dya mushindu awu. Huh!

“Ee,” mudibo bamba, “kadi, wavuluka ne, tudi ne. . .”

²¹⁸ Ndi ne citupa cinene mu cibejibeji, cidi muntu kampanda wa ku Arizona muntumine, mushindu udi nkambwa *Kampanda* ewu, dituku adi, mwambe ne: “Paapà Jean wa Makumi abidi ne Mwibìdì,” anyi nî mbishi apa mudibo bamubiikila, “uwva ne. . . Mmuntu mulenga be. Yèyè ki muntu umwepele ukààdikù mwakule pa kusangisha kwa maekeleeziya, beena Katolike ne beena Mishònyì, kaaba kamwe.” Yèyè ne: “Ncifwanyine kubenga kwenzeka mu matuku etu twètù aa, kadi, mu bidimu dikumi ne bitaanu anyi makumi abidi bìdì bìlondà ebi, necyenzeke.”

²¹⁹ Mêmè kudyambidila ne: “Mulumyana, wêwè bu nkambwa, s’udi munkaci mwa kwamba ciprofeta, kadi kuyi mumanye to.”

²²⁰ “Dìbà dikaadi dipite ne patudi twètù tudyelela meeji apu.” Mulumyana mwine udi mucimfundile awu, mmufunde kabidi kumutu kwa dibejì aku ne: “Dìbà dikaadi dipite ne patudi twètù tudyelela meeji apu.” Yèyè pende, ùvwa uteeleja mikaba ya mèyì. Eyowa’s, mukalenge. Kwambaye ne: “Dìbà dikaadi

dipite ne patudi twêtù tudyelele meeji apu.” Yèyè ne: “Mwaneetu Branham, kwakambaku bwalu ebu anyi, kukaadi bidimu?”

²²¹ Mémè kwamba ne: “Bushuwa’s.” Eyowa’s, mukalenge. Cikaadi munkaci mwa kwenzeka, bwalu n’Diyi dya Mukalenge. Cidi ne cya kwenzeka. Bushuwa. Eyowa.

²²² Badi bamba ne: “Ee, nkambwa munsantu ewu, kwèna welaku peebe meeji ne ùvwa ne cya kwikala mumanye cintu kampanda cya cipite aci anyi?” To, mukalenge. Piikalaye uvila Diyi dya Nzambi, mwikàle utangilamu mushindu awu, kèna mwa kwikala mumanye to.

²²³ Nansha nwènù ne baapaapà, baprofeta, ne bakwabo bûngi kaayi munkaci mwenu. Panwikala kule ne Diyi, nudi nwènù anu kule ne Diyi. Aci ki cya bushuwa. Mmuni mudi Nzambi mufwanyineku kubenesha cintu cya bu nanku, pacidibo bavila Diyi diine dya Nzambi? Mmuni mudiYe mwa kubenesha cintu cidi kaciye Diyi Dyende, cintu kampanda cya cibengangana ne Diyi Dyende? Mmuni mudiYe mwa kuvila Dyôdi adi?

²²⁴ Mmuni mùdi mwa kubenesha kansere kadi munkaci mwa kukudya? Mmuni mùdi mufwanyine kubenesha nshinga wa—wa—wa nzembu wùdi mukwate, wamba ne: “Kaa, nkwatè ne ùngooshè”? Aci’s ncifwanyine kwikala katombõtombò’s.

²²⁵ Mmuni mudi Nzambi mufwanyine kubenesha cintu kampanda cidi cibengangana ne Diyi Dyende? Pa nanku alukilaayi ku Diyi! Uh-huh.

²²⁶ Nwènù musumbà wa bayiishi aba, benze bu mbwa ya ditwa naayi buluwà, mbwalu kaayi ebu kunudi? Nupatuka pambelu apa nukapaana bwanaabute bwenu ku dilongo dya musabu, bwa kwikala kwendela mu kashinyi kaa Cadillac anyi cintu kampanda, anyi bwa nzubu kampanda wa munene, wa kântumbwadyùlù mwaba kampanda, ne ekeleeziya munene wa uyiila muliyô wa ndola. Ne bintu byônsò abi mushindu awu, nupaana bwanaabute bwenu, kadi biikàle nuumvwa bundu ne bwôwà bwa kuyiisha disangisha dyenu Diyi dya Nzambi. Ambaayi tûng, kanwena nudyumvwaku nwènù biine bundu anyi? Udibiikila peebe mùdi musadidi, muprofeta wa Nzambi, mwikàle upaana bwanaabute bwebe ku dilongo dya maalu aa pa buloba. Cinwatooya mu enu mayi amu ncinyi? Cintu cimwecimwe cyakatooya Esawu aci’s. Kaa, dipangila kaayi dya ngàsà’s we!

²²⁷ Kaa, to! Nzambi wa cijila udi utàbaleela Diyi Dyende awu, bwa kuDishindika, kî mmufwanyineku kubenesha cintu ciikàle cibengangana ne Diyi Dyende to. Mpindyewu teejeaayi. Ndi mumanye ne ndi munkaci mwa kupicisha dibà ndambu, ne ndi mwa kwikala munkaci mwa kunupangisha mwa kweyela bafwanyine ne kufwa. Kadi, tangilaayi, ndi muswe kunukonkaku cintu kampanda. Mmuni mudi Nzambi wa cijila, Yèyè wàkaakula Diyi Dyende kwamba ne: “Mpindyewu, mau

ne buloba byònsò bibidi nebijimine, kadi Aci kacyakujiminaku to, Dîyi nansha dimwe dya Cyôci aci” awu, mpindyewu mmunyi mudiYe mwa kwangata cintu kampana cidi cibegangana ne Dyôdi adi kadi kucibenasha? Mmunyi mudiYe mufwanyine kucyenza? Tangilaayi. Udi ùjaadika, Yêyè mwine. Yêyè ngudi ushindika Dîyi Dyende. Yêyè udi wamba cidi cya bushuwa, kî nku buumambala to.

²²⁸ Tangilaayi Moaba. Moaba uvwa pende ne Dîyi Dyende, yêyè, Moaba awu. Izaleela uvwa ne Dîyi Dyende; kadi Moaba uvwa ne cimwenekelu cya difwana dya Nzambi, pamwe ne Dîyi Dyende. Baakalambula milambu ya mashi mwandamutekete, ngombe ya bimpanga mizekuke, pa byoshelu mwandamutekete; nomba mupwangane, mulambu wa mashi mupwangane. Pashiishe, pa kuumusha anu abi to, wàkangata bimpanga bya mikooko mwandamutekete, biikàle byamba ne bavwa biitabuuja dilwa dya Mwànà wa Nzambi, ne baakabilambula ku mukuna aku, bôbò ne mwepiskopo wabo wa mutambidile awu. Bantu baabo bônsò baa myânzù mitumbuke, baakwidi baabo bônsò ne baakwidi banene, ne bikwabo byònsò, bavwa biimane mu nyungulukilu amu pamwe ne bamfumu baabo ne bamfumu baa matunga, ne bakwabo bônsò, kî baakabilambula mu wabo paabo mushindu wa ntendeleelu uvwabo mwa kulambula awu, bwa kulwishangana ne Izaleela.

²²⁹ Nenu ki Izaleela wawa mu cibandabanda mwamwa, kaamusumbà kakese kaa bantu bapidye diitabuuja, muvwabi bimweke. Kadi ciwà ne Izaleela ncinyi? Nzambi nguvwa mu cituudilu cyabo. Ùvwa udijaadika Yêyè mwine ne, Yêyè uvwa naabo. Nwamonu anyi?

²³⁰ Bankambwa bavwabo bafwanyine kwikala naabo nansha biikàle búngi kaayi, baapaapà búngi kaayi, anyi nî ncinyi cikwabo, Nzambi kêna mwa kwikala naabo to padiYe kayi udijaadika ne Yêyè mwine udi naabo. Kadi bwa pacidibo anu kule ne Dîyi Dyende apu, ne biikàle bavila Dîyi Dyende, mmunyi mudiYe mwa kwikala naabo? Kakuvwaku bimanyinu bya Nzambi udi ne mwoyi munkaci mwabo to.

²³¹ Mmunyi mudi Nzambi mufwanyine kwikala munkaci mwa beena O.N.U., padibi ne babidi kabeena mwa kwendela pamwe padibo kabayi bapunge dîyi?

²³² Mpindyewu, tangilaayi kuneeku. Kudi Église de Christ, wa ku dînà awu, mudisange ne beena Mpenta. Beena Mpenta badi bamba ne badi biitabuuja dyakula dya mu myakulu. Badi biitabuuja mu cileeji cya Nyuma Mwîmpè, dyakula dya mu myakulu. Badi bamba mudibo biitabuuja *cikampanda*, *cikansanga*, ne *cikankenga*. Badi biitabuuja bimanyinu ne maalu a kukema. Église de Christ udi ubaseka, wamba ne: “Nwênù musumbà wa binyonga ewu! Abi’s bivwa bya matuku àkaadi mapite.” Mmunyi mudi babidi mwa kwendela pamwe padibo

kabayi bapunge dîyi? Kadi bôbò mbadisange. Cidibo benza ncinyi? Badi bakeba dikubiibwa muntu kudi mukwende. Aci cintu ciyiile anu kwaka!

²³³ Dyanyi dikubiibwa didi mu Kilisto ne mu Dîyi Dyende, bwalu Dîyi Dyende n'Yêyè mwine. Ncya bushuwa.

Kakuyiku bimanyinu bya Nzambi udi ne mwoyi to, nansha bya kâna.

²³⁴ Ki cyâkambà Yesu ne: “Mêmè nciyi ngenza ne Dîyi dimwènèshîibwe to, nanku kanùDîtàbùùjî to. Pîikalà Nzambi kayi wakula ne wambila ciprofeta ku Mêmè, ne kayi wambila ku Mêmè ne wenzela ku Mêmè cidi menemene Maasiya ne cya kwenza to, nanku kanuNgiitabuujî to.”

²³⁵ Pashiishe, mwabilaayi kampanda wamba mudiye muprofeta mutuma kudi Nzambi, kadi uvila Dîyi anyi? Nzambi wafwaku luse bwa cintu bu nanku's! Mmunyi mudi Nzambi mufwanyineku kwenza cya nanku?

²³⁶ Lekelaayi nkonke, nkonke eci mpindyewu. Ncyêna—ncyêna mumanye ne ndîbà kaayi dîngààkulàku kabidi neenu to. Aci ncifwanyine kulaala anu kudi Nzambi. Mêmè ndi anu nkungwija Cyakudya, bu mwakangambilaYe mu cikeena-kumona aci musangu awu, mwikàle ncyela mu bipanza.

²³⁷ Nudi bafwanyine kunkonka ne: “Mmunyi muvwa Amosa mwa kudyanjila kumona civwa mwa kubenzekela?” Mona's, maalu's avwa amweka enda anu bîmpè.

²³⁸ Tangilaayi. Mpindyewu tangilaayi apa. Mpindyewu, teejeaayi ne ntema mpindyewu. Bwalu, Eci cyônsò cidi pa mikaba ya mêyi, ne neCiye, neCiye pa buloba bujima. Nwamonu anyi? Mpindyewu, mmunyi. . . Tangilaayi kuneeku.

²³⁹ Ki Izaleela uvwaku wawa. Seminere yabo yivwa mu mushindu mwîmpè kupita muvwayi kwônsò aku. Kakuvwaku muntu nansha umwe ubatacisha to. Bavwa ne ntendeleelu yabo bôbò biine. Kakuyi muntu wa wamba ne: “Kanwena mwa kukuukwila Yehowah” to. “Tungunukaayi,” muvwa matunga a bupangaanu awu amba, “kuukwilaayi. Tudi ne dîyi dipunga, muntu ne mukwende.”

²⁴⁰ Muprofeta awu wakamwena mu cyôci aci. Nwamonu anyi? Muprofeta leelu ewu mmufwanyine kabidi kumwena mu cyôci aci. Nwamonu anyi?

²⁴¹ “Tungunukaayi.” Ki Izaleela kwamba ne: “Ee, tudyayi, tunwayi, tucyonkomokaayi.” Ki kukungwijabo musumbà ne kudyzelabo ndambu wa twitabaayi, ne malongolodi, mangumba, ne bikwabo, ne kubilongololabo byônsò. Ne bakaji baabo bavwa anu ne nsômbelu wa mvwadilu ne ndiilu bya mushinga mukole ne wa mpekaatu kuntwaku. Balumyana wa yaaya, baya naabo mu ngândà ne bikwabo byônsò, bavwale bu badi kabayi bavwale, bavwale tuujipè tukese twa twemweke

twa tunanyika. Nwíkalapù bamone amwe a ku maalú malonda abo—abo a mu miine matuku awu, mmwenekelu mwine uvwabo nende, kaa, ciibwîpì ne cya bisatu cimwe cya bubi budibo benza leelu ewu ebu. Kabayi menemene anu aci to, nansha nanku, bwalu kabavwa mwa kwikala nanku to. Eyowa's. Ne mwine muvwabo benza ne muvwabo baditwala mushindu awu's; ne bamfumu, ne baakwidi, ne bakwabo bônso.

242 Yesu wákamba ne: “Nudi nunyangakaja nzubu ya bakaji bakamba, nwênù beena lubombo aba.” Ki cyakambaYe. Ne bintu byónso bivwabo benza ebi.

243 Muprofeta awu mwimane mwaba awu, mèsù matangija kwinshi aku pa cyôci aci, pa ditunga adi mushindu awu, kabyena bikemesha to pavwa mwoyi mumupandike munda. Eyowa's, mukalenge.

244 Mpindyewu, wêwè udi wamba ne: “Mmunyi muvwaye mumanye civwa mwa kwenzeka aci? Mmunyi muvwaye mwa kudyanjila kucimona? Mmunyi?” Maalu avwa amweneka ônsò enda anu bîmpè. Mona's, bavwa ne byakudya bûngi cyanaana. Bavwa ne bya divwala bûngi cyanaana. Bôbò, bavwa ne ekeleeziya yabo minene. Bavwa benda batanta. Mfranga mimyamina myaba yônso, mvwadilu ne ndiilu bya mushinga mukole. Maja mu mùsèèsù, masandi, ne bintu bikwabo byônso kacya anu byangatangana, ne maalú ônsò miikàle enda anu bilenga. Anu mudi Amerike leelu ewu emu. Télévision mmûle tente ne mineku ya bundu, bakaji bavwale bu badi kabayi bavwale, ne bikwabo byônso. Cyônso cyûdi umona cidi anu bintu bibi kumona ne mpekaatu. Kabiyi bikengela kutangila ku télévision to, ûkangulè anu mèsù, ûtangilè kwônso kuwâtangilà aku. Bânà baa bakaji, bânà baa balume, bantu balume, bantu bakaji: banwa mfwanka, banwa maala. Ba-Izabela abu badibiikila mudibo beena Kilisto. Démons ya bukooya ayi yidibiikila ne ba-Méthodistes, ba-Baptistes, ba-Presbytériens, beena Katolike, ne beena Mpenta. Uh-huh. Uh-huh.

Kabyena bikemesha to mwakafikishaci twisù twende atu ku dishaala tukese paakatangilaye. Huh! Ncya bushuwa's.

245 “Mbimweke byônso anu bîmpè. Mmunyi mùdi mwa kubisungila? Patwikala mwa kwenza...Mmunyi? Mmunyi? Tangila kunu. Ee, tudi—tudi bapete bakwabo mùllyô mujima. Tudi—tudi bapete. . .Tudi. . .Bitanda byetu bidi, kaa, ekeleeziya yetu mminene be, bikengela twibake ekeleeziya mipyamipya. Ee, tudi ne mfranga yâbûngi be, mu mushindu wa bapange ne cya dyanza naayi. Mona's, tudi bafume ku dyasa myaba ya mitambe bwîmpè mu—mu ditunga. Ekeleeziya ya mitambe bunene yidiku ayi, twètù ki beenayi. Kadi tucidi anu ne mfranga bûngi cyanaana. Kwèna welaku peebe meeji ne Nzambi ngudi mutubeneshe awu anyi?” To. Nudi kule ne Diyì Dyende.

246 “Nenku, Mwaneetu Branham, udi muswe kwamba ne Nzambi neabutule byòbi ebi anyi?” Eyowa’s, cyònsò cya kudibi.

“Wêwè wâmanyi bishi?” Amosa, wêwè wâkamanya bishi?

247 Anu mùtù ngangabuka ùjandula dîsaamà amu. Padiye upeta dîsaamà didi pambidi paa mubeedi adi, yêyè udi umanya cya dýenza. Ûdi umanya cidî mubeedi awu usaama. Ûdi umanya ne dîkaadi mu cipidi kaayi. Ne yêyè udi umanya ne ciikalà mwa kwenzeka ncinyi. Ki mushindu udibi ne muprofeta, muprofeta mulelela, padiye umona. Cinudi nwênù nwenza nansha ciikàle cinyi. Padiye yêyè umona mpekaatu wenda usemena, nkansere kâtù kadya aku. Ne kâkaadi kadyè bikole, mu beena Mpenta ne bakwabo baabo bònsò, mu mushindu wa kakaciyi mwa kwalukila cyanyima to. Kakaadi mu cipidi cibandile. Nebabutuke.

248 Mushindu awu ki wakapeta Amosa mwa kujandula dîsaamà adi. Wâkadijandulwila ku Dîyî dya Nzambi. Mushindu awu ki udi mu—muprofeta wa bushuwa ùjandula dîsaamà adi, ne wâmbila bakaji abu ne: “Kanwikadiku nwardidinga nwâya ku Cîlumbulwidi ne nsuki mibebula to, peenu bamanye cidî cîmpè.” Ûdi unwambila nwênù balume, bakwabo beenu, ne nwênù bayiishi badi bavila Dîyî aba, cibî biikàle ne cimwenekelu cya difwana dya Nzambi, kadi biikàle nudivwija beena malongolodi, bwa kwepela bwalu budi panshi, peenu bamanye cidî cîmpè. Nudi nutangila Dîyî dimwedimwe adi didi baprofeta balelela bafwanyine kutangila. Dijandula dya dîsaamà ndyambe ne: “Lufu! Ditapuluka!” Anu mùtù ngangabuka amu, mmumanye dîsaamà. Mmumanye ne mbileeji bya dîsaamà bya mushindu kaayi bìdi naabi dîsaamà adi.

249 Tangilaayi ditunga edi. Panudi nwamba ne: “Mpenta wabwelakanyi.” Padibi ne, kabeena bàswà nansha bwa kukulekela ulwa mu ekeleeziya to, ne bwalu udi uyiisha bakaji pa nsuki mibebula, Bible pende mwikàle ucipiisha. Baciina ne nkwepi kuwavwa kwamba cintu kampanda pa . . .

250 Mwab’ewu dituku dikwabo, pâmvwà ngenza tumpanye kampanda, Roy Borders uvwa, ku Côte Ouest kwaka, baakalwa nende pamwe, musumbà wa bayiishi, biipacila, bu, kaa, ngeela meeji bavwa makumi anaayi anyi ataanu a Kabamba, kûmvwà mukenze disangisha dinene aku. Bòbò kwamba ne: “Mukalenge Borders, ndi muswe nkukonkeku cintu kampanda.” Bòbò ne: “Neya bushuwa ne Mwaneetu Branham utu ukwata mudimu ne Dîna dya Mukalenge Yesu Kilisto bwa kubatiiza anyi?”

251 Mukalenge Borders, muntu mukalanga ne mutalale maalu udi udineemeka bikole, munutu bamanyine Mwaneetu Borders mwab’ewu amu. Yêyè kwamba ne: “Bakalenge,” yêyè ne, “Mwaneetu Branham awu, patuye upatuka uya mu tumpanye, pambelu, bu mudi aka,” yêyè ne, “kùtu ùyiisha to. Utu yêyè

ùtùngunuka anu ne kusambidila kwa babeedi beenu. Ki citùye ùtàmba kwenza ncyòcì aci.”

252 Awu ne: “Kî ng’aci cîndi mêmè mukukonke to,” mwakamba mukulu awu. “Ûtu ùbàtiiza nanku anyi?” Mpindyewu, bôbô abu’s bavwa ne mikaba ya mèyi. S’mbamanye. Yèyè awu ne: “Ûtu ubatiiza mu Dîna dya Yesu Kilisto anyi?”

253 Yèyè ne: “Eyowa, mu ekeleeziya wende yèyè. Ki mwaba umwepele utuye ubatiiza, mmu ekeleeziya wende yèyè.”

254 Awu ne: “Wáfikì. Ki cyònsò cîndi mêmè njinga kumanya ncyòcì aci. Katwena nende dijinga to. Katwena baswe dipambuka adi munkaci mwa bantu beetu twètù to.”

255 Nenu dituku dikwabo, mulunda wanyi mulenga, Ed Daulton, paakapetaye mukanda mumufundila kudi ekeleeziya wa ba-Baptistes. Awu ne: “Twâkwipàcì mu bwobumwe bwa ba-Baptistes, bwalu udi mukashaale mwena dipambuka dya kwikala mubatijiibwe mu Dîna dya Yesu.”

256 Mêmè ndi muswe kwimana pamwe ne Pòlò ne: “Mu cidi baa pa buloba babiikila ne ndipambuka aci, ki mushindu wûndi nkuukwila Nzambi, bwalu cyòcì aci ki Dîyì Dyende.” Eyowa’s, mukalenge. Eyowa. Kaa, cya bushuwa’s.

257 Ngangabuka ùdi ùjandula disaamà. Ùdi ùmòna mwaba ùdidi disanganyibwa. Muprofeta mulelela ùdi ùjandula disaamà, ku Dîyì. Ùdi wenza cinyi? Ngangabuka ùdi wenza dijandula dyèndè dya disaamà, ku bileeji bya disaamà adi. Ncya bushuwa anyi? Ùdi utangila bileeji abi ne umona cidi mubeedi awu usaama. Ùdi umona cipidi cikaadi disaamà, wamba ne: “Kakucyena cya dyenza nansha cimwe to.”

258 Nenu muprofeta mulelela ùdi wàngata Dîyì dya Nzambi ne ùjandula màsaamà, wèlamù Bwanga. Kadi bantu bamupingajila bamwasaBu mumpala. Cyalwa kwenzeka ncinyi? Kubutuka, kwajiki; musumbà wa bantu banangi baa masanka, beena lubombo bàdi ne meeji matuma ku maalu a pa buloba! Kadi’s ki ngenzèlu wa maalu wa muprofeta mulelela. Nwamonu anyi? Kaa, ekelekele!

259 Yèyè udi umona màsaamà. Wàkamòna ne bakaavwa baye kule ne Dîyì. Wàkamòna Dîyì. Nenu yèyè uvwa mumanye bipeta bivwa bilwa. Wàkamòna mvwadilu ne ndiilu bya mushinga mukole mu nsòmbelu wabo, wàkamòna mushindu uvwa bakaji abu benza maalu awu. Wakamona mushindu uvwa baakwidi abu benza, mushindu ukaavwabo baye kule ne dikuukwila dilelela dya Nzambi, ne bintu bya mushindu awu. Mwaba awu, ki yèyè kupeta—ke yèyè kupeta dyandamuna. Kwambaye ne: “Nzambi mwine unudi nulaka mukana nwamba nenuMukwacile mudimu awu ki wanubutula.”

“Bwa cinyi?”

260 “Kanwena balame Mèyì Aanyi to.” Kadi paabo’s bavwa badyelela meeji ne bavwa baalamè. Ncyèna mufume ku dicibala mwab’ewu anyi? Mvensa mwi2, mwi4. . . nshapita mwi2, mvensa mwi4: “Bwalu Ngâkakusungula bwa wêwè kwikala. . . Ku famiye yônsò ya pa buloba, Ngâkakusungula wêwè, kadi nansha nanku udi ubenga bwa kwendela mu Mèyì Aanyi.” Nudi nwela meeji ne. . .

261 Muprofeta wa katupa, wa mutu dibàla mwimane mwaba awu ne mwevu wa mvya awu; lutangilu lwa kaluyi lusankisha lumwenekela mu mèsù ende, apatula midilu; wakula ne musumbà wa baakwidi abu ne bikwabo, wamba ne: “Nzambi mwine unudi nwênù beena lubombo aba nudingidija bu badi baMukwacila mudimu awu, anu Nzambi umwèumwè awu ki wanubutula.” Nudi nwela meeji ne ùvwa mufwanyine kupeta dimwela dya mu diboko? Huh! Wâkamba ne. . . Kaa, ekelekele! Yèyè, muteetaayi lelu ewu kadi numone nî mmufwanyine kucipeta. To. Kadi yèyè ncinyi? Ki ngenzeli wa maalù wa muprofeta mulelela nyèyè awu. Yèyè uvwa ne Dìyì. Ùvwa mumanye ne Divwa cinyi.

Bu muvwa Miika wa kale. . .

262 Mwânà mukese ûngâlâmbulu awu, ndi mulekele bimwe bintu, mu ndambu wa tusunsa emu, bwalu ndi ndwijakaja bwa dîbà.

263 Kadi, Miika, paakiimanaye kumpala kwa Aakaba, yèyè wakabatangila. Ùvwa mumanye Dìyì. Miika wakabambila Dîyì. Bwa cinyi? Miika wakajingulula cikeena-kumona cyende, Dilongesha dyende, ku Dîyì dya Nzambi. Ne wâkamona ne Dilongesha dyende ne Dìyì bivwa cintu cimwe. Bwalu, Dìyì divwa dyambe ne Yèyè neélè Aakaba mulawu, ne Neafikishe mbwa ku dilaka dya mashi ende. Ki civwa Dîyì dyambe.

264 Pa nanku, Miika kupetaye cikeena-kumona. Mbwena kwamba ne, yèyè uvwa muprofeta. “Ngânjì mmonebi ne n’Dìyì kaayi didi dilwa kùndì.” Kì kusambilaye ne: “Éyì Mukalenge Nzambi, cîndì ne cya kwenza ncinyi? Cîndì ne cya kwambila musumbà wa bayiishi badi biimane mwab’ewu aba ncinyi? Ke malongolodi ônsò ngôwò aa. Bwônsò bwa kudiwu mu ditunga emu mbudikungwije anu bwa kundwisha mêmè, Mukalenge. Kì mêmè ewu mwimane kumpala kwa mfumu. Cîndì ne cya kwamba ncinyi?”

265 Kì kubwelaye mu cikeena-kumona. Kwambaye ne: “Tungunuka ndaaku. Tungunuka ndaaku.” Yèyè ne: “Kadi ndi mumone Izaleela mutangalake bu mikooko kayiyi mulami.” Eyowa’s.

266 Mukulu wa distriki awu—awu kuseemena e kumunangulaye dipi ku mishiku, kwambaye ne: “Dìyì dya Nzambi, Nyuma wa Nzambi, mmufwanyine kwikala muye penyi, pâpâtukuYè munda mwanyi mêmè?” Mupatuke munda mwende yèyè?

267 Nudi bamanye cyàkambà Nzambi anyi? Ûvwa mulekele démon mupweke panshi, mubwele munkaci mwabo amu, bwalu bavwa kule ne Dîyi, anu kwine kwônsò aku.

268 Bible mmwambe ne: “Bôbò kabayi baswe kwitabuuja Dîyi to, Yèyè neabape diitabuuja dikole dya mafi, bwa kwitabuujabo mashimi, ne nebapiishiibwe ku cyôci aci.” Ki cyôci aci menemene cidid malongolodi aa ne bantu baa mu ditunga edi munkaci mwa kwenza leelu wa Ndaaya ewu, biitabuuja mashimi, bwa kupiishiibwabo ku ôwò. “Bwalu kakwena dîngà Dinà difila mwinshi mwa Dyulu munudi ne cya kusungidiibwa to.” Londaayi, nwênù beena malongolodi, ne bikwabo. Eyowa.

269 Mpindyewu, bakwabo abu bakenza cinyi...?..Bakwabo baprofeta aba bavwa bôbò batangila ku cinyi? S’bavwa baprofeta. Eyowa’s, mukalenge. Bavwa baprofeta. Kadi bu ne bavwaku banji kwimana bwa kukenketa ciprofeta cyabo aci ne Dîyi’s!

270 Bu ne ba-Méthodistes bavwaku banji kwimana leelu ewu bwa kukenketa ciprofeta cyabo aci, nunku kî mbamyamineku mukwabo muntu mâyi to. Nunku’s mbapete Nyuma Mwîmpè. Nunku mbabatiize muntu ne muntu mu diinyija dya mu mâyi, mu Dînà dya Yesu Kilisto. Bu ne beena Assemblées de Dieu bavwaku banji kwimana leelu ewu bwa kutangila ciprofeta cyabo aci, nunku’s mbaalukile ku Dîyi. Bu ne ba-Unitaires, leelu ewu, bavwaku banji kwimana bwa kukenketa ciprofeta cyabo aci, nunku’s mbaalukile ku Dîyi.

271 Kadi, nudi numona’s, bu ne baprofeta abu bavwaku banji kwimana bwa kukenketa ciprofeta cyabo aci’s! Baakalukakaja bôbò lungenyi. Baakamba ne: “Buloba abu’s mbwetu twêtù. Pa nanku netuye mu Laamota-Gilada tûkabwângâtè, bu mudibi ne mbwetu twêtù. Yoshuwa ngwâkatupêeshabù.”

Kadi Miika wàkamba ne: “Aci cidid cyumvwika cya meeji.”

272 Kadi’s ki mudici. Kabyena bikengela nwênù kulukakaja lungenyi to. Bidi bikengela nwênù kwitabuuja cidid Nzambi mwambe. Kanulukakaji lungenyi pa cintu nansha cimwe to.

273 Ambaayi tûng bu Abraham mulukakaje lungenyi? Mmunyi muvwaye mufwanyineku kuumuka mu buloba bwende abu? Mmunyi muvwaye mufwanyineku kufika ku bidimu lukama, mutugunuke anu ne kupa Nzambi butumbi, ne muvwabo bafwanyine kupeta mwânà kudi Sarah, wa bwalu pende ne bidimu makumi citeema?

Imanshaayi dilukakaja dya ngenyi. Itabuujaayi anu naka.

274 Wèwè udi ulekela dyabulu ukwambila ne: “Udi mumanye’s, Mwaneetu Branham awu kèna cîngà cintu to anu cyena lubombo.”

275 “Mpindyewu, ndi nganji kwindila, mmonebi ní ki cidiyè’s. Twânji tumonebi tûng ní udi uyiisha bya cya bushuwa. Ngânji

ngaalukilebi ku Bible.” Kwidikijiku, kwidikijiku wâya . . . Yêyè kaakukulekela wenza aci to. To, to. Wamonu anyi?

276 Kadi yêyè neámbe kaacintu kabi bwanyi mêmè, kadiye mufwanyine kwikala ne bukenji bwa kwamba aku, kadi wêwè ushaala anu kacya wâlama ciine aci, wimana kadi kubanga kulukakaja lungenyi ne: “Eyowa’s. Kabivwa bikengela kwikalaye mwenze *cikampanda*. Kabivwa bikengela kwikalaye mwenze *cikansanga* to.” Dya ubanga kuntangila nunku anyi, ee, ubipeta anu bûngì cyanaana.

277 Peebe’s uvwa mufwanyine kwikala utangila Mukalenge Yesu. Udi mwa kubipeta bûngì cyanaana. Mutangilebi Yêyè tûng, katanci kakese cyanaana. Nêmvwijè yônsò wa kunudi aku alwe mwambi. Mpindyewu netwânjì kupwa mwoyi bwa ne Yêyè ukaavwaku pa buloba apa kacya. Ki Mwânà wa balume nyêyè ewu udi mujaadikiibwe, mu ditunga dijima ne, Yêyè m’Mwânà mulela wa—wa panshi. Mamw’Ëndè wakaMwimita kumpala kwa mamw’Ëndè ne taatù kuselanganabo. Aci ncijaadikiibwe. (Mpindyewu, bôbò kabeena baya ku Dîyi dya ne: “Virgo neimite difu” adi to.) Badi bôbò baya anu ku cidibo bumvwa bamba aci, nwamonu’s: “Mwânà wa mu masandi”. KabaakaMwambaku ne Yêyè uvwa mulela mu mpekaatu, kadi kukeba bwa kubalonesha anyi? Ndi . . . Nwamonu anyi?

278 Kadi tangilaayi bivwaYe wenza. Mu bushuwa bwa bwalu Yêyè’s uvwa anu upandulula ekeleeziya yônsò uvwa mu ditunga amu. Civwa cya bushuwa anyi? Malongolodi, bikwabo byônsò.

279 Ûvwa Yêyè cinyi? “Anu Mwânà wa balume kampanda mukole luuluulu mwikàle anu watwa apa watwa apa mushindu awu, Nsongaalume mujima, kayi wa mu dingumba nansha dimwe. Anji ngambilabi tûng Wêwè mwine ewu ne udi wa mu ekeleeziya kaayi. Tatw’Ëbè nganyì? Muwâmbì ne Yozefu kî ntat’Ëbè to?”

“Yozefu kî ntatw’Ënyì to,” muvwaYe mufwanyine kwamba.

“Ee, kadi Webe Tatw’Ëbè ki nganyì?”

“Nzambi ki Tatw’Ënyì.”

280 “Ee, Wêwè mukoleshi wa maalu ewu! Aci menemene’s ki cyûdi Wêwè. Wêwè ewu, mwikàle Muntu, kadi wamba ne Nzambi ki Tatw’Ëbè?”

281 Bu ne bavwaku bacikenkete ku Dîyi’s we! Aleluuyah! Kanwenaayiku numona ne bwalu budi cinyi anyi? Bivwa bikengela bwa Dîyi kwandamukadi mubidi. Kabaakakenketa cikeena-kumona cyabo ku Dîyi to. Ki bwalu mbwòbù abu’s.

282 Ki lutatu ludiku leelu ewu ndwòlò alu. Kanwena nukenketa bikeena-kumona byenu ne . . . ciprofeta cyenu—cyenu ne dilongesha dyenu, ku Dîyi dya Nzambi to. Muntu uteeta bwa kukwambilaku Bulelela, wambulangana nende mwaba awu, anu

muvwa Amosa mufwanyine kwenza, mwakenza Amosa. Nwènù nudi nwenza cintu cimwecimwe aci.

283 Mpindyewu tangilaayi kuneeku. Yèyè nyewu mu ngiikadilu ewu. Mpindyewu, wèwè's uvwa mufwanyine kwikala muMupishihe, pàmwăpa, ncyā bushuwa, bu ne kuvwa mwalukile ku Dîyî. Badi benza cintu cimwecimwe aci. Badi baMupishiha leelu ewu.

284 Ambaayi tŭng bu ne nwènù bakaji, *apa* ne *apa*, eyowa, bwa cinyi kanwenaayiku nukenketa mmwenenu wenu wa nsuki mibebula awu ku Dîyî, bwa kumona ne Didi dyamba cinyi? Nwamonu anyi? Bwa cinyi kanwenaayiku nwenza bintu abi?

285 Bwa cinyi kwênàku ukenketa dibatiiza dyebe, dya “Taatu, Mwânà, Nyuma Mwîmpè” adi, “busatu” bwa mashimi abu, mudibo babubiikila, bidî kabiyi cîngà cintu to anu midimu isatu ya Nzambi unwepele, myânzù? Kakûtukù *dînà* paadi ne “Taatu” to. Kakutuku cintu paaci ne, *dînà* dya “Taatu, Mwânà, ne Nyuma Mwîmpè” to.

286 Dînà dya Taatu, Mwânà, ne Nyuma Mwîmpè, didî diikàle, “Mukalenge Yesu Kilisto.” Kenketa dibatiiza dyebe ku mushindu udi muntu ne muntu mubatiijibwe mu Bible. Bu wèwè mwa kukenketaku meeji ebe ku Dîyî, nunku's udi—nunku's udi mwalukile ne mubatiijibwe mu Dînà dya “Mukalenge Yesu Kilisto.”

287 Ki cyakabambila Pôlò bwa kwenzabo. Nenku yèyè wakamba ne: “Muntu mukwabo nansha bamwamba ne nganyi yèyè mulongeshe cintu kampanda cishiilangane, ediibwe—ediibwe mulawu, nansha byôbi ne m'Mwanjelo mutuuluke.”

288 Nudi bamanye's, misangu yâbûngî, Banjelo batu batuuluka. Balumyana wa yaaya, mushindu mwine udi Mpenta usukumina ciine aci's we!

289 Twămbè bishi pavwa Martin Munsantu mwimane mwaba awu, kadi ki kampanda munene wa ubalakana nyèyè ewu mwimane kumpala kwende?

290 Muntu uvwa ubatiiza mu Dînà dya Yesu, witabuuja dibatiiza dya Nyuma Mwîmpè, ne mulame Dîyî's! Kadi beena Loomo bamwipata ne bamwenzela nî ncinyi cyônsò, bakeba kumupa mèyî abo maswika ne malongesha abo makwatakaja kudi bantu awu. Muntu awu uvwa mwimane pa Dîyî.

291 Dîngà dituku, mu bukole bwende, badémons bavwa mwa kulwa ne kuteeta kuyiikila nende. Yèyè kavwaku mwa kuteya ntema ku bivwabo bamba abi nansha.

292 Dîngà dituku, Sataana kulwaye mushindu awu, mwenze bu Kilisto, mwase cifulu cya butumbi, muvwale pântufùlè ya ngòlò, kwimanaye mwaba awu e kwamba ne: “Kwênà. . .” Ndimi ya kapyā mimunyangulukile. Yèyè ne: “Kwēna unjingulula anyi, Martin? S'ki mēmē Mukalenge webe ewu. Nkuukwilāku.”

Martin kushaalaye kacya wamutangila. “Kudi cintu cipampalamuke mwaba wawa.”

293 Yèyè ne: “Martin, kwèna mwa kunjingulula anyi?” Yèyè ne: “S’ki mèmè Mukalenge ne Musungidi webe ewu.” Yèyè ne: “Nkuukwilàku’s.” Kwambaye nanku misangu yisatu mijima.

294 Ki Martin kukenzakana. Kumonaye ne, Kilsto neashiibwe cifulu cya butumbi kudi bantu Bende, ku Dilwa. Yèyè kavwa mwa kwikala muvwale pàntufùlè ya ngòlò to. Yèyè kwamba ne: “Nkàtùkilè mwaba ewu, Sataana.”

Balumyana wa yaaya, beena Mpenta kabavwaku bôbò bafwanyine kwikala basukumine ciine aci anyi? “Balumyana, Mwanjelo wa bukenke bukole’s we!”

295 Mukaji awu kulwaye, mu Chicago mûngùikalà ne cya kuya amu, wamba ne: “Mwaneetu Branham, bambi baa kuntu kwaka badi bamba ne bu biikalaku ne Mwanjelo ngudi mukwambile bwa kubatiiza mu Dîna dya Yesu, nunku mbacitàbekù. Kadi cyòci aci mmeeji ebe wèwè anyi?”

296 Mèmè ne: “Bu Mwanjelo wa Mukalenge mwa kwamba cintu cibengangana ne Cyòci aci, awu kî mmufwanyine kwikala Mwanjelo wa Mukalenge awu to.” Nwamonu anyi?

297 Mwanjelo nansha yèyè nganyi mwa kwamba cintu cibengangana ne Dîyì *edi*, aci cùikalè mashimi. Ne muntu yèyè mukwambile, musanjeela wa kudi Nzambi, wamba ne ngwa kudi Nzambi, kadi ukwambila ne: “Mbikumbane bwa kubatijiibwa, mu dîna dya ‘Taatu, Mwànà, Nyuma Mwimpè,’” ikale mwena mashimi.

298 Muntu yèyè mukwambile ne: “Mbikumbane bwebe wèwè, bwa kwikala ne nsuki mibebula, ne bintu bya mushindu awu; ne bivwa bikengela wèwè kwikala uvwala cifulu mu ekeleeziya, pa mwaba wa kafulu kaa cijengu, ‘bwa kwikalaku bu cibwikilu,’” ikale mwena mashimi.

299 Dîyì dya Nzambi, ki didi Bulelela. Cyònsò cya ku bintu bidi bibengangana ne Dîyì ebi, cùikalè mashimi. Anu Dîyì, ki didi Bulelela. Dyòdi ki dyashaala anuku.

300 Ki bwa cinyi Miika uvwa mwa kumanya ne ciprofeta cyende civwa cya kudi Nzambi, bwalu civwa cikumbanangana ne Dîyì dya Nzambi. Eyowa’s, mukalenge. Cikeena-kumona cyende civwa cijaalamangane anu menemene ne Dîyì dya Nzambi.

301 Kaa, bu ne Amosa uvwa mwaba ewu, uvwa mwa kushaala ne Dîyì. Neya bushuwa. Kadi, nudi numona’s, lutatu lelu ewu, lutudi naalu twètù, ndufwanangane ne luvwabo bôbò naalu. Nkaadi ndilongolola bwa kujikija. Lutatu lutudi twètù naalu ndufwanangane ne luvwabo bôbò naalu. Bôbò bavwa balongeshiibwe, kule ne Cishimikidi. Yesu wàkamba ne: “Nudi bavwije Dîyì dya Nzambi kadiciyi ne bwenzeji nansha bukese to bwa bilele byenu.” Ne dibatiiza dya mashimi adi! Cimanyinu

cya mashimi cya dipeta dya Nyuma Mwîmpè aci! Bamwe baa kudibo mbambe ne: “Labulangana ku cyanza.” Bakwabo baa kudibo mbambe ne: “Akula mu myakulu.” Mêmè ewu’s nkaadiku muumvwe démons yakula mu myakulu, ne yelangana mwoyi ku cyanza, yôyi paayi. Eyowa’s, mukalenge. Kaciyi cimanyinu cya Cyôci aci to. Mpindyewu, bintu byônsò ebi mushindu awu, bintu byônsò abi, nwamonu’s, nudi nuya kule ne Dîyi dya Nzambi bwa kulongesha bilele abi. Neya bushuwa.

Mpindyewu, yêyè, s’bivwa bikenglea bwa kwikalaye munwâlùje ku Dîyi.

³⁰² Kadi twètù, tudi ne balongeshi beetu leelu ewu, mbalongeshe bantu, kule ne Cishimikidi cya Dîyi dya Nzambi. Mpindyewu teejeaayi ne ntema.

³⁰³ S’ki cyakenzabo kuntwaku. S’ki cyôci aci civwa Amosa ubambila. “Anu Nzambi mwine unudi nulaka mukana nwamba ne nudi bamanye awu, Yêyè awu’s ki Mwine wanubutula.”

³⁰⁴ Mpindyewu, tudi babalongeshe, kule ne (cinyi?) Cishimikidi cya “Diiitabuujja dyâkafidiibwà musangu umwe kudi baataatù baa mpenta,” eyowa’s, Bible. Balongeshe mpurgatoriyo wa mashimi! Balongeshe dibatiiza dya mashimi! Bintu byônsò, bya mashimi, bya mashimi, bya mashimi, bitapuluke ne Cya ku muji.

³⁰⁵ Kanwena nuciitabuujja anyi? Alukilaayi ku Bible, bwa nwangate “mpurgatoriyo” wenu awu, ne nwangate “Taatu, Mwânà, Nyuma Mwîmpè” wenu awu, ne “dimyaminangana” dya mâyi adi, ne bintakanyi byônsò abi, kadi nwalukile numone nî mbya mu Mifundu. Ki ngenzèlu wa maalu nyêyè awu. Jandulaayi numonebi ní bidi pa Cishimikidi. Nwamonu anyi? Bidi kule ne Cishimikidi.

³⁰⁶ Bya bwalu, Pòlò mmwambe ne...Bible—Bible ngudi mwakule wamba ne—ne...ne: “Ekeleeziya wa Nzambi mmwibakila pa Dilongesha dya bapostolo ne baprofeta.” Bidi bikengela bwa bapostolo ne baprofeta biikàle cintu cimwe. Bushuwa’s.

³⁰⁷ Cinyi? Tudi baye kule ne Cishimikidi cya Dîyi aci, baye ku bishimikidi bya cyena mangumba.

³⁰⁸ Teejeaayi mpindyewu. Nyewu nkaadi njikija. Asaayi bya mu maci bya luumvu lwenu lwa nyuma abi. Teejeaayi.

³⁰⁹ Tudi baye kule ne Cishimikidi cya Dîyi, baye pa cishimikidi cya cyena mangumba. Ndi mufwanyine kushaala pa ciine aci too ne ku dîbà kaayi? Mèbà makwabo asatu’s. Buumuke ku Cishimikidi cya Dîyi, baye ku cishimikidi cya bisankasanka bya maalu a pa buloba, maalu a pa buloba, nsômbelu wa masandi wenda udifinda mu ekeleeziya. Kule ne Dîyi, baye ku twitabaayi. Mbifwanyine kungangata mbingu yisatu bwa kuciyiisha kucimana, anyi kushiikila munkaci, anu maalu anaayi a dyela nsêke mwaba awu mene. Kule ne Dîyi, baye ku

dingumba kampanda, ku dîyi dya cyena mangumba. Pakaadi anu—anu ekeleeziya udivwiya dingumba, ûkaadi kule ne Dîyi anu pa dîbà mene adi.

³¹⁰ Kudi cintu anu cimwepele. Kwalukila buludi mwaba uvwaci ciimanyine awu, kadi kwasulula lwendu. Kwalukila ku Dîyi. Neya bushuwa. *Kunyingalala* mbwena kwamba ne “kuya, kukudimuka, kutangila kûdi ufuma.” Nudi nwenda nuya kwa cyanaana. Eyo.

³¹¹ Dingumba dya bisankasanka. Dingumba dya maalu a pa bulob-... Ci—cishimikidi, ki cîndî nswa kwamba, cya—cya bisankasanka, cishimikidi cya maalu a pa buloba, cishimikidi cya twitabaayi. Ne byônso abi, pamwe, mbitooye dinyanguka dya masandi, dinyanguka dya nyuma.

³¹² Yêyè bu muprofeta mulelela, ùvwa mufwanyine kumona mu twètù aba anu menemene cyakamonaye mu bôbô aci. Bu ne yêyè uvwa mwimane mwab’ewu pa cibumba cya ku cyambilu eci leelu ewu, ne mêmè kwamba ne: “Mwaneetu Amosa, muprofeta munene wa Nzambi, wêwè utu kuyi bwôwà ewu, lwâku apa wangate kaaba kaanyi,” s’ùvwa mufwanyine kuyiisha Dîyi edi. Ki divwaye ne cya kuyiisha. S’mmuprofeta. Eyo. Ûvwa mufwanyine kuDiyiisha anu menemene mushindu udiDi difundiibwe, anu citudi twamba mpindyewu eci. Eyo. Ncivwaye mufwanyine kwikala, kumona musangu awu cidiye mumone mu twètù aci, kanyawu kaa nsòmbelu wa masandi.

³¹³ Anji tangilaayi, balunda baanyi. Mbanganyi mwab’ewu, mu ekeleeziya emu mpindyewu, bàdî bamona ne buloba bukaadi mu kanyawu kaa nsòmbelu wa masandi? [Disangisha didi dyamba ne: “Amen.”—Muf.] Mona’s, tudi bamanye ne ki mukaadibu. Ncilumbu kaayi eci? Bukaadi kule ne Dîyi. Cya bushuwa’s. Eyo.

³¹⁴ Amosa kaakadyulaku bukalenge to. Nukaavwaku bamone bwalu abu mwab’ewu, panwaya kabala panwikala baalukile kumbelu? Kaakadyulaku bukalenge to, wakadyula ekeleeziya bwa disungula dya bukalenge bwa mushindu awu. Hum!

³¹⁵ Nwênù beena cidîidî, lekelaayi ngânjî nnubweje bikole cyôci aci bwa katanci, apa ne pa buloba bujima, mwayaci. Ekeleeziya ngwâkasungula cintu paaci ne n’Yelobama awu. Ndi ndikonka ne nwênù, twètù, ní katwenaku benze cintu cimwecimwe aci? Twânjîbi kwamba ne mbukalenge bwîmpè; bukalenge kabwenaku mwa kwibaka nzubu pa lubwebwe to padi bantu basungule nzubu mu lusenga. Budi mwa kucyenza anyi? Kanwikadi nwamba ne: “Bukalenge bwetu! Bukalenge bwetu!” to. Nnwênù, ditunga. Mbantu. Mmunyi mutudi mwa . . .

³¹⁶ Mwambi kampanda wakangambila, ne: “Mwaneetu Branham,” yêyè ne, “tangila. Ndi mumanye ne udi mubinge mu Cyôci aci. Kadi,” yêyè ne, “mêmè anu mudidinge muyiishe Aci, dingumba dyanyi ndifwanyine kungiipata, bantu baanyi

mbafwanyine kungiipata mu ekeleeziya.” Yèyè kwamba ne: “Ncyakuyiishaku dikwabo diyiiisha to.”

Mèmè ne: “Yiisha Cyôci aci, nansha bya kumona lufu.” Eyowa’s, mukalenge.

³¹⁷ S’n’Diyi dya Nzambi. Wêwè’s udi mwambule bujitu. Wêwè mwikàle muprofeta wa Nzambi, mulelela, neushaale ne Dîyi. Kabiyi nanku to, neushaale ne dingumba dyenu adi. Mbilondeshile kûdi wêwè mufumine.

³¹⁸ Tangilaayi. To, mukalenge. Katwena mwa kwibaka, bukalenge kabwena mwa kwibakila nzubu pa Lubwebwe lushindame to padi bantu beela tukanda bwa kusungula nzubu wa bisankasanka pa lunteka.

³¹⁹ Tangilaayi citudi twêtù baswe. Twánjàayi kwangata anu kasunsa kamwe cyanaana mpindyewu. Ndi ntekemena ne ncyêna munkaci mwa kunucyokesho to. [Disangisha didi dyamba ne: “To.”—Muf.] Kadi tutangilaayi citudi twêtù baswe, mu kasunsa kamwepele cyanaana. Ncyêna mwa kupicisha aka kaadiyi kaa dyela nseke aka to, kaadiyi kândi mufunde aka. Tangilaayi citudi twêtù baswe.

³²⁰ Tangilaayi wetu télévison. S’ki citudi twêtù baswe ncyôci aci. Tudi baswe bwa bamwe baa ku benji baa bikàsà abu biikàle biimane mwaba awu bwa kwikalabo bamba mineku ya bundu ya mishindu yônsò, nenku twêtù tushaala kumbelu tupumbisha disangisha dya milombo dya mu diisâtù diloolo, anyi muyiishi unupatula kumpala kwa díbà bwa nwamona mwa kwalukila ne kuya kabibandila; ndumba kampanda wa kale, mukooyike wa nkooyòlolà, wa manyaanu, musediibwe misangu yitaanu anyi yisambombo, ulasula mineku ya bundu, muvwale tulàmbà twa disalulangana naatu masandi, ne wenza maalù a lukutukutu byenze bu cinganyi cyônsò. Ki peenu nunanga ciine aci kupita munutu banange nzubu wa Nzambi, aci’s cidi cileeja ne nnyuma wa mushindu kaayi udi munda mwenu amu.

³²¹ Twêtù mbadi baanyishe. Twêtù, bantu, bu bantu baa mu ditunga edi mwa kufundila bukalenge bwetu mikanda, twàmbè ne nkufwanyine kwikala mikanda miliyô lukama mifundila bukalenge abu ne: “Imanyika ndongamu ya bukooya ayi,” s’mbafwanyine kwikala benzejiibwe bwa kuyilekela. Twêtù aba’s ki cisamba ciine. Kadi twêtù, cisamba, mbadi banange bintu bya bukooya, pa nanku’s ki bitudi tupeta.

³²² Tangilaayi ndongamu wa cisanji cya tudyomba. Kaa, ekelekele! Bandamune *Lubwebwe Lwà Bikondo* lushaale maja a bajeekaja nyima. Uh-huh. *Nkùrusè Mukàyàbàle Wa Kale* mwandamuke musambu wa ndòmbòlò, bapatwileku majha a bidùndadùnda. *Nkùrusè Mukàyàbàle Wa Kale*, eyowa’s, bushuwa, ku bisanji byetu bya tudyomba, ku télévison. Byônsò bya . . . Mbyangate mwab’ewu, anu abidi adi pansha aa, mbila ya mikole ya disanka ayi, twànà twa bakaji twa tutekete atu.

Byònsò bishaale anu bya nsòmbelu wa masandi menemene, ki bitudi twètù banange mbyòbi abi.

³²³ Mfranga yidibo babituudila nya ku cinyi? Ya ku maala a bière, a whisky, mfwanka, mfranga ya ditunga. Badi benza cinyi? Bangata mfranga yabo ya ku bitadi bya ku biine bintu abi, yìvwà yìkèngelà kufutabo bukalenge bwa bitadi ayi, kadi bayifuta bwa ndongamu mikooyike ya manyaanu ya télévision yidibo baleejangana ayi.

³²⁴ Beena Mpenta bavwa ne ciibidilu cya kubenga kuya mu bindidimbi bya manyaanu ne bya bukooya abi, pavwabo baleeja miine manayi awu. Dyabulu's nyawu wánùtalàminyì, wátèeki télévision mu nzubu mwenu.

³²⁵ Ngenzeli wa maalu wa muprofeta mulelela's mmukole wa biyooyi, kadi tushaalaayi ne Bulelela. Eyowa's, mukalenge.

³²⁶ Tangilaayi anu ku mboodi yetu ya mamanyisha. Bakaji biimane mwaba awu, bakwate mici ya mfwanka ku byanza, ka-Izabela kònsò kaa mu ditunga. Mvwa muye ku . . .

³²⁷ Dìngà dituku, kadi mèmè kumona cintu cya dikema's. Kuvwa muntu mukaji kampanda uvwa mulwe ku tulaasa kwaka, bwa kwangataye bânà bende, pâmvwà paanyi muye kangata baanyi, yèyè awu ki umwepele uvwa kayi muvwale kaputulu to; bya bwalu, kuulu, kwa mashika a muntu mufwanyine kuuminayina. Yònsò wa kudibo mwikàle ne mucu wa mfwanka. Padibo anu bafika mwaba awu biimana, kabayi ne mucu wa mfwanka to, badi bamba bawuteemesha dyakamwe, ne: "Hwi! Udi umona mündi bimpè anyi?" Mulame cyanza aci pambelu paa ciibi cya kashinyi, nunku *ewu*, mukwate mucu wa mfwanka mu cyanza. Kadi didingè anu wãmbè cintu kampanda pa bwalu abu, kaa, bàkubùlukila's. Bushuwa.

³²⁸ Didinge anu wãmbè cintu kampanda wambila ka-ricky anyi ka-elvis kakwabo, anyi umwe wa kudibo pambelu pààpa, s'mbafwanyine kukwasa cingoma. Ne bukalenge mbufwanyine kutwa ku cyabo, ne bwalu nyawu bacidi anu bansonga. "Kaa, aci's cidi anu cikumbane. Bòbò, kabavwa bumvwe to. Bòbò's mbansonga. Bilengùlùlaayi."

Mpindyewu nudi numona cidi muprofeta mulelela umvwija anyi, wende ngenzeli wa maalu?

³²⁹ Tangilaayi beena mmwenenu mikonyangale ya bukooya aba mu maekeleziya, ne dingumba dyabo adi, s'mbafwanyine kukwasa cingoma mu mwongo amu kabayi bashinshikila to. Cintu cimwepele cidi cibapangisha bwa kwenza nanku, nduse lwa Nzambi, too ne pìikalà Mukenji mufidiibwe. Dyabulu mmufwanyine kukushipa, bu ne ùvwa ne mushindu wa kucyenza. Cya bushuwa's. Kadi bikengela anu Mukenji uye. "Mèmè Mukalenge nêngàlujululè." Ncya bushuwa. "Ku mabwe aa Ndi ne bukole bwa kucijuula." Ncya bushuwa. Eyo.

³³⁰ Sèndèmâ yetu, mboodi yetu ya mamanyisha, bangènzàmpèkààtù beetu banangi baa bisankasanka biikàle badibiikila mudibo beena Kilisto. Bantu bàdì bàdibiikilâ mudibo beena Kilisto; banangi baa bisankasanka, bakebi baa nkuka. Bakaji, bavwale mvwadilu wa disalulangana nende masandi; balume babatangila, babeela tushiba, badibiikila mudibo beena Kilisto, bapatuka. Mona's, baa bwalu biikàle ne—baa bwalu biikàle ne. . .

³³¹ S'ncintu cinene mu Floride, mu Californie, mukaadibo ne tusumbu tunene mpindyewu. Balume bõnsò badisangisha beela nsapi yabo mu cintu kampanda, nenku bakaji babwelamu ne mukaji ne mukaji wambulamu umwe wa ku nsapi ayi. Nenu yõnsò wikalakù awu, wangata "mukaji" wende awu uya nende mwende. Bàsõmba munda mwa lumingu lujima, pasiishe baalukila, beelamu nsapi, nsapi ayi cyakabidi. Nwamonu anyi? Ki tusumbu ntwõtò atu. Bànâ balela baa panshi ne bikwabo byõnsò, ngulube udyâ ngulube nende, mbwa udyâ mbwa nende. Mbwalu kaayi abu? S'mbwalu bakaadi balekele Diyî.

³³² Kî mbamanye ne nsõmbelu wa kaneemu mbwena kwamba cinyi to. Bapatuka pambelu apa bavwale tunkanzu tukese, twa kale tubõnyè pambidi, ne bintu bya mushindu awu, ne balume babaalakana, kadi badyelela meeji mudibo baa nsõmbelu wa kaneemu. Udi mufwanyine kwikala kuyi mwenze bwalu bubu nansha bumwe to, mwaneetu wa bakaji, kadi lekela nkwambile bwalu, wèwè udi cyamu cya mudimu cya dyabulu. Nenu ku Cibasa cya Cilumbulwidi, EMU MMUDI MUKALENGE WAMBA, neukalumbulule bwa dyenda dya masandi, ne musuuka webe newikale mujimine. Wèwè's udi mumanye cidî citambe bwîmpè. Wacimanyi mpindyewu, twamb'eku twamb'eku. Cya bushuwa.

³³³ Ndongolwelu wetu yõnsò nkòng mmunyanguke ne mushaale wa kanyawu. Ncisamba cyetu, cidibo baswe aci. Byenze bu mudi muntu mwena nzubu mwîmpè, ee, bu ne muntu uvwa muntu mwena nzubu mwîmpè, mwikàle udyula bukalenge bwenu. . . S'ki cidî cituma bànâ beetu baa balume balela mwab'ewu ne cibavwija tuzoolo twa kumana naatu mikiiya, cya bushuwa's, mbwa dinyanguka dyetu twètù biine. Bu twètù banange Mukalenge ne biikàle tukwacila Mukalenge mudimu, ne bu twètù basungule bukalenge bwa mushindu mwîmpè ne bikwabo byõnsò, nunku's mmwaba mulenga wa dikema. Ncya bushuwa. Nunku katwenaku ne mvita to. To. Nzambi ki cyetu cinyeemenu ne dyetu dikanda. Kutuma bànâ beetu baa balume balela bwa kuya kabashipabo, babashipa bu njiji, ne bikwabo byõnsò, mbwalu cyenzi cyetu twètù biine ncidi cibyènzèje. Ki citu Nzambi mwambe, mu Bible, ne Yèyè katu ushintuluka nansha. Yèyè utu anu umwèumwè awu. Ndiswa dya cisamba cyenu nwènù biine.

334 Byenze mudi muntu mwena nzubu mwîmpè, ambaayi tũng bu ne yêyè mmuntu mwîmpè? Muswa kwenza cidi cîmpè. Muswa kwikala ne mwoyi bwa Nzambi. Kadi mwikále ne famiye munange bisankasanka, ne byenzedi bya nsòmbelu wa masandi. Cîikalà muntu mwa kwenza ncinyi, piikalabi ne mukajende mmunange kuvwala tuputulu, ne kuvwala tulàmbà tudi ne mmwenekelu wa usalulangana masandi, ne kupatuka ne kwenza maalu bu Izabela kampanda, bânà bende baa bakaji ne bânà bende bônsò, ne bôbò bônsò? Papa wende. . . Mwanende wa balume mutekete udiye mukoleshe, ne munange, ne mulaabelaabe cyanza ne mutwatwatwe mishiku, ne mulaadike mu kalaalu, ne mumusambidile, ùjuuka, wamba ne: “Mukulumpe wanyi ewu udi ne mukupa. Cyende cyônsò cidiye pende welela meeji cidi anu Bible.” Cidi muntu awu mwa kwenza ne famiye wende awu ncinyi?

335 Ki cintu cimwecimwe aci mu bukalenge bwetu, bwa cisamba eci mwaba ewu. Kanwikadi nudyula bukalenge to. Ikalaayi nudyula musùmbà wa ekeleeziya yidi mitwe cîmpingà eyi, bwa dyela dya bintu bu nanku mu cidiidi cyabo, bu mudibo naabi emu. Bôbò mbadi babiswe. Ki bwa cinyi badi babyelela tukanda babisungula, ne ki bwa cinyi mbabipete. Ne ki bwa cinyi dinyooka dya Nzambi didi pambidi paabo. Nenku bôbò nebapoole cidibo bakuna eci. Badi munkaci mwa kukuna patudi twakulangana apa, kadi nebashiishe kupoola paanyima. Tangilaayi. Kaa! Twêtù's dipaala nditukwate. Kaa, eyowa's.

336 Tukeba bwa kusùmba njila wa dibwela mu Russie. Tukeba bwa kusùmba njila wa dyendela pamwe ne communisme. Tukeba aci. Mona's, ne mfranga, kanwenaku mwa kusùmba mapà a Nzambi aa to. Kuvwa mulumyana mukwabo, Simona, wâkateeta kucyenza dîngà dituku, kadi Peetelo kwambaye ne: “Ubutuke wêwè ne mfranga yebe.” Tudi munkaci mwa kukwata mudimu wa Simona mwena majimbu, tukeba bwa kusùmba dipà dya Nzambi.

337 Alukilaayi ku Dìyì. Alukilaayi kudi Nzambi. Alukilaayi kudi Kilisto. Dìbà adi kanwikadi nulubakaja meeji bwa communisme to. Netwèlè tukanda tusungule muntu udi ukumbana. Netupete muntu mukwabo wa bwena Abraham Lincoln, George Washington, muntu uvwa muntu wa nsongo. Kanwikadi nudyula bukalenge abu to. Tudidyulaayi twêtù biine. Ki civwa Amosa mufwanyine kwamba. Ne ki cidi muprofeta mulelela kana yônsò wa Nzambi mufwanyine kwamba, piikalaye mumanye Dìyì dya Nzambi. Piikalaye muprofeta mulelela, yêyè—yêyè mmumanye Dìyì, bwalu Dyôdi dilwalwa kudiye.

338 Izaleela, mu cipungidi cyabo ne— cyabo civwabo benza ne mwena lukuna aci. Dyambedi, byakakengela kwanjibo kuseesuka ku Dìyì dya Nzambi, kumpala kwa kumonabo mwa kwenza cipungidi ne mwena lukuna wabo awu.

339 Ne twètù kumpala kwa kwenzaku cipungidi ne beena lukuna beetu ne bikwabo, bikengela twètù kwanji kuseesuka ku Dîyi dya Nzambi. Uh-huh. Ncintu cimwecimwe aci mpindyewu, biikàle tushiila Loomo utukwata ku bukookeshi bwende. Mona's, s'ki citudi twenza, dîbà dyònsò edi. Nyawu ùkaadi mukwate bukalenge. Ùdi munkaci mwa kwikala wenda ukwata myaba. Ùkaadi mukwate bantu. Patudi twakulangana apa ki kukwataye maekeleziya eku.

340 Citudi twètù munkaci mwa kwenza ncinyi? Basòmbe kacya twapuwa, tupunga naabo dîyi. "Kaa, byòbì biine kabylene ne cidibi bishintulula to nansha biikàle mushindu *kampanda* anyi mushindu *kansanga*. Byònsò abi's bidi anu n'Nzambi's, twamb'eku twamb'eku." Nwènù baprofeta baa ku dîna baa mashimi bakwate ne bya luse, beena dikenga, batwe cimpingà aba. Mbwalu kaayi ebu's neenu? Kî mbamanye Dîyi pa bidi bitangila Nzambi ne maalu aa to. Kabatu balonga Dîyi to. Kabeena bafika ku dyumvwa to. Badi bòbò bamba ne communisme ki wakwata buloba bujima ku bukookeshi bwende. To, kaakukwataku to.

341 Cyena Loomo ki cyakwata buloba ku bukookeshi bwaci, ne cidì munkaci mwa kucyenza mu dîna dya bwena Kilisto. Bible kaakambaku, Yesu kaakambaku ne: "Nebitambe kufwanangana, mu mushindu wa bifwanyine kudingakaja ne Basungula mene, bu ne bivwa mwa kwenzeka" anyi?

342 Cidi citukengela leelu ewu...Ndekelaayi njikije, pa kwamba nunku. Bwa mpindyewu ndi njikija. Cidi citukengela leelu mmuprofeta mukwabo mulelela. Amen. Bidi bitukengela muntu wa Dîyi dya Nzambi dilwa kudiye. Eyowa's, mwaneetu. Neabengiibwe ne neipaciibwe, ne neèdiibwè pambelu, kadi ncyà bushuwa ne yèyè neatubule disoso. Yèyè, yèyè...Eyowa, uh-huh. Ncyà bushuwa ne yèyè mmufwanyine kwela Mamiinu a mu mushindu awu mu mushindu wa ne Basungula nebàÀpetè. Uh-huh. Ncyà bushuwa. Bidi bitukengela muprofeta. Bidi bitukengela muntu udi dyumvwija dilelela dya Dîyi dilwa kudiye, udi Nzambi wakwila kudiye ne ushindika Dîyi, bwa kuDivwija dilelela. Ki cidì citukengela ncyòci aci. Kadi, mwaneetu, s'mbatulaye wa nanku's, bilondeshile Maalaki 4: "Bwa kwalujulula." Cinyi? "Diitabuuja dya bantu, kudyaluja ku Bible." Mbatulaye wa nanku. Yèyè ki wacyenza.

343 Amosa uvwa mumanye. Eyowa's, mukalenge. Amosa uvwa mumanye ne, Izaleela, bananga bende biine bavwa kabayi baneemeka Nzambi abu abidi mmale asatu mmîpì bavwa mwa kubabutula.

344 Ne bananga baabo biine baa leelu ewu badi kabayi baneemeka Nzambi abu nebabutule kataataka, anu twitabaayi miine ya cyena mangumba ne bikwabo mudibo bakadiswikile amu. Nwènù beena Mpenta, ki cintu ncyòci aci cyanubutula,

twitabaayi wenu ne dingumba dyenu adi. Nudi munkaci mwa kudiswikilaku anu nwênù biine, biikàle nwangata cimanyinu cya nyama wa lwonji, kadi kanuyi nansha bacimanye to, cibì nwenda nucikoka badimwene ne enu abidi. Bushuwa's. Ncintu cya benzejangana ku bukole. Cinudi nuteeta kwenza aci ncinyi? "Anyi nudi nushaala beena *cikampanda*, anyi kanwena ne kunudi to." Nwamonu anyi? Anjaayi anu kwindila, anji ndaayi anu kakese, anji tungunukaayi anu kabidi kakese cyanaana. Pashiishe, udi wamba ne: "Nêmpatukèmu dîbà adi." To, kwakupatukamu to. Ukaadimu. Ukaadi mumane kutwibwa cimanyinu. Ukaadi mupeteke ne cimanyinu cimana kukutwa.

³⁴⁵ Nansha bishi, Esawu wakadila bujindajinda, wa bwalu yêyè's uvwa mumanye civwa citambe bwîmpè. Kadi's wakadila bujindajinda, uteeta bwa kupeta kaaba kaa kupetelaye kanyinganyinga, kadi kayi mwa kukapetaku to. Neushaalemu dîbà adi. Mpindyewu's ki dîbà ndyôdi edi dya kunyeema.

³⁴⁶ Amosa uvwa mumanye ne bananga baabo bavwa kabayi baneemeka Nzambi abu abidi mmale asatu mmîpi bavwa mwa kubabutula, bwalu bôbò, ekeleeziya, bakaavwa baMulekele Yêyè, Nzambi ne Dîyì Dyende, njila wa Mwoyi. Bakaavwa baseesuke ku njila wa Mwoyi wa Nzambi, kadi badyênzele wabo bôbò. Kaa, Dîyì dikaavwa kudibo dibwe dya cilendwishi.

³⁴⁷ Nenku Didi cintu cimwecimwe aci leelu ewu. Dîyì dya Nzambi dikaadi dibwe dya cilendwishi kudi mwena Kilisto wa ku dînà. Udinge umwambile bwa dibatiiza dya mu mâyì mu Dînà dya Yesu Kilisto. Umwambile bwa Nzambi wa cijila. Aci necyenzè . . .

Nenku, ee, badi bamba ne: "Ee, s'tudi ne Nyuma Mwîmpè."

³⁴⁸ Kadi bwa cinyi nucidi anu ne nsuki mibebula? Bwa cinyi nucidi anu nubatiiza mu dînà dya "Taatu, Mwânà, Nyuma Mwîmpè"? Bwa cinyi nucidi anu nwitabuuja bintu bikwabo binudi nwitabuuja ebi, ne nwenza maalu mushindu unudi nwenza awu? S'ki cidì cibileeja ncyôci aci. Mamuma enu's ki adi acijaadika. Yesu wákamba ne: "Ku mamuma abo, ki kunwabamanyina." Eyowa's. Nwamonu anyi? Aci ncidi anu cileeja ne, nudi nwamba maalu anudi kanuyi bamanye ne adi bishi to. Eyowa's, mukalenge. Eyowa.

³⁴⁹ Bu Amosa mwikàle mwaba ewu, nunku's mmwele mbila ulwishangana ne ndongamu yabo eyi. Nudi bamanye aci anyi?

³⁵⁰ Mpindyewu nêmbalè mvensa umwepele kumpala kwa kujikija, mvensa wa 8 wa nshapita mwi3. Nenku tubalaayaaku.

Ntambwe nyewu wakungulu, wabenga kukwacika bwôwà nganyi? Mukalenge . . . nyewu wákulù, udi kayi mwa kwamba ciprofeta nganyi?

³⁵¹ Teelejaayaaku. Bwa kujikija mpindyewu, ndi muswe kwamba nunku. Mbintacishe bwa mündi munulame, tusunsa

makumi asatu paanyima. Kadi, tangilaayi. Ndi muswe kwamba nunku. Mémè ntu cilembi. Ntu ntwa buluwà. Ndi ne disanka dya mudi Nzambi mumpe cintu cya mushindu awu.

³⁵² Dituku dikwabo adi pavwa cingoma citaayike apu, mémè kukwalukila dyakamwe, bwa kumona ní mvwa mwa kutuuta kabidi cingoma. Ncyèna muswe bwa cintu aci kunkwacishaci bwôwà to. Bu mémè mupete njiwu, mu njila mwamwa, ncivwa mwa kulekela dyendesha dya mashinyi to. Mémè ngenda ngendela panshi apa kadi kutuuta mwânankàsà ku tàpì, ne kungiimanshilabo pa dididiishi, ncyèna mufwanyine kulekela kwenda lwà makàsà to. Nwamonu anyi? To, to. Nzambi mmumpe didiibidija dya dikezùke. Awu ùvwa n'Sàtaanà. Awu kàvwa n'Nzambi to. Nwamonu anyi? Awu ùvwa n'Sàtaanà.

³⁵³ Mpindyewu, ndi mumanye ngangàcìlù waci wa mu nyuma. Tudi bantu basatu mu cibambalu emu mpindyewu mene, badi bamanye ne ciine aci ncinyi. Ncifwanyine kunuvwayija nsuki ya ku mutu, kadi ncyèna muswe kucyambila muntu nansha umwe to. Nwamonu anyi? Anu bantu basatu abu, bu cishindiki. Mpindyewu, bidi byònsò anu bìmpè. Bidi byònsò... Nzambi uvwa mumanye byònsò abi, ne Yèyè ukaavwa mudyanjile kudimwija pa bwalu abu, ne bikwabo byònsò. Ne twètù tudi bacimanye. Civwa ndambu cilema cyanyi, ne mémè mvwamu ne cintu kampanda.

³⁵⁴ Mémè—mémè ngâkaakwila muntu kampanda mûngà musangu, paabi kabiyi bikengela mémè kwikala mumwakwile to. Bivwa bikengela anu bwa mémè kwikala mumunyukushe mucima wamba kumupatuka munda. Nwamonu anyi? Pamutu paa kwenza aci, byakakengela mémè kuyooba bwa bwalu abu. Pa nanku, pashiishe, pa nanku twètù... Bidi anu bìmpè. Awu udi anu mmémè, ne bwalu bwine abu bukaadi bufwidiibwe luse patudi twakulangana apa. Nenku netuye anu kumpala. Nwamonu anyi? Eyowa.

Amosa, mvensa wa 8 ewu: “Ntambwe yèyè ukungule, wabenga kukwacika bwôwà nganyi?”

³⁵⁵ Nkaadi mutwatwatwe buluwà mu bisuku bya mu Afrike. Nkaadi mufikefike myaba yivwa nyama ya ntambwe yisanganyibwa. Yèyè ki udi mfumu wa bukwan'yama. Nkaadi mulaalelaale pambelu mu bisuku mèbà a bufuku ne muumvwe mikunda ne myadi ya bimungu, diseka ne ditwa dya mikemu, ne—ne—ne nyama mishiileshiilangane. Ne pashiishe bimwe bya ku bimungu abi mbifwanyine kwenza, kukuumisha mashi padibi byela mbila mikole. Ne mwômò amu ne nkashaama, ne didididila dya mu mènù, ne bikwabo byònsò, ne bijangalala, ne nsoko, ne ncima, ne binunu misangu binunu, “skwik, skwok.” Wenda mu myaba yònsò ayi, udi mwa kuumvwa bintu bya mishindu yònsò byenzeka. Kadi ntambwe adidinge anu akungule anyi, nansha

bijangalala bidi bishaala anu nya. S'ncinyaanya cya lufu. Yidi yishaala anu nya. Ncinyi aci? Mfumu wabo mmwakule. Amen.

³⁵⁶ “Ntambwe yèyè mukungule, wabenga kukwacika bwôwà nganyi? Nzambi Yèyè mwakule, nganyi udi mwa kudikanda bwa kwamba ciprofeta?” Padi Nzambi wakula, muprofeta udi wela lubila. Nudi bamanye cîndî muswe kwamba aci anyi? Muprofeta mulelela udi wela lubila. Balunda baanyi, Yèyè's mmwakule. Pa dîbà adi, cifukiibwa cyônsò cya mu Bukalenge Bwende cibawule maci ku cidîYe mwambe.

³⁵⁷ Pîikalà ntambwe mwa kujingulula ne kudi cintu kampanda cidî kaciyi mu cyôcî to, padiye ukungula apu, byônsò bya mu bukcalenge bwende's bidi bipuwa. Bidi biteeleja. Nansha mene tujangalala tukese atu, nansha nanku, s'kadi mu bukcalenge bwa ntambwe awu. Awu mukemu wa cimungu ùdî wùmishà mashi awu, yèyè mwine awu udi ubwikila mukana. Nzevu mwine awu, udi ne bukole bwa kwambula ntambwe, ne kumunyungulula eku ne eku, ne “Wiiil! Wiiiil!” yende ayi awu. Kadi ntambwe adidinge anu akungule, yèyè's neabwikile mukana amu kadi kushaala mwimane kaciyi unyunga. Ne ngombangole mwena lwendu awu, udi ne bukole bwa kukungwila mu dyûlù, umweka bu udi mwa kupwidijila mudilu mu dyûlù dyende awu. Padi ntambwe umutupikila pambidi, kî mmufwanyine nansha kumwenzela bwalu to. Kadi nguvu wa mwînù, ne nsengu yende yidi ne bujitu bwa kilô binunu mwandamutekete ayi, mmufwanyine kumutubulula naayi, ne mwînù wende munene awu. Ntambwe adidinge anu akungule anyi, s'ùdi ushaala mwimane mu mupwa wende amu. Mbwalu kaayi budi bwenzeke abu? Mfumu wende mmwakule. Nwamonu anyi? Mmuswe kuumvwa cîikalà mwa kwambiibwa aci.

³⁵⁸ Nenku padi Nzambi wakula, muprofeta udi wela lubila. Ne dîbà adi Bukalenge Bwende bubawule maci ku cidîYe wamba. Nzambi mmwakule. Cifukiibwa cyônsò cya mu Bukalenge Bwende citeeleje cidîYe wamba.

Tusambilaayi.


³⁵⁹ Éyi Ntambwe wa cisamba cya Yuda we, juukaaku ukungule! Wèwè ngudi ukungula mu dituku dya ndekeelu edi ewu. Mèsù Ebe mmakeepesha. Udi mutangile panshi. Udi munkaci mwa kuumona mpekaatu wa ditunga edi dîdî didyamba mùdîdî dya beena Kilisto ne wa buloba ebu. Udi munkaci mwa kumona mpekaatu wa ditunga edi, dya bwalu dyâkasumbiibwà ku Mashî a mushinga mukole. Udi munkaci mwa kumona mudi mangumba miikale adyatakaja Dîyi Dyebe ku makàsà. Monaaku mudi baprofeta baa mashimi badinga. Badi bavila Bulelela bwa Nzambi.

³⁶⁰ Kungùlăku's, Éyi Ntambwe wa Yuda! Enza bwa baprofeta Beebe bêlê mbila mikole. “Padi Nzambi wakula, udi mwa kubenga kwamba ciprofeta ki nganyi?” N'Dîyi dya Nzambi

diikàle dipatukila mu Bible, dibàndila mu muprofeta. Mmunyi mudiye mwa kushaala mupuwe? Bu yèyè anu mwa kushaala mupuwe, s'mmufwanyine kutaayika kushaala anu tusunsukila. Èyi Nzambi wa yaaya, enzaku bwa muprofeta Webe akungule, Mukalenge. Kunguláku ùpatulè Mukenji Webe, Nzambi, ne cífukìbwa cyònsò cya mu Bukalenge Bwebe cibawulè maci.

³⁶¹ Swaku bwa biimane. Swaku bwa bakaji biimane ne badikenkete. Swaku bwa balume biimane ne badikenkete. Swaku bwa muyiishi yònsò udi uteeleja mukaba wa mèyi ewu, imane ne adikenkete, bwalu Ntambwe wa cisamba cya Yuda udi ukungula. Ne Dîyi dilelela didi dilwa kudi baprofeta adi, dyakule, dyèlè lubila lukole ne: “Nyingalalaayi ne kudimukaayi nwalukile kumpala kwa dîbà kwikaladi dimane kupita.”

³⁶² Nzambi, nyewu ndambula Mukenji, pa mikaba ya mèyi ne mu bateeleji badi bamweka ne mèsù aba, kùdi Wèwè mu dinda emu, mwikàle ne dyeyemena ne Wèwè neùWányishè. Nenku biikilaku mwànà wa balume ne mwànà wa bakaji yònsò wa Nzambi, udi mwinshi mwa . . . wikalakù mwa kuteeleja mukaba wa mèyi ewu awu, anyi mwinshi mwa lubila lwa dîyi, baalukile ku kanyinganyinga kumpala kwa dîbà kwikaladi dimane kupita.

³⁶³ Nenku ndi ngiitabuuja, Mukalenge, ne bu Wèwè mwa kutuma Amosa mwaba ewu, yèyè mmufwanyine kwela lubila wamba cintu cimwecimwe eci. Bwalu yèyè kî mmufwanyine kwela lubila . . . Kadi yèyè mwikàle muprofeta wa Mukalenge, udi yèyè mupatudi ne mutangalaji wa Dîyi. Mmutumiibwe kudi Dîyi, mwikàle ne Dîyi, ne yèyè udi Dîyi. Mpindyewu, Mukalenge, byenzekeku nanku, mu Dîná dya Yesu Kilisto. Amen. 

NGENZÈLÙ WÀ MAALU WÀ MUPRÒFETÀ
MULELÈLÀ WÀ NZAMBÌ LUA62-0513M
(The Way Of A True Prophet Of God)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matùkù 13 a ngondo mwithànù, cidimu cya 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org